







John Carter Brown.





Rodriguez[#] 2304

Salvin # 90040

Oct 11

The description of the
end of the

of the

129

WARACHTIGE HISTORIE ENDE BESCHRIJVINGE EENS LANTS IN

America ghelegen, vviens inwoonders vvilt,
naeck, seer godloos, ende vvreede
menschen eters sijn.

*Beschreuen door Hans Staden van Homborch wt lant van
Hessen, die welcke seluer in persoone
het landt America besocht heeft.*

Vt den Hoochduysch ouer gheset.



TANTVVERPEN,

By Christoffel Plantijn, indē gulden eenhooren.

1558.

MET PRIVILEGIE.



De Konincklike Maesteyt heeft toeghelaten ende
hepermitteert Christoffelen Plantijn, te moghen
drucken oft doen drucken, vercoopen ende distri-
bueren dit teghenwoordich boeck, gheheeten
Beschrijuinge des lan̄ts America. Verbie-
dende allen anderen Druckers ende boeckuercoopers, dit selfde in
vier iaren tijts na te drucken, oft te doen na drucken, in geender
manieren, in Franchoys, oft in Duytsch, op de pene en̄ confiscati-
en vanden seluen boecken, ende noch daer en bouen XX. Carolus
gulden: ghelijck dat noch breeder int Originael der brieuen ver-
claert staet. Ghegheuen te Bruessel den X. Martij. Anno 1557.

Onderteeckent

Ph. de Lens.

Die Boeckdrucker totten Leser


A Engesien dat veele warachtige historien vā diuersche landen, en̄ het leuen en̄ hādel vanden inwoōders niet alleen seer cortwijlich en̄ genoeghelijk, maer ooc seer profijteliĳck is (wāt wy daer door vermaēt worden God te louen en̄ te dācken, dat hy ons ende onse landen, buytē alle Heydensche ende goddeloose, door sijn heyligh woort begaest heeft met goede leer eerlijcke policie, en̄ duechdelijcke manieren) So heb ick tot uwē diēste ende profijt goetwillige leser door dē druck int openbaer gebracht een warachtige beschrijuinge des lāts America genaēpt, wiens inwoonders wilt, naeckt, ongoddelijck, en̄ in alle manieren meer beestelijck dan menschelijck sijn, wāt sy niet alleē beestē tot des menschen behoefge

scapē, en etē, maer ooc mēschen vleesch
met grooter onhebbelijchz verflinden,
dwelc ons nē alleē vā Hās Stadē deses
boecks beschrijuer verclaert en is, maer
ooc vā eenē anderē genaēt Andreas Te
uet veel breder en opētlijcker bescreuē
wort, welcke ic onlancx door dē druck
ooc sal in voorscijn latē comē Aldus dā
ist sake dat dese mijne an beyt in dācke
vā v Leser genomē wort, so sal ic neer
stichz doen om meer historien der lant
scappē tot gemeynē profijte int opēbaer
te brengē, dwelc ghy cortelijc sult merc
kē en beuindē aen die wonderlijcke hi-
storie vā de Septētrionale lāden, wel-
ke ic v onlācx sal latē genieten, op dat
ghy dese en meer andere tefamen bren-
gēde moget siē wat manieren, wat reli-
gie, en oefeninge elck lāt bysonder hou-
dende is.

Tot Antwerpen, Den 8. May

Anno 1558.

7 DEN DOORLVCHTI-
ghen ende boechgeboren Vorsten ende
Heeren, Heeren Philipsen Lant
graef tot Hessen. *Wæt mij
nen genadighen Heere.*

 Henade ende vrede in Christo Ie-
su onsen verlosser, Ghenadighe
vorst ende heere. Die Coninclijske
propheet David spreeckt in den
hondersten ende seuensten psalm : Die met
scheepen opte zee varen, ende drijuen haren
handel in groote wateren, die des heeren wer-
versocht hebben, ende sijne wonder tot in-
der zee, wanneer hy sprack eenen storm
wint quā op, die de baren op hief, ende inden
hemel vuerde, ende wederō inden gront vuer-
de, soo dat haer siele van vreesen versaeftde, en
datse tumelden ghelijck een droncken men-
sche, ende en wisten gheen en raet meer, Ende
als sy dan totten Heere schreyden in harē noot
ende hijse wt haren anxt ende sorghen vuer-
de, ende stilde dat onweer, dat die baren hen
seluen neder leyden, ende datse vrolijck en blij-
de werden, om dat stille geworden was, ende
datse so ten lande ghebracht waren naer haren

ſchen, die ſouden den Heere dancken, om ſijn
goerheyt, ende om ſijn wōderdaet, die hy aen
den menſchen kinderē doet, ende hem bijder
ghemeynten prijſen, ende bijden ouders hem
beloeven.

Alſo bedancke ick my teghen den almachtigen
ſchepper des hemels, eerden, en der zee, ſij
nen ſoon Ieſum Chriſtum, ende den heyligen
Geest, vande grootē ghenade ende barmher-
tichz, die my geſciet is onder den wildē lieden
des lants Breſiliē, des welckē inwoenders, die
my ghevanghen hadden, ghenaeamt die Tup-
pin Imba, menſchen vleech eten, diens
ghevanghen negen maent ick gheweest ben,
ende veel andere vervarenthede, die my door
die heylighe dryuuldicheyt door een gansche
onverhoefte wonderlijcke maniere ende wij-
ſe geſchiet ende veruaren ſijn, dat ick nae lange
ellende, armoede, ende vreeſe van lijf ende le-
uen te verlieſen, wederom in VV. V. G. vor-
ſtendomme mijn hoechſte ende liefſte vaders
lant wederom nae dat verloop van ſommige
iaren gecomen ben, ende heb VV. V. G. ſul-
ken mijnē reyse, ende ſchip vaert onderdanich-
lijcken aenteekenen willen, dwelck ick opt
coſte begrepen heb, op VV. V. G. tot uwen
wel gevalle, ende gelegentheyt, daer inne met
ter hulpen Godts, hoe ick door dat lant en zee
ghetoghen ben, v dat voor leeſen laeten wil-
len

le, om der wonderlijke gheschiedenisse wil
le, die de almachtighe Godt inden noot by
my ghedaen ende ghetoontheeft, daer met
oock VV. V. G. aen my niet en twijfele, al oft
ick onwarachtige dingen te verstaen geuende
waer, wilde VV. V. G. ick soude een palport
totter seluer sacken dienende, selfs thonen en-
de laeren sien, tywelck ick presenteer. Godt sy
alleē dieeere, ende beueel my hier met VV. V.
G. in alle onderdanicheyt. Gheschreuen
te VVolfshaghen, den tweentwin-
tichsten dach Iunij, Anno Do-
mini vijftienhonderten
desse vijftich. &c.

VV. V. G.

Gheboren onderfaet Hans Staden
van Homborch in Hessen, borgher
te VVolfshaghen.

A. B 4

Den

DEN VVEL GHEBORNEN Heeren H. Philipsen, Graef van

Nassau ende Sarbrug, &c. mijnen ghenadi-
gen heeren, wenscht D. Dryander veel
weluaerens, met eerbiedinge sijns
diensts.



Ans Staden die desen boeck ende historie nu
eerst door den druck laet wt gaen, heeft my ghe-
beden, dat ick toch tot voordeel van sijnen arbeyt
ende schrift dese historie ouersien, corrigeren, en
de waeri dat van node waer, verbeteren soude,
om hem in sijnder beden te belieuen, heb hem om dryderley orsae-
ken plaets ghegeuen. Eerstmael, dat ic des authoers vader nu
meer dan vijftich iaer gekent heb (want hy ende ick wt eender
stadt, met name, te VVeiter, geboren, ende op ghetoghen sijn) ende
niet anders, den seluen in ons lant, ende te Homborch in Hessen,
daer hy nu ter tijt woenachtich is, dan als voor eenē op rechti-
ghen vromen ende treffelijcken man, die oock in die goeden vri-
jen con-
stē gestudeert heeft, hē bekent heb (ende als voor eē gemeyn sprec-
woord is) den appel smaeft alijt nae den aert des stams oft booms.
So ist te verhopē dat Hans Staden desen eerlijcken mans soone
sal in duechden ende vromicheyt den vader nae aerden. Ten an-
deren neme ick den arbeyt van dit boeckken te ouer sien, des te
vrijelijcker ende lieuer aen, dat ick geern in den saeken, die tot
der Mathematica toebehooren) als dan oock is die Cosmographia
dat is die bescrijuinge ende afmetinge der Lantschappen, steden,
ende wechreysen, die welcke in desen boeck op veelderley wijsē oft
maniere, een yghelijcken voor ghedraghen worden) belustighe,
want ick seer geerne met deser sake om gae, als ick verneeme, dat
men oprechtich ende warachtichlijck, die voorgaenden dinghen
openbaert, ende aenden dach brengt, ghelijck ic dan in gheender
manieren en twissel. Dese Hans Staden schrijft, ende vermeldt sij-
ne historie ende wechvaert niet wt anderen lieden aen-
teekenin-
ghe, maer wt sijnder eygen veruarenheyt, grondelijcken ende se-
kerlijcken aen, sonder eenighe valsche oorsaeck, dat hy daer in
geenen

geenen roem oft weereltlijcke eergiericheyt, dan alleen Godts eer,
lof ende danckaerheyt voor gethoende weldaet sijnder verlossin-
ghe soect, ende du is die meeste ende vernaempste oorsake, om de
se historie in licht ende aenden dach te brengen, daer door een
yghelijck sien conde, hoe ghenaedelijck teghen alle hope Godt die
heer desen Hans Staden verlost, ende vanden wilden lieden grim
micheyt (by den welcken hy by die 9. maent lanck, alle dage, ende
vre verwachten moste datmen hem onbermhertelijck en doot ge-
slagē ende geetē soude hebbē (in sijns lieue vaders lant in Hessen
weder heefilaten comē) voor dese onspreeckelijcke Godts bermber
ticheyt, wilde hy nae sijn leste vermoghen, n̄ gaerne, Godt danck-
baer sijn, ende die weldat die hem gheschiet is, Godt daer mede te
louen, allen een yghelijck openbaren, en indiē hy dit milde werck
also drijft, bringt die ordinantie vanden handelinghe met haer,
dat hy die gansche wechvaert oft reyse der 9. iaer, so hy wten lan-
de ghe vreeft is, vrie hem alle dingen verdraghen ende ghegaen
hebben, beschrijft. Ende die vrijl hy dese een voudige wijze oft ma-
niere niet met ghestoffeerde verbloemde woorden oft argumenten
verdrayet ende verciert, geeft my een groot geloue, dat sijn saken
goet ende oprecht sijn, ende hy en conde daer gheen nut oft pro-
sijt af hebben, dat hy loeghenen inden staet vander waarheyt ver-
drayde, ende stellen wilde. Daer toe is hy met sijne ouders, hier in
desen lant gheseten, niet als die lantloopers ende loeghenaers ghe-
woontheyt is, vanden eenen lant in dat ander, op die Heydensche
maniere om te loopen, moet also vermachten, waer ergens eenighe
bewandelde lieden, die inden Eylanden oft Insulen sijn geweest, by
hem quamen, ende mochten hem loghen straffen. Ende dit is my
een vast argument, dat sijn saeck, ende dese historie beschrijtinghe
oprecht sijn moet, dat hy aenteekent, den tijt, stadt, ende plaetse,
daer des hoochgeleerden ende verberoemden Eobani Hessi soon
Heliodorus, die hem langhen tijt vreemde landen te besoecken
begenen heeft, ende hier by ons als voor doot geseyt is geweest, by
desen Hans Staden inden lantschappen der wilden lieden ghe-
weest is, ende gesien, hoe ontfermelijcken hy ghevangē ende wech
ghevuert is. Deser Heliodorus segge ick, can oft coris of in langhe
(als men hoept dat gheschieden sal) thuyswaert comen, ende ist
dat dese Hans Staden historie valsche ende ghelogen ware, can hy-
se te

se te schanden maken, ende voor niet ende loghen aengenen. Van
 desen ende dier ghelijcken crachtigen argumenten, ende vermoe-
 den van Hans Staden oprechticheyt te bescutē ende te bewaren,
 wil ick dese reyse rusten, ende voort en luttel bescheyts doen wat
 dat die oorsake sy, dat dese, ende deser ghelijcken historien van
 een yeghelijck luttel beveels ghegheuen wort. Ten eersten heb-
 bent die lantloopers oft vaerders met haren ongheregeladen loge-
 nen, ende aenteekeninghe oft beschrijvinghe valsche ende ghe-
 dichte dingen daer heenen brocht, datmen oock den rechtscapen,
 ende warachtighen lieden, die wt vreemde landen comen seer lut-
 tel geloofs geeft, ende wort ghemeynlijck geseyt, die lieghē wil die
 lieghe verre van hier, ende ouer t velt, dat niemant der vvaerts
 en gaet daer vernemen, ende moevite doet om te versoecken oft
 mēt gelouen wil. Nu en ist euen wel daer met niet wt gherecht,
 dat om der logenen vvil, die waerheyt oock versterken ende ver-
 borgen soude v vorden, hier vvt is te mercken, dat so die ghemey-
 ne man eenige bescreuen oft aengeteekende dingen, niet mogelije-
 ken sijn, oft scijnen, ende doch geloof v vorden, ende noch die selue
 dingen by verstandighen lieden voor ghebrocht ende verhaelt oft
 ouerleyt ende geuegen worden, ende voor die gewiste ende seker-
 ste dingen geacht v vorden, ende datmen se oock so vint, dat merē
 wt een oft twee exemplen, die vvt die Astronomie genomē oft
 getogen v vorden, vvy lieden so vvy in Duytsch lant oft nae by
 wonen, weten wt lange veruarentheyt voort gebracht hoe lan-
 ge die vvinter, den somer met oock den anderen t vvee iaertij-
 den oft delen, herst, ende lenten dueren sal. Itē hoe lanck oft cort
 den lancxtē dach inden somer, ende corsten dach inden winter is,
 ende so ooc hoet mettē nacht te achten sy, als nu geseyt is dat som-
 mighe platsen inden werelt sijn, daer die son, in eenen haluen
 iaer niet onder en gaet, ende den lancsten dach by den seluen lie-
 den 6 maent, dat is een half iaer lanck sy, ende wederom den
 lancsten nacht oock 6 maent, oft een half iaer lanck sy. Item dat
 ter plaetsen inder werelt gevonden v vorden, daer in een iaer
 die Quatuor tempora, dat is vier tijden des iaers, dobbel sijn, also
 datter twee winters, twee somers in een iaer sekerlijck, daer
 voor banden sijn. Item dat die Son metten anderen sterren, hoe
 eleyn sy oock ons hier duncken te sijn, dat nochtās die cleynste ster

re grooter is dan die gansche eerde, ende dier dinghen veel sonder
getal. Als nu die gemeyne man dese dingen hoort, so veracht hijt
opt hoochste, ende geeft hem geen gelooue, ende achtet als dinghen
die onmogghelijck sijn, hoe vvel dat nochtans dese natuerlijcke
dingen doer die *Astronomie* in sulcken maten gedaē ende bevrē
sen vorden, dat die verstandige der const hier aen niet en vrvij
telen. So en moet daerom niet voegen, die wyl dat den gemeynen
hoop dese dingen onwarachtich hout, dat euen also sijn moet. En-
de hoe qualijck soude die const der *Astronomien* staen, wanneer
sy dese hemelsche corpora oft lichaemē niet en condē demonstre-
ren oft bewijzen, wt vasten ende ghewissen sekerē gront der *Eclip*
ses, dat is verdonckeringhe der sonnen ende manen, op sekere en-
de gewissen dagen ende vren, wanneer sy comē oft geschieden sou-
den, ia sommighe hondert iaer voor deser tijt aengeteekent, ende
men beuint in die veruarentheyt also waer te sijn. Ia segghen sy,
wie heeft inden hemel geweest, ende dese dingē gesien, ende heuet
afgemeten? Antwoort: Ier wijlen die dagelicke veruarentheyt in
desen dingen metten *demonstrationibus*, oft bewijsingen te gader
ouer een comen, so moetmen dat gelijck also seker houden alst se-
ker ende gewisch waer is, als ick 3. oft 2. legghe by een int ghetal
worden 5. daer wt gherekent, ende wten vasten ende sekeren gront
ende *demonstrationibus* oft bewijsingen der const, draget hem soo
daer toe, datmen afmeten ende rekenen can, hoe hoech dat tot aen
des manen hemel is, ende van daer voort tot allen planeten ende
ten eynde tot aenden gesterden hemel toe, ia oock hoe groot ende
hoe dick die son is, die maen ende andere lichamen oft corpora des
hemels sijn, ende wt die ouerlegginghe des hemels oft *Astronomia*
metter *Geometria*, reketmen gansch eygenlijck ende sekerlijck,
hoe wijt, ront, breed, ende lanck dat dat aertrijck sy. So nochtans
dese dingen altemael den ghemeynen man verborghen, ende als
ongelouelijck geacht worden, dese onwetētheyt waer dē gemeyn ē
man wel te vergeuen, als den genen die niet inden *Philosophia* ge-
studeert en heeft, dat euen wel die treffelijcke, hoechgeachte, ende
wel gheleerden lieden, aen die dinghen die so waer ghevonden
worden, twisselen, is beschamelijcken ende schadelijcken, son-
derlijck ter wylen die ghemeyne man op die selue siet, ende haren
eruer bestet ende beuesticht, also seggende, waer dat waer ware
so en

so en hadden dese oft die scribēten niet daer teghen gesprokene oft
gescreuē. Ergo &c. Dat Augustinus ende Lactanius, Firmianus,
die beyde heylige geleerste, neuen die Theologia oft godicheyt, oock
in goeden consten wel veruaren mannen, dubiteeren oft twijfelen
ende en wildē niet toe laten, dat die Antipodes sijn consten, dat is
dat men lieden vonde, die in die plaetse des aertrijcks, ende onder
ons met haren voeten tegen ons gaen, ende also dat hoofte ende lijf
onder ons hangen tegē den hemel, ende toch niet afen vallē &c.
Dit luyt selsaem te hooren, ende is nochtans altijts byden gelee-
den also, dat niet anders gesijn en can, ende waer geuonden wort,
hoe hoech dat die heylige ende hoochgeleerdē voor genoemde, ende
aengetekende authoers verworpen ende veracht hebben, dan dat
het vastelijcken waer moet sijn, dat die geene die ex diametro per
centrum terræ wonen Antipodes sijn moeten, ende het is een vera
propositio: Omne versus cælum vergens vbicunque sursum est, en-
de en dersmen niet hier onder inde nieuwe werelt reysen, die An-
tipodes also suecken, want dese Antipodes sijn oock hier inden
ouersten half deel des werelts oft aertrijcks, dan wanneer men te
samen reket, ende teghen malcanderen die vterste in occident
oft onderganck, dat is Spangien, ende auont sterren tegen orient
of opganck, daer Indien lant ley, teghen vvierste lieden en-
de in vonders des aertrijcks, by nae een aert vā Antipoden, also
oock als sommighe vrome Theologien hier vut bedieden vilden
dat die moeder filiorum Zebedei bidt, vvaer ghevonden is daer
sy den heer Christum badt, dat haerder soonen een tot sijnder rech-
ter hant, den anderen tot siinder sincker hant siten mochten, dat
is also gesiet, inder manieren S. Iacob te Compostel in Galisiën,
niet verre vanden sine terræ, dat gemeynliick die auont sterre, ge-
naempt vort, begrauen sijn soude, ende eerliicken ghehouden
vorden, ende die ander Apostel in India, dat is inden opganck ru-
ste, dat also dese Antipodes lange voor handen ge vveest sijn, ende
aengesien ge vveest, ende niet aengesien dat ter tiit Augustini die
nieu vverelt America onder dat aertriick noch niet gheuondē en
vwaren, so vwaren sy op die selue vviise oft maniere ghevveest.
Sommige authoers, ende sonderliicken Nicolaus Lyra (die toch
een treffeliick man is) vullen dat nae dien der eerden cloot
oft vverelt ter helft, oft haluē deel int vwater ley ende svrempt
also

also dat dese helft daer vvy op vronen, ouer dat vwater vrigaet
dat ander deel onder sy meier zee ende vwater, also ongheluen
dat daer niemant vronen en can, vvelck altemael tegen die cōst
der Cosmographien strijt, ende nu meer door veel schipmeesters
van Spanjaerts ende Portugaloesers, ende veel andere geuonden
is vworden, dat dat aertrijck allomme en onme bevvoot vort
ia oock sub torrida Zona, vvelck onse voorvaders en oude schri-
uenten, noyt en hebben vwillen toe laten, by onsen tijden, vvor-
ten, suycker, peerlen, ende ander dier ghelijcken vvaer vworden
wt dien landen hier tot ons getrocht. Dit paradoxon vandē An-
tipodibus ende vooraengheuekende des hemels afmetingen, heb-
ick niet vliet voort brengen vwillen, om dat voorgaende argu-
ment daer mede te bevestigen. Daer conde vast veel van dierge-
lijcken dinghen meer hier verhaelt vworden, waer by also, dat
ick met mijnen langhen schrijuen gheerne verdryeteliick vallen
vvilde, nochtans sulen daer dier gelijcke argumenten veel gelee-
sen vworden inden boeck, vandē weerdighe ende hoechgeleerden
magister Casparus goolt vvorm sietighe Superintendens V. G. te
Vveilborch ende prediciant, vvelckens boeck in ses deelen onder-
scheyden, en van veelderley miraculen ende vronder vvercken
ende paradoxen, also by vergaende tijden als nu gheschiedt sijn ge-
seyt wort ende corts in druck ghebrocht sal vwordē, tot vvelcken
boeck, ende tot anderen veel die dier ghelijcke dinghen beschrii-
uen, als sijn libri Galeotti de rebus vulgo incredibilibus &c. Den
goeden leser also verre hy beter verstant daer af hebben vvil
ick hier mede gevvesen vvil hebben, ende laet v hier mede ghe-
vvaer schout sijn, dat niet ghelogen sijn moet al dāmen schrijft,
al duncket den ghemeynen man vreempt, ende onmanierliick oft
onghevvoenliick, gelijck in dese tegenwoordige ehistorie, daer die
lieden alle inden Eylanden oft Insul naeckt gaen, gheen vhuys-
vaet vce oft beesten, ende andere gheretschap totter neeringhe
gheenderhande dinghen, so dat by ons is gebruyck, om het lijfte
houden, hebben, als cleederen, bedden, peerden, verckenē oft coyen
noch vvijn ofte bier &c. ende haer op haer vvijse onthouden, en-
de behelpen moeten. Daer mede dat voorreden oft prologhe ten
eynde loopt, vvil ick oock cortelijck bevvijsen, vvat desen Hans
Staden bevvrecht heeft, beyde sine schipnaerden ende vvech
reysen

zeysen inden druck te vernoderen, dies mochten hem veel lieden
qualick afnemen, ende niet te min vvilleggen oft meer preteeren
al of hy hem hier mede vvilde beroemen, oft bouerdigen name
maken, het vvelck ick seer wel van hem verneeme, ende geloo
ue vasteliick dat siin gemoet veel anders staet, als oock inde histo
rie vā achter tot voor vvel anders gemerckt ende verstaē vwort
Die wyel hy in so menichvuldige ellēde geweest is, so veel weder
weerdicheyt gheleden, daer aen dicwils siin leuen ghestaen heeft,
ende gans niet te hopen, dat hy daer afontlast, ende in siins
vaders lant weder comen soude. Godt enen wel, die hy altilt be
trout, en aengeropen heeft, heeft hem niet alle van siinder vian
den handen verlost, want siin ghebet met oprechtighen gheloo
ue, Godt dickwils beweecht heeft, heeft onder die goddelose lieden
Godt te verstaen gegeuen, dat die rechte warachtighe Godt crach
tich ende gewellich, ende noch in wesen is. Men weet wel, dat des
gheloouigen ghebet, gheen verdrach mael oft tiit, Soo dat n
enen wel Godt also behaecht heeft, door desen Hans Staden, siin
wonderliick werck by den goddelosen wilden, te sien laten, daer en
wist ick niet wat teghen te segghen. Oock ist een yeghelijck bekent
dat droefheyt, commer, ongheluck ende cranckheyt ghemeynlijck
die lieden tot Godt beweecht, dat sy inder noot, meer dan te voorē
Godt aenroepen. Sommighe tot n toe aen pleghen door een
maniere, haer seluen desen oft anderen eenigen heyligen beuaert
op te offeren, verbidden en bidden datse hen wt haren noot helpen
willen ende dese geloefie wort sterck ghehouden, wigenomen van
dien, die daer dencken die heylighen te bedrieghen met haren ge
loefien, alsoo gheliick een int schip S. Christoffeldie te Parijs in
den Tēpel staet een beelt ontrent x. ellen hooch, gelijck eenen groo
Poliphemus aenriep. Desen heylighen geloefie hebbende, also verre
hy hem wter noot hilp, soo woude hy hem offeren een wasschen
licht, also groot als die heylige was. Sijn naeste gebuer die by hem
sadt, die wiste wat hy vermochte, strafte hem van deser gheloo
fie ende seyde, al waert dat hy alle neeringhe ende goet dat hy op
ter eerden hadde vercocht, en const hy so veel was niet te weghe
brenghen dat hy sulcken keerse daer af soude doen maken oft be
talen, Antwoorde hem daer op, en seyde hem heymelijck dat die
heyligen

heylighe niet hooren en soude, als hy my wt deser noot gheholpen heeft, wil ick hem nauwelijck een cleyn licht oft keerse ghemaect eenen penninck wert gheuen. Ende die historie van den Ruyter die in een schipbrekinghe was. Desen Ruyter als hy sach dat het schip woude onder gaen, riep hy Sinte Nicolaes aen, dat hy hem wten noot helpen wilde, hy woude hem sijn peert oft pagie offeren, daer vermaenden hem sijn knecht, dat hy dat niet doen en soude, ende seyde hem waer op dat hy dan rijden woude, doen seyde die loncker totten knecht heymelijck, dattet die heylighe niet hooren en soude, swijcht ghy stil, als hy my wter noot helpt wil ick hem niet den steert vanden peerde gheuen. Alsoo dacht een yeghelijck van die twee sijnen heylighen te becrieghen, ende die ghedaen weluaert seer lichtelijck te vergeeten. Daer met nu dese Hans Staden niet oock also daer voor aengesien worde, nu hem Godt geholpen, ende vanden vian den verlost heeft, dese weldat te vergeten. Soo heeft hy voor hem ghenomen met druck ende beschrijvinghe der historien Godt alijt te louen ende te prijsen, ende wt eenen Christelijcken moet ende voorneemen, die wercken ende ghenade aen hem bewesen, waer hy can oft mach aenden dach te brengen. Ende waert dat du niet sijn voorneemen en waer (welck eerlijck ende recht is) soe wilde hy veel lieuer dese moyte ende arbeyt versuymenisse, oock onghewoende costen, die lichtelijck op druck ende formen te snijden te veel verdragende is, een eynde laeten hebben, ende goet laeten sijn. Dese Historie, ter wylen datse door den authoer den doorluchtighen hooghebooren Vorsten ende Heeren, Heer Philipsen, Lantgrau te Hessen, Graef tot Catsenellenboghe, Dietz, &cetera, sijnen lansthe eren ende ghenaedighen vorsten, in eeren dienende ghededicceert ende toe gheschreuen is, ende in sinen naeme openbaerliicken in druck laeten wt gaen, ende langhen tijt te vooren vanden voorgemelden vorsten, onsen ghenaedighen Heeren, in minnen ende anderen veel teghenwoordichbeyt, desen Hans Staden gheexamineert, ende van allen stucken sijn aerstijuaert ende genakenisse grondeliicken onderurdeelt, ende wel ondersocht heeft daer af dit vils VV. G. met anderen onderdanicklijck geteekent
ende

ende vertelt heb, ende ter vviilen ick *VV. E.* voor eenen sonder-
liicken liefhebber, sulcken, ende dier gheliicke *Astronomischen*,
ende *Cosmographischen* constes te sien, langen tiit ghemerckt, heb
ick dese miin prologhe, praefatie, oft voorreden *VV. G.* onderda-
nichliick vviilen toeschriuen, het vvelck *VV. G.* ghenadichliick
also van my vville aennemen, also lange tot dat ick vvat tref-
feliicker in *VV. G.* name in druck vervordere, my hier met *VV.*
G. onderdanichliick beuelende. Datum tot Marborch op Sint
Thomas dach. Anno 1 5 5 6.

Inhout des boeckx.

1 Van twee schipvaerden, die Hans Staden in acht iaer ende
een half volbracht heeft.

Die eerste reyse iswt Portugael, die ander wt Spangien in die
nieuwe weerelt America gheschiet.

2 Hoe hy aldaer inden lantschap der wilden lieden Toppinikin
ghenaempt (die den Coninck van Portugael toe behoorden) voor
eenen buschsuutter tegen die vianden derwaerts ghevoert was.

Ten lesten vanden vianden gheuangen, ende wech ghevoert
thiendehalf maent lanck inde vreesse ghestaen, dat hy ghedoos
vanden vianden, ende gheeten soude worden.

3 Item hoe Godt ghenadeliicken, ende wonderliicken op een
sonderlinghe maniere, desen gheuangen nae voorghenoemden
tiit verlost heeft, ende in siin lieue vaders lant laten comen heeft.

Alle Godt ter eeren, ende dancksegghinge van
siinder milder barmherticheyt, inden druck
laten wi gaen.

*¶ VVat helpt den wachter inden stadt,
Dē geweldigē schip indē zee sijn vaert,
Alse Godt beyde niet en bewaert.*

Hier beghint die Historie.

Dat I. Capittel.

ICk Hans Stadē van Hōborch
in Hessen, nam voor my (also
verre dat God liefdes) Indien
te besien, bē met dier meynin-
ghe van Bremē na Hollant ghe-
uaren. Te Cāpen quam ick by
schepen die wildē in Portugal sout laden, daer
voer ick mede derwaerts, ende wy quamen dē
29. dach Aprilis des Iaers 1547. by eender
stadt ghe-naempt S. Tuual, wy waren vier we-
ken opt water derwaerts te varen. Van daer
tooch ick na Lisboenē, dwelck vijf mijlen van
S. Tuual is. Te Lisbona quam ick in een her-
berghe, daer die weert genaempt wert die Ion-
ghe Luer, ende was een Duytsch: daer lach ick
een wijle tijts thuys. Desen seluen weert seyde
ick hoe dat ick wt mijns vaders lant ghetogen
was (waert dat my ghebueren möchte) om in
Indien te seylen: doen antwoorde hy, Ick was
te lange wt ghebleuen, wāt des Conincx sche-
pen die in Indien varen, waren langhe wech.
Ick badt hem der wijlen dat ick die reyse ver-
suympt hadde, dat hy my aen eenen anderen
helpen soude, midts dat hy die sprake conde,
ick soude hem wederom in sijnen dienst sijn.

C

Hy

Hy bracht my in een schip voor buffschietter, die Capitain vanden schepe was ghenaeamt Pintiado, en hy woude in Brasiliën varen, om comenschap: hy hadde oock oorlof die schepē te krijghen, die in Barbariën metten witten Mooren comenschapte. Oock waer dat hy de Françoysche schepen in Bresiliën metten wil den lieden comenschappēde vont, die soudē prijs sijn. Oock soude hy dē Coninck sommighe gheuangē daer int lant voeren, die selue hadden verdient gestraft te worden, maer om dat nieuw lāt daer mede te besettē, so werdē sy ghespaert, Ons schip was wel gherust met alle krijchs ghereeschap diemē te water ghebruyct. Onser waren drye Duytsche in dat schip, die een was ghenaeamt Hans van Bruchhausen, die ander Heyndrick van Bremen, ende Ick.

¶ Die eerste wtvaringhe mijnder eerster schipvaert van Lisseboenen wt Portugal. Dat II. Capittel.

VAN Lisboenē seyldē wy met noch een cleyn schipken dat oock onsen hooftman toebehoorde, ende quamen eerst maels by een eyland Eilga de Madera ghenaeet, ende hoorde den Coninck van Portugal toe, ende daer woonen Portugaloysers in, het is vruchrbaer van wijn ende van suycker. Ter seluer



seluer plaetsen by een stadt gheheeten Funt-
schal, namen wy meer victalien int schip. Daer
na voeren wy van daer nae Barbarien, na een
stadt Cape de Gel ghe-naempt, die behoorde
eenen witten mooré coninck toe Schiffri ghe-
naempt. Die stadt hadde hier voormaels die
Coninck van Portugal in ghehadt, en die sel-
ue Schiffri heeftse hem wederom ghenomen.
By de selue stadt meynden wy dat voorghe-
noemde schip te krijghen die metten oncriste-
nen oft Turcken comenschap handelden.

VVy quamen daer by, en vonden veel Ca-
stiliaentche visschers daer onder dat lant, die
berechten ons hoe dat daer byder stadt schepē
waren, wy voeren daer by, doen quam daer
een schip wyter hauenē wel gheladē, daer voe

ren wy na, ende creghent, maer dat volck ont-
uoer ons met den boot, daer saghen wy eenen
ledighen boot opt lant staen, die welcke ons
wel diende tot dat ghenomen schip, wy voerē
daer by, ende haelden dien. Die witte Mooren
quamen sterck aenghereden, ende wilden dat
beletten, maer syen costen om ons gheschuts
wil daer niet toe comen. Vvy namen dē boot
ende voeren met onsen buetē (welck was suyc
ker, amandelen, daeyen, bocxhuyden, en gom-
mi Arabicum, daer mede dat schip wel ghela-
den was) wederom nae Eilga de Madera. Vvy
schiētē ons cleyn schip na Lisboenen, om dat
den Coninck te laten weten hoe wy ons met
sulcken buet souden houden, wāt het behoor
de Valentiaensche ende Castiliaensche coop-
lieden toe. Ons wert vanden Coninck geant-
woort, wy souden den buet daer in dat eylant
laten, ende met onse reyse voort varen, in mid-
delē tijde soude sijn Altesa oft maiesteyt gron-
delijcken onderfoeckē hoe datter mede ware.

Vvy deden also, ende voeren wederna Ca-
pe de Geel, om te besie oft wy meer buets ver-
crijghen condē, maer ons voornemē was om
niet, en den wint liep ons teghen by den lan-
de, die ons belette. Den nacht voor alder hey-
lighen voeren wy van Barbarien met eenen
grooten storm wint na Brasiliën toe. Als wy
ny CCCC. mijlen van Barbarien af gheuaren
waren



waren in die zee, quamen veel visschen om dat
 schip, die wy vinghen met hengelhaken. Van-
 den seluen waren sommighe die de schippers
 noemden Albakore, die waren groot, sommi-
 ghe Bonitte, die warē cleynder, sommighe Du-
 cado. Oock waren daer veel visschē also groot
 als heiringhen, die hadden ouer beyde sijden
 vlimmen ghelijck die vledermuysen, die selue
 wordē seer veruolcht vanden grooten visschē,
 ende wanneer sy die ghewaer worden, so hef-
 fen sy haer op wten water met grooten hoo-
 pen, vliegghen ontrent twee vademen hooch
 ouer dat water, die sommige so verre darmēse
 nau sien coste, ende dā vielen sy wederomme
 int water, wy vonden se dicwils des morghens
 int schip ligghen, en waren des nachts metter



vloghe daer in gheuallen , ende sy heeten inde Portugaloische sprake, Pisce Bolador. Daer nae quamen wy inder hoochdē der linien æquinoctial, ende daer was groote hitte , want die sonne stont recht bouen ons alst opten middag was, daer en was met allen geenen wint sommighe daghen, dan inder nacht quam dicwils grooten donder en onweder met reghen ende wint, verhieuen haer lichtelijck ende verginghen oock lichtelijck, ende om dat de selue ons niet verrasschen en souden als wy te seyl waren, so moesten wy neerstelijck waken.

Maer alst nu wederom eenen vaerwint begoft te waeyen, so werdet storm weder, en dat duerde sommighe daghen, ende was ons contrarie, en forchden waert dat lange duerde, dat wy

wy ghebreckende hongher soudē moeten lij-
den. VVy riepen God aen, en baden om goe-
den wint. Het ghebeurde op eenen nacht dat
wy eenen grooten storm hadden, en wy warē
in grooter vreesen. Daer schenē ons veel blau-
we lichtē in dat schip, de welcke ick noyt meer
ghesien en hadde. Daer die barē voor int schip
floeghen, daer ginghen die lichten oock. Die
Portugaloifers seyden dat de lichten een teec-
ken des toecomenden goets weders warē son-
derlijcken van God ghesonden om indē noot
te vertroosten. VVy dancten God daer voor
met een ghemeyn ghebet. Daer na verdwij-
den sy weder, ende dese lichten heeten Santel-
mo, oft corpus sancto.

Als nu den dach aen quam werdet goet we-
der, ende quam een goeder wint, dat wy merc-
kelijck saghen dat sulcke lichter moesten een
wonderlijck werck Gods sijn. VVy seylden
door de zee met goedē wint. Den xxviii. dach
Ianuarij creghen wy eenen hoeck lants int ghe-
sicht een haue la Cape de sanct Augustin ghe-
naempt. Acht mijlen van daer quamen wy in
een hauen Brannenbucke ghe-naempt, en wy
warē 84. dagen inder zee eer wy dat lant sage.
Op de selue plaetse hadden die Portugaloifers
een vasticheyt ghemaect, Marin genaempt. De
hooftman vander seluer stercctē was geheeten
Artokoclio, en diē leuerdē wy die gheuangenē

ouer, ende loeden sommighe goede wt, die sy
daer behielden. VVy beschiecten onse dingen
inde hauen, ende wouden voort seylen, daer
wy meynden te laden.

*¶ Hoe dat die wilden vander plaetsen
Brannenbrucke waren oproerich ghe-
worden, ende den Portugaloiseren een
vasticheyt ontweldighen wouden.*

Dat III. Capittel.


HEt ghebuerde dat die wilde van dien
lande waren oproerich geworden te-
ghen die Portugaloisers, het welcke sy
voormaels niet en waren, dit was nu door die
Portugaloisers begoft, so werden wy ghebede
om Gods wil vanden Hooftmā des lants, dat
wy ons wouden setten ende varen in een lan-
deken Gerasu ghe-naempt, vijf mijlen vander
hauen Marin daer wy laghen, dwelck die wil-
de lieden onderwonden in te nemen, ende de
inwoonders vander stadt Marin en costē den
anderen niet te hulpe comen, want sy forchdē
dat haer de wilde oock oueruallen soudē.

VWy quamen die van Gerasu te hulpe met
veertich mannen van onsen schepe, en voeren
mer een cleyn scheepken derwaerts. Dat stede-
ken lach op eenen stroom der zee, die welcke
hem

hem twee mijle weechs in dat lant strecke. On-
 ser mochten ontrent XC. Christen sijn, weer-
 baer, daer by dertich Mooren ende Brasiliſche
 flauen, die welcke der inwoonders eyghē wa-
 ren. Maer die wilde lieden die ons beleighert
 hadden, werden gherekent op acht duyſent.
 VVylieden en hadden maer eenen rinck oft
 thuyſen van ſtacken ront om ons.

*Hoe dat haer ſtercke ghemaect was,
 ende hoe ſy teghen ons ſtreden.*

Dat IIII. Capittel.



OM der ſtadt oft plaetſe rōndtom daer
 wy in beleyt waren ginck een boſch
 oft wilderniſſe, daer in haddē ſy twee
 vaſticheden oft ſtercken ghemaect van dicken
 C 5 boomen,

boomen, daer in hadden sy des nachts haer
toeulucht, en oft wy tot haer wt vielen, daer
wouden sy ons verbeyden. Daer neuen had-
den sy gaten inder eerden ghemaect rondt om
der stadt oft plaetse, daer laghen sy des daechs
in, ende daer wt quamen sy des daechs schar-
mufelen met ons, en als wy na haer schoten,
vielen sy alle neder, ende meynden sy soud-
den schuet ontbucken. Sy hadden ons so vast
belegghert, dat wy noch af oft aen ghecomen
en condē. Sy quamen vast voor die stadt ende
schoten veel pijlen om hooghe, meynende sy
souden int nedervallen ons inder sterctē tref-
fen. Sy schoten ons oock pijlen daer sy cotoen
oft boomwolle ende wasch aen ghebonden
ende met vier aenghesteken hadden, en meyn-
den ons also die daecken vanden huysen daer
mede aen te steken ende te verbranden. Ende
sy dreychden ons dat sy ons eten soudē waert
sake dat sy ons ghecrijghen costen.

VVy hadden noch wat te eten, het welcke
seer lichtelijck op was ende verteyrt, want het
is daer int lant een maniere alle daghe oft ouer
den anderen dach verssche wortelen te halen,
ende meel om coecken daer af te maken. Tot
sulcken wortelen en costen wy niet gecomen.
Als wy nu saghen dat wy vīctalie ghebrecklij-
den moesten, voeren wy met twee barchen na
een stedecken Tamaraka ghenaept om vi-
ctalie

Italie te halen, so hadden die wilde liede groo
te boomen ouer dat riuierken gheleyt, en haer-
der wasser veel ouer beyden sijden des oeuers
vanden water, ende meynden ons die reyse te
beletten. VVy braken die wederom met ghe-
welt, ende het quam in dien middelen tijt dat
wy opt drooghe bleuen, ende die wilde en co-
sten ons inden schepen niet ghedoen, maer sy
werpen veel drooch houts wt haer schanssen
russchen den oeuwer en den schepen, en mey-
nden dat aen te steké, en haer peper die daer int
lant waft daer in te worpen, ende ons metten
domp en roock wten schepen te iaghen, maer
het en gheluste haer niet. In middelén tijden
quam de vloet weder, en wy voeren torten ste-
deken Tamaraka. Die inwoonders gauen ons
victalie, daer mede voeré wy wederom na dat
beleg op de voorghenoemde plaetse. Sy had-
den ons de vaert wederom op een nieuw belet,
ende hadden boomen ouer dat waterken ghe-
leyt ghelijck als te voren. Sy laghen daer by op
den oeuwer, ende sy hadden twee boomen op
een luttel na onder heel af gehouden, ende bo-
uen aen die boomen hadden sy dinghen ghe-
bonden Sippo ghenaeempt, die wassen ghelijc
hoppen haghen, maer dese Sippo haghen
sijn veel dicker. Dat eynde vanden voorghe-
noemden hoppen haghen hadden sy in haren
schanssen, en haer meyninghe was, dat sy, als
wy

wy quamen en wilden weder daer door bre-
ken, so wouden sy die Sippo trecken dat die
boomen dan voort souden breken, ende op
die schepen vallen. VVy voeren daer by, ende
braken daer door. Den eersten boom viel nae
haer schansse, die ander viel cort achter ons
schipken int water. Ende eer wy begosten die
weyre te breken, riepen wy onse ghesellen in-
den stedeken datse ons te hulpe souden comē,
ende als wy begosten te roepen, so riepen die
wilde oock, dat ons onse ghesellen inde beleg-
gheringhe niet ghehooren en conden, en sy en
costen ons niet ghesien om een bosch dat tus-
schen haer ende ons lach, anders waren wy so
na by haer, dat sy ons wel hadden cōnen hoor-
ren waert dat die wilde so niet gheroepen en
hadden. VVy brochten haer die victalie inder
stadt. Als die wilde sagen datse niet wtgerech-
ten en costen, begheerden sy peys te maken, en
trocken weder af. Die beleggheringe duerde by
na een maent tijts. Vanden wilden bleuē daer
sommighe doot, maer van onser Christenen
gheene. Als wy saghen dat haer die wilde tot
vrede begeuen hadden, trocken wy wederom
na ons schip, dwelck voor Marin lach, Daer
haelden wy water in, ende Mandioken meel
voor victalie. Die ouerste vander stadt Marin
danctē ons, ende wy voeren van daer.

¶ Hoe wy wt Brannēbucke voeren nae
 een lantschap Buttegaris ghenamt, en
 by een Franchoyls schip quamen, en met
 haer sloeghen. Dat V. Cap.



VAn daer voerē wy veertich mijlen, tot
 eender hauenen Buttagaris genaempt,
 daer meynden wy dat schip met bresi-
 lien hout te laden, ende den wilden meer vi-
 ctalien afte manghelen. Als wy daer by qua-
 men, vonden wy een schip wt Vrancrijck dat
 laeyde bresilien hout. Daer seylden wy aen,
 meynende dat te nemē, maer sy bedoruen ons
 den grooten mastboom met eenen schuete, en
 ontseylden ons. Sommighe van onsen schip-
 pers

pers werden gheschoten, ende sommighe ghewont. Daer na werden wy vanden sin wederom nae Portugal te varen, maer wy en costen niet wederom te winde waert ghecome inder hauenen daer wy meynden victalie te krijghen. Die wint was ons teghen, ende wy voeren met so luttel victalien na Portugal, lijdende grooten hongher. Die sommighe die aten bocken huyden die wy int schip hadden. Men gaf ons een yeghelijck des daechs een noot-schelp vol waters, ende een luttel Brasilische wortelen meel. VVy waren C. ende viij. dagen inder zee. Den xij. dach Augusti quamen wy in eylanden die genaempt sijn Losa Seres, die behooren den Coninck vā Portugal toe. Daer ankerden wy, rusten ende visten. Op de selue plaetse saghen wy een schip inder zee daer wy by voeren om te weten wat voor een schip was, en dat was een zeeroouer. Hy stelde hem te weyre nochtans creghen wy die ouerhant, ende namen henliedē dat schip, sy ontuoeren ons met eenen boot na die eylandē. Dat schip hadde veel wijn en broots, daer mede wy ons vermaecten. Daer na quamen wy by vijfschepen die den Coninck van Portugal toe hoorden, die soudē by de eylanden wachten op die schepen die wt Indien soudē comen om die in Portugal te gheleyden, daer bleuen wy by, en hielpen een Indisch schip, dwelck daer
aen

aen quā, gheleyden in een eylant Tercera ghe-
naempt, en daer bleuen wy. Daer waren in dat
eylant veel schepē vergadert, die welcke alle wt
die nieuwen landen gecomen waren, waer af
die sommighe wilden na Spaengien varen,
ende die sommige wilden na Portugal varen.
VVy voeren wt Tercera by na hondert sche-
pen in een gheselschap, ende wy quamen te
Lissebona aen ontrent den achtsten dach
van October, inden iare des Heeren als men
screef M.CCCCC. ende achtenveertich. VVy
waren seshien maenden lanck op die reyse
gheweest. Daer na soe ruste ick my een goede
wijle tijts lanck te Lissebona, ende daer werde
ick vanden sin dat ick metten Spaengiaerden
inde nieuwen lande varen soude, die welcke
syinghenomen hebben, en voer daerom met
een Enghelsch schip in Castilien, by een stadt
Porta sancta Maria genaempt, ende daer wou-
den sy dat schip met wijn laden. Van daer so
reysde ick na een stadt Ciuilien ghe-naempt, en
daer vandt ick dry schepen die werden toe ghe-
rust, ende wouden na een lantschap Rio de
Platta ghe-naempt varen, het welcke gheleghen
is in America. Dat selue lantschap ende dat
goutrijcke lant Pirou ghe-naempt, het welcke
voor sommighe iaren gheuonden is worden,
ende Brasilien, is al te samen een seer vet lant.
Dat selue lant voort in te nemen, waren voor
som-

sommige iaren schepen derwaerts geschickt, en van dien was een weder comen, en begheerdē meer hulpen, seyde veel hoe goutrijcke dat het lant was. Die hooftman vanden drye schepen was ghenaeamt Don Diego de Senabrie, die soude van weghen des Conincx een ouerste sijn in dat lantschap. Ick begaf my in een vanden schepen, ende sy werden seer wel gherust. VVy voeren van Ciuilien na sint Lucas, daer die Ciuilische riniere inde zee gaet. Aldaer laghen wy ende wachten op goeden wint.

*¶ Vtuaringe mijnder tweeder schip-
uaert van Ciuilien wt Spaengien in
Americam. Cap. VI.*

IN den Iare ons Heeren 1549. den vierden dach na Paesschen seylden wy vā sint Lucas, en de wint was ons teghen, wy namen te Lisbona hauene. Als die wint goet wert, voeren wy na dat eylant van Cannarien, ende anckerden by een eylant Pallania ghenaeamt. Daer namen wy wat wijns int schip voor die reyse. Oock so werden die stuerlieden vanden schepen daereens, als sy inder zee vanden anderen scheiden, waer sy int lant wederom by malcanderen comen fouden, namelijk in 28. graden opter Suydt-sijden, der linien æquinoctiael.

Van

Van Palma voeren wy nae Cape virde, dat
is dat groen hoot, het welck leyt indē swerten
mooren lant, ende op die selue plaetse hadden
wy bycans eenē schipbrueck geleden. Vā daer
voeren wy met onser Cossz, en den wint was
ons teghen, ende sloech ons somtijts op dat
lant Gene, int welcke oock swerte mooren
woonen. Daer na quamen wy in een eylant
gheheeren sanct Thome, ende dat hoort den
Coninc van Portugal toe, ende is een suycker-
rijck lant, maer seer onghesont, Daer woonen
Portugaloisers in, ende die hebbē veel swerte
mooren dat haer eyghen lieden sijn. VVy na-
men versch water in dat eylant, ende seylden
voort aen. VVy hadden onse twee mede ghe-
sellen schepen in eenen stormwint des nachts
wt den ghesichte verloren, also dat wy alleen
seylden, want de winden waren ons seer tegē,
ende sy hebben die natuer inder zee, dat als de
sonne op gaet op die noordtsijde der linien
æquinoctiael, so waeyen die winden van suy-
den herwaert. Diesghelijcken als die sonne op
der suydtsijden gaet, comen sy vander noordt
sijden. Sy hebben oock die natuere datse vijf
maent hardt wt eenderley gewest waeyen, en
hinderden ons also vier maent dat wy onsen
rechten Cossz niet seylen en mochten. Als die
maent Septēber aen quam, begosten die win-
den noordelijck te waeyen. VVy setten onsen
D Cossz

Coffz oft streeck Zuydt zuydt west na America toe.

¶ Hoe wy inder hoochden van 28. gradus by dē lande America quamē, en die hauen niet bekenen en condē daer wy in bescheyden waren, en hoe eenen grooten storm hem by den lande verbief.

Dat VII. Capittel.



DAernaē op eenen dach welck was den xvij. van Nouember, nam de stierman die hoochde der sonnen, ende beuātse op de 28. gradus. Daer sochten wy dat lant ten westen

westen aen af. Daer na op den xxiiij. dach dat
voorseyder maent saghē wy lant. VVy waren
ses maenden inder zee gheeweest, ende stondē
dicwils in grooter vreesen. Als wy nu hardt by
den lande quamen, en kenden wy die hauene
ende merckinghe niet die welcke ons die op-
perste stierman ghegheuen hadde, en en dorf-
tent oock niet wel wagē om ons in onbekēde
hauene te geuē, laueerden aldus lancx den lan-
de henen, ende het begoft seer te waeyen, also
dat wy anders niet en meyndē wy en soudē
op die clippen verdroncken hebben, ende het
schip verloren hebben. VVy bonden ledighe
vaten te samen, ende dedē buscruyt daer in, en
stopten die bommen toe, en bonden ons ghe-
weyr daer op, op auōtuere oft wyschipbrekin-
ge leden, en sommighe daer af quamē, die sou-
den haergheweyr dan aent lant vinden, want
die baren soudē die vaten aen dat lant wor-
pen. Aldus laueerden wy, meynende wy sou-
den vanden lande wederom af varē, maer tē
halp niet, want dē wint dreef ons op die clip-
pen die daer int water verborghen laghen on-
trent vier vademen waters diep, en aldus moe-
sten wy door die groote baren opt lant varen,
meynende niet anders dan dat wy alle gader
daer bliuen moesten ende verdrinckē, noch-
tans schietet God als wy hardt by den clippen
quamen dat een van onsen ghelēllen een ha-

uene ghewaer wert, ende daer voerē wy inne.
Op die selue plaetse sagē wy een cleyn ſcheep-
ken, dat vluchte van ons, ende voer achter een
eylant, alſo dat wy dat niet en ſaghen, ende en
coſten niet wetē wat dat voor een ſchip was,
want wy en volchdens niet voordr nae, maer
lieten onſen ancker te gronde, dankende ende
louende God dat hy ons wt die ellende ghe-
holpen hadde. VVy ruſten en droochden on-
ſe gereeſchap, ende het was wel twee vren na
noen als wy den ancker te gronde lieten. Te-
ghen den auont quam eenen grooten naecker
vol wilder lieden by dat ſchip, ende wouden
met ons ſpreken, maer niemant vā ons en coſt
die ſprake wel verſtaen. VVy gauen haer ſom-
mighe meſſen ende anghelhaecken, ende doen
voerē ſy weder wech. Dien ſeluē nacht quam
noch een naecker vol, en daer waren twee Por-
tugaloifers onder, die vraechden ons vā waer
wy waren. Doen ſeyden wy, wy waren wt
ſpaengien. Doen meynden ſy, wy moeſten ee-
nen bekenden ſtierman hebben, dat wy ſo in-
der hauenē ghecomen waren, want ſy waren
inder hauenē bekend, maer met ſulcken ſtorm-
weder alſo wy daer in gecomen waren en wi-
ſten ſy daer niet in te comen. Doen ſeyden wy
haer alle gheleghentheyt, en hoe dat ons den
wint ende die baren tot eenē ſchipbrueck had-
de willen brenghē, alſo dat wy niet anders en
meyn-

meyndén dan dat wy daer ghebleuen souden hebben, ende dat wy die hauene onuerfienlic ghewaer geworden waren, ende dat ons God also daer in gheholpen hadde sonder hope, en van schipbrekinghe verlost, ende dat wy oock niet en wisten waer dat wy waré. Als sy sulcx hoorden verwonderdē sy haer, ende dancten God, ende seyden, die hauene daer wy in waren hiet Supraway, en wy waren ontrēt xxij. mijlen weechs van een eylant dat heet Sancte Vincente, ende hoort den Coninck van Portugal toe, ende daer woonden sy, ende die sy metten cleynen schipken ghesien hadden waren daerom gheuloden om datse ghemeynt hadden wy waren Françoysen geweest. Oock vraechden wy hoe verre dat eylant Sancte Catharine van daer was, want wy wouden derwaerts, so seyden sy, het mochtē ontrent xxx. mijlen sijn na den Suyden, ende daer was een natie van wilden die heeten Carios, en dat wy wel voor ons sien souden. Ende sy seyden: die wilde des teghenwoordighen hauens heeten die Tuppin Ikins, ende dat waren haer vrienden, daer vooren dorften wy niet sorghen.

VVy vraechden haer in wat hoochden der sonnen dat het selue lant lach, sy seyden in 28. gradus, also dat oock waer is. Oock gauen sy ons ghelijckenisse waer by wy dat lant bekenen souden, &c.

¶ Hoe wy wederom wt die hauene voeren om dat lant te soecken daer wy be-
nen wouden.

Dat VIII Capittel.

ALs hem nu die wint wten oost oft suyd
oosten ghestilt hadde, werdet goet we-
der, ende die wint waeyde wten noord
oosten, ende doen gingen wy te zeyle, en voe-
ren weder achterwaerts na dat voorgenoem-
de deel lants. VVy seylden twee daghen lanck
soeckende die hauene, en wy en costense niet
ghekennen, maer wy merctē nochtans wel by
dat lant dat wy by der hauenē ouer ghezeylt
hadden, want die sonne was so verdōckert dat
wyse niet krijghen en costen, en wy en costen
niet wederō achterwaerts om des wints wil-
le, want die wint verstack ons. Maer God is
een noot helper. Als wy des auonts ons gebet
hielden, baden wy God om genade, ende het
gheschiede eer die nacht quam, dat haer droe-
ue wolcken op hieuen na den Zuyden, der-
waerts dat ons die wint verstack. Eer wy ons
ghebet voleyndt hadden, wert den noordoo-
sten wint stille, ende en waeyde niet datment
mercken coste. Daer nae hief hem den Suyden
wint op (die doch in dien tijt des iaers niet
veel en plach te regneren) en waeyde met eenē
fulcken

fulcken dōder ende blixem, datmen hem ver-
srickē mochte, ende die zee was heel ontfelt,
want den Suyden wint teghen des Noorden
wints baren waeyde. Het was oock so don-
ker datmen niet sien en coste, ende dē grooten
blixem ende donder maecte dat volck also ver-
saecht, dat niemant en wiste waer hy beghin-
nen soude het seyl te keeren : oock en meynde
wy niet anders dan wy en moestē dien nacht
alle ghelijck verdrinckē. Ten lesten so gaf God
nochtans dat hem dat weder veranderde ende
beterde, ende aldus seyldē wy derwaerts daer
wy des daechs af comen waren, ende sochten
die hauene wederom op een nieu, maer wy
en costense noch niet ghekennen, midts dat
daer veel eylandden by den vasten lande wa-
ren. Als wy nu weder in xxviij.gradus qua-
men, seyde die hooftmā totten Pilot, dat wy
achter een vāden eylanden varen soudē, ende
eenen anckerte gronde soudē laten, om te be-
sien ende te weten wat het doch voor een lant
ware. Daer voeren wy doen henen, ende voe-
ren tusschen twee landen inne, ende in die sel-
ue plaetse was een schoon hauene. Daer lieten
wy doen den ancker te gronde gaen, ende also
werden wy vāden sinne dat wy metten boot
wt varen soudē om na die hauene te vraghē,
ende te weten wat dat voor een lant was daer
wy doen in waren.

¶ Hoe dat onser sommighe mettē boot
voeren om die hauene te besien, en von
den een Crucifix op eender clippen staē.

Dat IX. Capittel.



ENde het was op sinte Catharijnen dach
inden iare M. CCCCC. en xlix. als wy
den ancker te grōde lieten. Ende op den
seluen dach voeren onser sommighe wel ghe-
rust om de hauene voorder te beloecken met-
tē boot, endelieten ons duncken het moeste
een riuierē sijn diemen heet Rio de santo Fran-
cisco, want die leyt oock inder seluer Prouin-
cien: maer hoe wy voorder daer in voeren, hoe
die riuierē langher was. En wy saghen rond-
om

om, herwaerts ende derwaerts, oft wy oock
eenighen roock sien costen, maer wy en sagen
gheen. Doen docht ons wy saghen hutten
vooreen wildernisse in een valleje, en voeren
daer by, doen warent oude hutten, en en ver-
namen gheen lieden daer in, ende voeré voort
aen, so dat auont wert: En daer lach een cleyn
eylant voor ons inde riuiere, daer voeren wy
aen om dien nacht daer te bliuen, ende hoep-
ten het beste te verwachten. Als wy by dat ey-
lant quamen doen waft nacht, ende en dorf-
tens niet wel auentueren dat wy hadden aen
dat lant ghegaen om dien nacht daer te rusten,
niet te min ginghen onser sommige rondtom
dat eylant, om te besien oft oock yemant daer
in gheweest hade, maer wy en vernamen daer
niemant. VVy maecten vier, ende hiewen eenē
palmboom af, en aten die keernen daer af, daer
mede onderhielden wy ons dien nacht. Des
morgens voeré wy voort ten lande waert
in, want onse meyninghe was heel dat wy we-
ten wouden oft daer oock lieden waren, wāt
om dat wy die oude hutten ghesien hadden,
lieten wy ons duncken datter voortijts lieden
int lant moesten gheweest sijn. Als wy nu also
voort voeren, saghen wy van verre een hout
op eender clippen staen, dat schein ghelijc als
een cruys, also dat sommighe dachten wie dat
daer ghebracht mocht hebben. VVy voeren

daer by, en̄ doen wast een groot houtē cruys,
met steenen vasticheyt opter clippen vast ghe-
maect, ende een stuck bodems van eenen va-
te was daer aen ghebonden, ende inden bo-
dem waren letteren ghesteken oft ghesneden,
maer wy en costens niet wel ghelesen, ende
wy verwonderden ons wat dat voor schepen
mochten gheweest sijn die sulcx daer op ghe-
recht hadden, want wy en wisten niet dat dit
die hauene was daer wy ons versamē souden.
Daer na voerē wy weder voortā innewaert
vā het cruys om noch voorder lant te soeckē.
Den boden namen wy met ons, ende als wy
nv voort voeren, so sat daer een neder, ende las
die letteren op den vat bodem, en̄ begostē te
verstaen. Daer was op gesneden in Spaensche
sprake aldus, SI REHV POR VENTVRA
ECKY LA ARMADA DE SV MAIES-
TET. TIREN VN TIRE AI AVERAN
RECADO. Dat is in Duytsche aldus gheseyt:
Oft hier by auontueren sijnder majesteit sche-
pen quamen, die schieten een stuck gheschuts
af, so sullen sy breeder bescheet krijghen. Ende
aldus voeren wy snellijcken wederom by dat
cruys, ende schoten een cleyn valckenet af, en̄
begostē doen wederom voort te lande waert
in te varen. Als wy also voeren, saghen wy vijf
naeckers vol wilder lieden, die stracx na ons
quamen gheroeyet, ende daerom hadden wy
ons

ons gheschut al bereyt ghemaect. Als sy nu na
by ons quamen, sagen wy eenen mensche die
cleederen aen hadde, ende eenen baert hadde,
dese stont voor in den naecker, ende wy ken-
den daer aen dat hy een kersten was. Doen
riepen wy dat hy stil houden soude, ende met
eenen naecker by ons comen soude om sprake
te houden. Als hy nu aldus nae by ons quam,
so vraechden wy hem in wat lantschap dat wy
waren. Doen seyde hy: Ghy sijt inder hauene
Schirmerein ghenaeamt, ende heet also op der
wilden luyden sprake, ende seyde, op dat ghijt
beter verstaen moecht, so heetet sinte Kather-
rijnen hauene, welcken naem hem ghegheuen
is vanden ghenen diese eerst gheuonden heb-
ben. Doen verblijdden wy ons, want dat was
die hauene die wy sochten, wy waren daer in
ende wy en wistens niet, ende wy quamen op
sinte Catharijnen dach in der seluer hauenen.
Hier hoort ghy hoe God den genen helpt die
in nooden sijn, en hem neerstelijc aenroepen.
Daer na vraechde hy ons van waer dat wy wa-
ren. Doen seyden wy hem, dat wy van des Co-
nincx schepen waren va Spaengien, ende sou-
den na Rio di Platta varen. Oock waren daer
noch meer schepen opte reyse, ende wy hopen
(ist dat God belieft,) sy sullen oochaeft come,
ende op die selue plaetse souden wy ons ver-
saemlen. Doen seyde hy datter hem seer wel be-
haech-

haechde ende danste God, maer hy was voor
drye iaer (wt die Prouincie Rio di Platta vāder
stadt diemen heet la Soncion, die welcke die
Spaengiaerden in hebben) afgesondē aen der
zee, dwelck is CCC. mijlē weechs dat hy sou-
de die natie diemen heet Carios die de Spaen-
giaerden te vriende hebbē daer in houden dat
sy wortelen planten die Mandioka heeten, op
dat die schepen daer wederomme mochten
by den wilden lieden victalie krijghen, waert
dat sy ghebreck hadden, dwelck die hooftmā
also bestelde, en de nieuwe tijdinghe in Spaen
gien ghebracht hadde, met name geheeten Ca-
piteyn Salafer, die oock metten anderen sche-
pen weder quam. VVy voeren met henlieden
binnen inder hutten daer hy onder die wilde
woonde, ende deden ons redelijck na haer ma-
niere ende wijze.

*Hoe ick ghesonden wert met eenen
naecker vol wilder lieden tot ons groot
schip. Dat X. Capittel.*

DAerna badt onse Capitain dē man die
wy onder den wilden vonden dat hy
eenen naecker met volck bestelde, die
souden een van ons by dat groot schip voerē,
op dat het oock daer by henlieden soude co-
men. Daer schickte my die Capiteyn mettē wil-
den

den lieden na den schepe, ende wy waren dry
nachten wt gheweest, dat die vanden schepe
niet en wisten hoe dat met ons was oft stont.
Als ick nv metten naecker op eenē bogeschuet
weechs na by den schepe quam, maectē sy een
groot gheschrey, ende stelden haer ter weyre,
ende en wouden niet dat ick metten naecker
naerder quam, maer sy riepen my toe, hoē dat
toe ginck, ende waer dat dat ander volck bleef,
en hoe ick also metten naecker vol wilder lie-
den quam, maer ick sweech stille en en gaf hen
lieden gheen antwoorde: want die Capiteyn
hadde my beuolen dat ick my truerich ghelatē
soude, om te merckē wat die so noch int schip
waren doen wouden. Als ick haer nv niet en
antwoorde, riepen sy onder malcanderen, het
en is niet recht metter faken, die ander moeten
doot sijn, ende sy comē met desen eenen, heb-
bende mogelijck noch meer volcx achter om
ons schip in te nemen, ende wouden schieten,
maer doch riepen sy my noch eens aen, ende
doen begoft ick te lachen, seggende sijt te vre-
den, goede nieuwe tijdinghe, laet my naerder
comen, so sal ick v alle dinghē berechten. Daer
na seyde ick haer hoe dat metter faken stōt, des
verblijdden sy haer seer, ende de wilde voeren
met harē naecker wederom na huys, ende wy
quamen metten grootē schepen heel na by der
wildē wooninghe, ende daer lietē wy eenen

ancker te grōde: laghen daer ende wachten op die ander ſchepē die haer door dē ſtormwint van ons verloren hadden die noch comen ſouden, endedat dorp daer die wilde waren heet Acutria, ende die man die wy daer vōden heet Iohan Ferdinando, ende was een Boſſchaeyer vander ſtadt Bilbau, ende die wilden die daer waren heeten Carios, deſe brachten ons veel wilts vleech ende viſch, daer voorgauen wy haer henghelhaken.

¶ Hoe dat ander ſchip van onſen gheſelſchap aen quam dat hem inder zee van ons verloren hadde daer den ouerſten ſtierman in was.

Dat XI. Capittel.

ALs wy ontrent drye weken op de ſelue plaetſe geweest wāren quam dat ſchip daer de opperſte ſtierman in was, maer dat derde ſchip was verdroncken, wāt wy en vernamen niet meer daer af. VVy ruſten ons toe om voort te varen, ende wy hadden victalie vergadert voor ſes maenden, want wy hadden noch CCC. mijlen te water te varen. Als wy alle dinghen ghereet hadden ghemaect, ſo verloren wy op eenen dach dat groote ſchip inder hauenē, ſo dat de reyse alſo belet wert.

VVy

VVy lagen daer inder wildernissen in grooter vreesen ende leden grooten hongher, ende moesten haechdissen ende veltratten eten, ende andere wonderlijcke ghedierten meer die wy crijghen conden: oock aten wy water slocken die aen den steenen hanghen, en dierghelijcke meer seltfame ende wonderlijcke spijsse. Die wilde die ons eerstmael victalien genoegh toe brochten, als sy waeren ghenoech van ons hadden, so ontouch ons den meestē hoop op ander plaetsen, ende wy en dorsten haer doen oock niet wel betrouwen, also dattet ons verdroot daer langher te blijuen ligghen ende te vergaen. Aldus werden wy daerom met malcanderen eens dat den meesten hoop ouer lāt soude treckē na die Prouincie de Soncion ghe naempt wort, het welck noch CCC. mijlen van daer was. Die ander soudē metten ouerghebleuenen schepe derwaerts comen. Aldus behielt die Capiteyn onser sommige by hem, die met hem soudē ouer dwater varen. Die ghene die ouer lant toghen, namē victalie met haer, om daer mede door de wildernisse te trecken, leydende sommighe wilden met haer, en toghen henen, maer haer der vele storuen van hongher. Die ouerghebleuene quamen totter stadt, also wy namaels beuonden. Ons anderē was dat schip oock noch veel te cleyne om ouer die zee te varen.

¶ Hoe wy van rade werden en voeren
na sinte Vincent daer die Portugaloi-
fers dat lant in hebben, ende meynden
noch een schip te beurachten van hen-
lieden, ende daer mede onse reyse te eyn-
den, leden door grooten storm vander
zee, schipbrekinghe, ende en wistē niet
hoe verre dat wy vā sint Vincēt warē.

Dat XII Capittel.

NV hebben die Portugaloisers een ey-
lant hardt by den vasten lande inghe-
nomen dat heet sancte Vincēte, inder
wilden sprake Urbioneme. De selue Prouincie
leyt ontrent LXX. mijlen vāder plaetsen daer
wy waren. Onse meyninghe was derwaerts te
varen, ende te besien oft wy costen vā den Por-
tugaloisers een schip te beurachten crijghē om
in Rio de Platta te varen, want dat schip dat
wy noch hadden was ons allen om daer in te
varen veel te cleyn. Om dat te vorderen voerē
onser sommighe metten capiteyn Salasfer ghe-
naempt na dat eylant sancte Vincente, en on-
fergheen en hadde daer meer geweest dan een
de Roman hiet, ende die liet hem duncken
dat hy dat lant wel weder om vinden soude.

- VVy seylde wter hauenen Inbiaffape ghe-
naempt, de welcke leyt xxxiiij. gradus ende een
half Suydtwaert æquinoctiael, ende quamen
ontrent twee daghen na onser wtuaert by een
eylant ghe-naempt Insula de Alkatrafes, ontrēt
xl. mijlen van daer wy wt gheuaren waren, en
daer wert ons den wint alsoe teghen, dat wy
daer by moesten ankeren. In dat selue eylant
waren seer veel voghelen diemen Alkatrafes
heet, ende die sijn lichtelijck te vangen, so waft
nu oock den tijt dat sy broeyden ende ionghe
opbrochten. Daer ginghen wy aent lant, ende
sochten soet water in dat eylant, ende vonden
daer oude hutten, ende der wilden lieden pot
scheruen, die in voorgaende tijden in dat eylant
ghewoont hadden, en vonden oock een cleyn
waterken op een clippe. Daer sloeghen wy vā
den voghelen veel doot, ende namen oock vā
haer eyeren met ons int schip, ende koeften de
voghelen ende eyeren om te eten. Als wy nu
gheten hadden, verhieft hem eenen grooten
stormwint vāden Suyden, dat wy nauwelijck
den ancker behouden en costen, also dat wy
sorchden dat ons de wint op een clippe doen
slaen soude. Dit selue was teghen auont, ende
wy meynde noch in een hauene te comen die
Caninee gheheeten was, maer eer wy daer by
quamē waft nacht, ende en costen niet daer in
comen, maer wy voeren af vanden lande met

E grooter

grooter vreesen, ende meynden oock niet anders, die baren soudē dat schip ontfucken slaen, wāt het was aen eenen hoeck lants, daer altoos die baren grooter sijn dan midden int diepte vander zee, ende verre vanden lande. Ende wy waren dien nacht so verre vanden lande comen, dat wy des morghens dat niet sien en costen, niet te min nae lange varen creghen wy dat lant weder int ghesicht, maer den storm was so groot dat wy ons nauwelijc langher onthouden en costen. Die selue die meer in dat lant gheweest hadde, liet hem duncken doen hy dat lant sach, dat het sancte Vincente was, ende voeren daer recht toe. Daer wert dat lant also met neuel ende wolcken bedect, datment niet wel kennen en cost. VVy moesten doen al wat swaer was inde zee worpen ende dat schip lichter maken, om de groote baren wil. Also waren wy in grooter sorghen, ende voeren voort, meynende die hauene te treffen daer die Portugaloisers woonē, maer wy faelgeerden. Als nu die wolcken een weynich opbraken datmen dat lant sien coste, so seyde die Roman, hy liet hem duncken die hauene was voor ons, dat wy recht na een clippe varē soudē, wāt die hauene lach daer achter, aldus voeren wy daer by: maer doen wy vast daer by quamen, en saghe wy niet dan den doot voor ooghen, want het en was die hauene niet, en moesten

moesten recht opt lant varen ende schipbre-
kinghe lijden om des wints wille: die baren
floeghen teghen dat lant datmen hem grou-
welen mocht. Doen baden wy God om ghe-
nade, ende hulpe voor onse sielen, ende deden
als schipwarende lieden toebehoort, die schip-
brekinge lijden moeten. Als wy nu so na qua-
men daer die baren aent lant floeghen, voeren
wy so hooghe op die baren henē, dat wy steyl
nederwaerts af saghen, als oft wy van eenen
muer ghesien hadden. Met den eersten stoot
die dat schip aent lant dede ginghet van mal-
canderen. Doen spronghē sommighe daer wt,
en swommen aent lant, onser sommighe qua-
men op de stuckē telande, ende also halp ons
God alle leuendich aen lant, ende het regende
en waeyde so seer, dat wy heel vercout waren.

*Hoe wy ghe waer werden in wat lant
schap der wilden lieden wy warē, daer
wy den schipbrueck gheleden hadden.*

Dat XIII Capittel.

ALs wy nu aen lant comen waren, danc-
ten wy God dat hy ons leuendich had
de telande laten comen, warē oock niet
te min bedroeft, om dat wy niet en wistē waer
wy sijn mochtē, ter wijlen die Roman dat lant
niet recht en kēde, oft wy verre oft by dat eylāt



sancte Vincente waren, en oft daer oock wilde
 lieden woōden daer wy schade af lijdē moch-
 ten, so liep een van onsen mede ghesellen (met
 name Claudio, ende was een Françoys) lanx
 den oever henen, op dat hy hem verwermen
 mohte, ende sach een dorp achter den bossche
 ligghen, daerin die huysen gemaect waren op
 der Christen maniere, en hy ginck daer henen:
 doen sach hy dat een dorp was, en datter Por-
 tugalosiers in woonen, ende heet met name
 Itenghe Ehm, ende is twee mijlen van sancte
 Vincente. Doen seyde hy henliedē dat wy had-
 den eenen schipbrueck gheleden, ende dat het
 volck seer veruroesen was, ende en wisten ooc
 niet waer wy henen souden. Als sy dat hoor-
 den quamen sy wtgheloopen, en namen ons
 met

met haer in haer huysen, ende cleedden ons.
Aldus bleuen wy daer sommighe daghen tot
dat wy weder tot ons seluen quamen. Vā daer
reysden wy ouer lant nā sancte Vincente, daer
deden ons die Portugaloisers alle eere aen, en
gauen ons een tijt lanck den cost. Daer na be-
gost een yghelijck wat te doen daer hy hem
op onthielt. Als wy daer doen saghen dat wy
alle onse schepen verlorē hadden, so schiēte die
hooftman een Portugaloisers schip na ons an-
der volck, dwelck noch achter bleuen was in
Byasape, om die seluē oock derwaert te bren-
ghen, dwelck oock also gheschiede.

¶ Hoe Sancte Vincent ghelegghen is.

Dat XIII. Capittel.

Sancte Vincente is een eylant, ende leet
vast byden vasten lande, daer in sijn twee
stedekens, een inder Portugaloisers spra-
ke ghenaeemt Sancte Vincēte, maer inder wil-
den sprake heetet Orbioneme, dat ander is on-
trent anderhalf mijle vā daer, en heet Ywawa-
supe, nv ligghen daer noch sommighe huysen
inden eylanden die heeten Ingenio, inde selue
maectmen suycker. Ende de Portugaloisers die
daer wonen hebben een natie van Brasilianē
se vriende, die de Tuppin Ikin heeten, en dier
natie lant streckt hem lxxx. mijlen weechs
lancx dat lant inne, ende lancx der zee ontrent

xl. mijlen. Ende dese Natie hebben op beyde
sijden vyanden, na der Suydtsijden ende oock
na der Noordtsijden, hare vyāden opte Suydt
sijde heeten Carios, ende die vyanden op der
Noordtsijden heeten die Tuppim Imba: oock
wordē sy van haer vyāden Tawaijar geheetē,
dat is vyandē te segghen. Die selue hebben den
Portugaloifers veel schaden ghedaen, en̄ moe-
ten haer noch op deser tijt voor haer wachtē.

*¶ Hoe die plaetse heet vā daer haer die
meeste vernolghinghe vanden vyandē
gheschiet, ende hoe datse ghelegghen is.*

Dat XV. Capittel.

DAer leyt eenen hoeck lants, vijf mijlen
vā sinte Vincente dat heet Brikioka: op
dese plaetse comen haer vyanden die
wilde lieden neerstelijck aen, en̄ varen tusschē
een eylant dat S. Maro heet en̄ den vastē lande
door. Om dese vaert te benemen, stelden haer
sommige Māmeloecken dat gebroeders warē,
en̄ haer vader was een Portugaloiser, ende haer
moeder was eē Brasiliſche vrouwe: dese warē
Christenen, gheschiē en̄ veruaren beyde inder
Christen ende inder wilden aanslagghen ende
spraken. Die oudtste hiet Iohan de Praga, die
ander Diego de Praga, de derde Domingus de
Praga, die vierde Francisco de Praga, die vijfde

An-

Andreas de Praga, ende haer vader hiet Diago
de Praga. Dese vijf ghebroeders hadden voor
haer ghenomen ontrent voor twee iaer eerick
daer quam, met noch ander wilde lieden dat
haer vrienden warē, dat sy daer een vasticheyt
maken souden teghen die vyāden, op der wil-
derlieden maniere, dwelc sy oock gedaen had-
den. Daerom waren oock sommighe Portuga-
loisers tot haer ghetoghē om daer te woonen,
aenghesien dat het een sijn lant was, ende dat
selue hadden hare vyāden bespiet die Tuppin
Inba, ende hadden haer in haren lande daer op
toegherust, dwelck ontrent xxv. mijlen van
daer beghint, ende waren op eenen nacht daer
aen comen met lxx. naeckers oft schuyten, en
hadden se ghelijck haer maniere is, in eender
vren voor den daghe aengheuallen, ende die
Mammeloecken tāmē metten Portugaloisers
waren in een huys ghelooopen, dwelck sy van
cerden gemaect haddē, en haer daer geweyrt.
Die ander wilde liedē hebben haer in haer hut-
ten by een gehoudē, en haer also lāge geweyrt
als si costen, so datter veel vā haer vyāden doot
bleuen, maer ten lesten cregen die vyanden die
ouerhant, en hebbē die stadt Brikioka aengeste-
ken, en alle die wilde geuāgen, maer den Chri-
stenen welcke ontrent acht mochten geweest
sijn, en den Māmeloecken en haddē si niet doe-
connē inden huysē, wāt God wilde se bewarē.

Maer de ander wilde die sy gheuangē hadden,
hebben sy terstont van malcanderen ghesne-
den ende ghedeylt, ende sijn daer na wederom
in haer lantschap ghetrocken.

*¶ Hoe die Portugaloisers Brikioka we-
derom opgerecht hebben, ende daer nae
een bolwerck in dat eyland sanct Maro
maecten. Dat XVI. Capittel.*

DAer na dochtet den ouersten ende der
ghemeynten goet sijn datmen den sel-
uen hoeck niet en verliete, maer datmē
daer in bouwē soude op het stercke, wāt men
van daer dat gantsche lant beschermen conde,
alsulcx hebben sy oock begoft en volbrocht.
Als die vianden sulcx mercken oft gewaer wer-
den, dat die stercke Brikioka haer te sterck was,
voeren sy des nachts euen wel voor die stercke
ouer, ende namen voor haren buet alle die sy
crijghen costen rontom sancte Vincente, ende
want die so binnen int lant woonden meyn-
den dat sy gheen nooten hadden, midts dat
die stercke daer teghen opgherecht was en vast
ghemaect: so leden sy daer ouer schade. Daer
nae dachten die inwoonders dat sy noch een
huys oft stercke maken soudē, vast op het wa-
ter, int eyland sanct Maro, dwelck recht teghen
Brikioka ouer lach, ende dat sy daer in geschut
ende

ende volck legghen souden, om alfulcke vaert
den wilden te beletten. Aldus hadden sy nu
een bolwerck in dat eylant begoft, maer niet
voleynt, ende dat om alfulcker oorsaken wille
ghelijck sy my berechten, dat haer op dat pas
gheen Portugaloise buffchieters daer in auon-
tueren en wouden. Ick was daer om dat ick dē
hoeck des lants besien soude. Als die inwoon-
ders hoorden dat ick een Duytsch was, en dat
ick my wat op gheschut verstont, begheerden
sy vā my oft ick woude in dat huys in dat ey-
lant sijn, ende daer die vyanden helpen wach-
ten, sy souden my ghesellen beschicken, en een
goede besoldinghe gheue. Oock seyden sy my
waert dat ick dede, ick soudet vanden Coninck
ghenieten: want de Coninck plach sonderlijc-
ken dien, die in sulcke nieuwe landē raet ende
hulpe gauen, haer een genadich heer te wesen.
Ick werdes met haerlieden eens, dat ick vier
maenden lanck in dat huys dienen soude, en
daer nae soude een ouerste van des Conincx
weghen daer comen met schepen, en daer een
steen blochuys in maken, dwelck dan ster-
cker sijn soude, also dat oock gheschiede. Den
meesten tijt was ick int blockhuys met mijn
derde, en hadde een luttel gheschuts by my. Ick
was in grooter vreesen om der wilden wille,
want dat huys en was niet sterck, en wy moe-
sten daerom oock vlijtelyc wacht houden, op

dat die wilde niet heymelijc inder nacht voor
by varē en soudē, wāt sy dat somtijts verſoch-
ten, niet te min God halp ons dat wy haerder
ghewaer werden inder wacht. Nae ſommighe
maenden quam die ouerſte van des Conincx
weghen, want die ghemeynthe hadde den Co-
ninck geſcreuen wat grootē hoochmoet haet
die vyanden aen dien hoeck des lants deden,
ende hoe ſchoonē lant dat was, ende daerom
oock niet profijteliicken ware datmen dat sou-
de verlaten. Om dan dat te verbeteteren quam
die ouerſte Thomas Suſſa ghenaeſt, en be-
ſach den hoeck lants ende die ſtede die de ghe-
meynte geerne vaſt ghemaect hadde. Daer ſey-
de hem die ghemeynthe vanden dienſte die ick
haer ghedaen hadde, ende hoe ick my daer in
dat huys begheuen hadde, daer doch anders
gheen Portugaloiſer in en woude ſijn, ouer-
midts dat het qualijck vaſt ghemaect was. Dat
ſelue behaechde hem ſeer wel, ende ſeyde, hy
ſoude mijn ſake den Coninck vertellen, als
hem God weder in Portugal hielpe, ende ick
ſoude des ghenieten. Mijnē tijt die ick derghe-
meynten hadde toe gheſeyt te dienen was wt,
namelijck vier maent, ende ick begheerde oor-
lof. Maer die ouerſte tſamen metter ghemeyn-
ten begheerden dat ick noch eenen tijt lanck
in dien dienſt bliuen ſoude. Daer op ick met
henlieden eens wert noch twee iaer te dienen,
ende

ende als dien tijt om waer, soudemen my son
der eenich hinderen metten eersten schepen
daer ick in comé cost, laté na Portugal zeylen,
ende daer soude my mijnen dienst vergouden
worden. Daer op gaf my die ouerste van des
Conincx weghen mijn Priuilegien, so dat die
maniere is tegheuen des Conincx buffchieters
die dat begheren. Sy maecten dat steenen bol-
werck, ende leyden daer sommige stucken ghe-
schuts in. My wert beuolen goede wacht ende
toefien daer in te hebben.

*Hoe en wt wat oorsaken wy die vyanden
op den eenen tijt vanden iare meer
dan opten anderen verwachten moestē.*

Dat XVII. Capittel.

MAer wy moesten ons op twee tijden
inden iare meer wachten, dan anders,
namelijcken als sy hare vyanden met
ghewelt dachten te nemen: Ende dese twee
tijden sijn dese. Deen is inde maent Nouéber,
want dā worden sommighe vruchten rijp die
heetē op haersprake Abbati: daer af maken sy
drac dien heetē sy Kaa wy. Daer by hebben sy
hare wortel Mādioka, en daer af mengē sy wat
daer onder. En om desen dranck wille, als die
Abbati rijp is, ende sy wederom vanden crijch
comen, dat sy dan de vruchten Abbati mogen
hebben

hebben om haren drāck daer wt te maken, om
haren vyant daer toe te eten als sy eenen ghe-
uanghen hebben, ende verblijdē haer een heel
iaer lanck daer op, teghen dat den Abbati tijt
coempt. Oock moesten wy oock op haer ver-
moeden inde oogstmaent, want dan varen sy
een soerte van visschen na, die dan wter zee in
soete wateren loopen, die indē zee comen, om
daer in te legghē: die selue heeten op haer spra-
ke Bratti, die Spaengiaerts heeten se Lysses. In-
den seluen tijt pleghen sy oock ghemeynlijck
wt te varen ende te strijden, daer mede sy etens
haluen inden seluen tijt te beter door comen
moghen: ende dier visschen vāghen sy veel met
cleynen garen en hengelē, sy schieten se oock
met pijlen, ende sy voerender oock veel ghe-
braden met haer thuys, en makender ooc meel
wt, het welck sy heeten Pira Kui.

*Hoe ick vanden wilden ghewangben
wert, ende hoe dat het selue toe ginck.*

Dat XVIII. Capittel.

Ick hadde eenen wilden man, vanden ghe-
slachte diemen Carios heet, ende die was
mijn eyghen, die selue vinck my wilt, ende
ick ginck oock somtijts met hē int wout. Also
ghebeurdet op een tijt, dat een Spaengiaert wt
den eylande van sint Vincent tot my quam, in
dat



dat eylant sanct Maro (het welck vijf mijlen vā
 dē bolwercke is daer ick in woōde) met noch
 een Duytsche, die welcke hiet met name Helio
 dorus Hessus, Eobani Hessi saligher ghedach-
 ten sone, ende die selue was in dat eylāt sancte
 Vincente, in een Ingenio daer men suycker ma-
 ket, ende inden Ingenio was een Geneuoiser
 die Iosephe Ornio hiet, ende dese Heliodorus
 was der coopliedē scrijuer ende beschicker die
 rotten Ingenio behoore (Ingenio dat sijn huy-
 sen daer men het suycker in maeft) metten sel-
 uen Heliodoro hadde ick te voren meer ken-
 nisse ghehadt, want doen ick metten Spaen-
 gaerden den schipbrueck daer onder dat lant
 leet, so vant ick hem daer in dat eylant van sin-
 te Vincent, en hy bewees my ooc vrientschap.

Aldus

Aldus quam dese oock tot my, en woude be-
fien hoe dat my ginck, want hy hadde moghe
lijck ghehoort dat ick cranck was. Ick hadde
mijn slaue dien dach te voren int wout ghe-
fonden om wiltbraet te vanghen. Ick woude
dat des anderen daechs comen halen, op dat
wy wat mochten te eten hebben, want men
daer in dat lāt niet veel meeren heeft dan wat
wter wildernisse en coempt. Als ick nv door
dat wout ginck, verhief hem op beyden sijden
des weechs een groor ghescrey, op der wilden
lieden maniere, ende quamen tot my in ghe-
loopen, daer kende ickse doen, ende sy hadden
my rondtom omringt, ende haer boghen op
my met pijlen ghehouden, ende schoten tot
my in. Doen riep ick, nv help God mijn der
sielē. Ick en hadde dat woort naw so rasch wt
gheseyt, sy sloeghen my ter eerden, schoten en
staken op my, nochtans en wonden sy my niet
meer (God lof) dan in een been, ende schoor-
den my mijn cleederen van den lijue, die eene
die halskappe, die ander dē hoet, die derde dat
hembde, ende so voort aen, en begosten doen
te kijuen om my: die eene seyde, hy was eerste
by my geweest, die ander seyde, hy hadde my
gheuangen, ende te wijle sloeghen my die an-
dere met haer hantboghen. Noch ten lesten so
hieuen my twee van haerlieden vāder aerden
daer ick so naect was, die eene nā by den eenen
arm,

arm, die ander by den anderen arm, ende sommighe gingen voor my, ende sommige achter my, ende liepen also met my haestelijck door dat wout na de zee toe, daer sy hare naeckers hadden. Als sy my nv by de zee brochten, daer sach ick doen ontrent eenen steenworp verre haer naeckers staen, die sy wt der zee opt lant ghetoghen hadden onder een hage, ende noch eenen anderē grootē hoop wilde daer by. Als my die selue saghen daer henen leyden, liepen sy my alle tegen, ende waren verciert met pluy men, op haer maniere, en beten in haer armen, ende dreychden my also, dat sy my eten wou den, ende daer ginck een coninck voor my he nen metten houte daer sy de gheuangen mede doot slaen. Dese predicte ende seyde hoe sy my haren slaue den Perot (want also heeten sy die Portugaloisers als sijse gheuangen hadden.) eten wouden, ende haerder vriendē doot aen my wreken. En als sy my by den naecker had den ghebrocht, so stieten my haerder sommi ghe met voeten. Doen haesten sy haer, helpen de malcanderen dat sy die naeckers wederom int water schouen: want sy hadden sorghe dat in Brikioka eenen allarm worden soude, also dat oock gheschiede. Maereer sy die naeckers weder van dat lant in den watere schouen, so bonden sy my eerst de handen tsamen, ende sy en waren niet al tsamē wt een der wooninge.

Een

Een yeghelijck Aldea vanden anderē verdroot
dat hy soude ledich thuyswaert varen, ende ke-
uen metten twee die my behielden. Sommi-
ghe seyden, sy waren effen also na by my ghe-
weest als sy, ende wouden oock haer deel van
my hebben, ende wouden my daer ghelijc op
der steden doot slaen. Daer stōt ick ende badt,
ende sach om na den slach, maer ten lesten hief
die coninck aen die my behouden woude, en
seyde, sy wouden my leuendich thuys voerē,
op dat my haer wijs oock leuendich sien sou-
den, en harē feestdach met my houden moch-
ten, want dan wouden sy my Kawewi pepic-
ke dooden, dat is, sy wouden drāck maken, en
haer vergaderen om eenen feestdach te maken,
ende souden my dan met malcandere[n] eten.
By dien woorden lieten sijt bliuen, ende bon-
den my vier stricken oft coorden om den hals,
ende doen moeste ick in eenen naecker clim-
men, ter wijlen sy noch opten lande stonden,
ende bonden die eynden vanden coorden aen
den naeckers, ende scouense wederom na die
zee, om daer mede weder thuyswaert te varen.

*¶ Hoe sy met my wederō achterwaerts
wouden varen, en de onse aen quamen,
meynende my haer weder te ontnemen,
ende*

ende sy haer weder tot haer keerden,
ende scharmutselden met henlieden.

Dat XIX. Capittel.

DAerleyt een cleyn eylandeken daer by
daer ick gheuangen was, daer water vo
ghelen in nesten die Vwara heeten, en
hebben roode pluymen: daerom vraechden sy
my oft haer vyandē die Tuppin Ikins dat iaer
oock daer gheweest hadden, ende die vogelen
by haren ionghen gheuanghen hadden: doen
seyde ick Ia. Maer sy woude te uē wel besien,
want sy die pluymen van groter weerden
achten die van dien voghelen comen. VWant
alle haer cieraet is ghemeynlijck vanden pluymen
ghemact: en der voorgenoemden voghe
len, Vwara natuere is, dat haer eerste vederē oft
pluymen die haer wassen wit graw sijn. Maer
die ander vederen die haer daer na wassen, sijn
swart graw, en daer mede vliegghen sy ontrent
een iaer lanck, en daer na worden sy root ghe
lijck als roode verwe. Aldus voeren sy na dat
eylant toe, meynende dese voghelen te vangē.
Maer als sy nu ontrent twee bussenschueten
wijt vader plaetsen comen waren daer sy hare
naeckers staen haddē, so sagē sy achter waerts,
daer waft doen vol vanden wilden Tuppin
Ikins, en oock sommige Portugaloisers onder
F haer,



haer, want my volchde een slaue doen ick ghe-
 uangen wert, maer die selue ontquam haer en
 hadde eenen allarm ghemaeft, also dat sy my
 meynden te verlossen, roepende totten ghe-
 nen die my gheuanghen hadden, waert dat sy
 cloeck waren dat sy weder keeren ende teghen
 haer schermutselen soudé. En sy keerden met-
 ten naecker wederom tot henlieden aent lant,
 ende die opten lande waren schoten met roe-
 ren oft busen ende met pijlen na ons, ende die
 inde naeckers wederom tot haer, en ontbon-
 den my doen mijn handen, maer die coorden
 die ick om den hals hadde die waré noch vast
 geboden. So hadde nu die Coninck des naec-
 kers daer ick in was een roer, en een weynich
 puluers, het welck hē een Françoys voor bra-
 filie

ſlichout ghegheuen hadde, dat moelt ick op
die aent lant waren af ſchieten. Als ſy nv een
wijle gheſchermutſelt hadden, ſorchden ſy dat
haer die andere oock met naeckers verſtercken
ende haer na iagen ſouden, en voeren daerom
van daer, ende daer waren dry van haerlieden
gheſchoten, en ſy voeren ontrent eenen ſchuet
van eenen valckenet verre vanden bolwerck te
Brikioka henē daer ick in plach te ſijn, en doen
wy daer voorby voeren, moelt ick in den naec
ker ouereynde ſtaen, dat my mijn geſellen ſien
coſten. Doen ſchoten ſi wten bolwercke twee
groote ſtuckē op ons, maer ſy ſchoten te cort.
In middelen tijt quamen ſommighe naeckers
ons na geuaren vā Brikioka, meynēde ſy wou
den ons achterhalen, maer ſy roeyden te raſch
wech. Als de vrienden ſagen dat ſy niet gedoe
en coſten, keerden ſy wederom na Brikioka.

*¶ Vatter gheſchiede int wederkeeren
na haren lande. Dat XX. Capittel.*

ALs ſy nv ontrent vij. mijlen weechs van
Brikioka gheuaren waren na haer lant
ſchap, ſo waſt na der ſonnen te rekenen
teghen auont ontrent iiij. vren, en was opten
ſeluen dach als ſy my gheuanghen hadden. En
ſy voeren by een eylant, ende toghen die naec
kers opt lant, meynende dien nacht daer te blij
uen, ende trocken my wten naecker aent lant.



Als ick optlant quam, en conde ick niet sien,
 want ick onder dat aensicht gheslaghen was,
 noch ick en cost oock niet wel gaen, ende moe-
 ste aldus int sant liggen om der wonden wille
 die ick int been hadde. Sy stōden ront om my,
 ende dreychden my datle my eten woude. Als
 ick nu in so grooten ancxte ende iammer was,
 bedacht ick doen dat ick voormaels niet ghe-
 daen en hadde, namelijk dat bedroefde iamer
 dat daer wy hier in leuen, en begoft doen met
 weenenden ooghen te singe wt gronde mijns
 herten desen Psalm, VVt dieper noot screy ick
 tot dy, &c. Doen seyden die wilden: Siet, hoe
 weynt hy, nu is hy bedroeft. Daer nae dochte
 haer dat sy gheen goede legeringe in dat eyland
 en hadden om dien nacht daer te blijuē, ende
 voeren

voeren wederom na den vasten lande toe, en
daer waren hutten die sy voormaels ghebout
hadden: ende het was inder nacht als wy daer
quamen, ende sy trocken die naeckers opt lât,
ende maeften vier, en leyden my daer nae daer
by. Daer moest ick in een net slapen, dwelck sy
in hare sprake Iuni heeten, dat sijn haer bedde,
ende bindenseaen twee palen, bouen die aer-
de, oft ist in een wout, so binden sijt aen twee
boomen. Die coordé die ick om den hals had-
de, bonden sy bouen aen eenen boom, ende
laghen dien nacht rondt om my, ende bespot-
ten my, ende hieten my op haer sprake Sichere
inbau ende, dat is, ghy sijt mijn gebondé dier.
Eer nv den dach doorbrack, voeren sy wede-
rom wt, en roeydē den gâttschen dach lanck, en
ontret der tijt als die sonne op vesper tijt stot,
warē sy noch twee mijlen vāder plaetsen daer
sy dien nacht legheren souden, ende doen ver-
nief haer een groote swerte wolcke, ende qua-
chter ons henen seer scrickelijcken, en si roey-
den rasschelijck voort, op dat sy mochten aent
ant comen om der wolckē ende wints wille.
Als sy nv saghen dat sijse niet ontfaren en co-
ten, seyden sy tot my: *Ne mungitta dee. Tuppen do*
Quabe, amanasis yan dee Imme Rannime sis se. Dat is te
egghen, Spreeft met uwen God dat ons den
egghen en grooten wint gheen schade en doe.
ck sweech stille, en dede mijn gebet tot God,

ter wijlen sy dat vā my begēerdē, en seyde met
bedroefden sinne wt grōde mijns hertē aldus:
O ghy almachtighe God, hemelsche en eert-
rijcsche ghewelt hebber, ghy die van beghin
der werelt den genen die uwen naem aenroe-
pen geholpen ende verhoort hebt onder den
godloosen, verthoont my nu uwe barmher-
ticheyt, op dat ick mach bekenne dat ghy noch
by my sijt, en dat die wilde heydenē die welc-
ke v niet en kennen sien moghen dat ghy mijn
God mijn gebet verhoort hebt. Ick lach inden
naecker ghebonden, also dat ick my niet om-
keeren oft om ghesien en cost nae dat weder,
maer sy sagen dicwils om, ende begostē te seg-
ghen *O quamoa amanasu:* dat is aldus geseyt: Dat
groot onweder gaet achterwaerts. Doen rech-
te ick my een weynich op, ende sach achter my
dat die groote wolcke verginck, doen danctē
ick God. Als wy nu aent lant quamen, deden
sy met my als voor, bōden my aen eenen boō,
ende lagen des nachts rondt om my, ende sey-
den wy waren nu na by haer lātschap, wy sul-
len den anderen dach tegen auont daer aen co-
men, waer af ick my niet leer en verblijdde.

*Hoe sy des daechs met my om giengen
doen sy my by haer wooninghe
brachten.*

Dat

Dat XXI. Capittel.

DEn seluen dach nae der sonnen te rekenen, so wast ontrent vesper tijt als wy haer wooninge saghen, en waren also dry daghen op de vaert geweest, want het waren dertich mijlen van Brikioka tot dier plaetsen daer ick henen gheuoert werde. Als wy nu heel by haer wooninghe quamen, so wast een dorpken dat hadde thien hutten, en sy noemden dat Vwattibi. VVy voerē op eenen oeuersants, dwelck op de zee leyt. Daer heel by waren hare vrouwen in haer wortel ghewas, die welcke sy Mandioka noemen. In desen wortel ghewas ginghen veel van hare vrouwen ende trocken wortelen wt, ende die selue vrouwen die moeste ick aen roepen, ende aldus tot haer seggen: *A Iunesche been erri vramme.* dat is in onse Duytsche sprake aldus te segghen, Ick v lie-der eten spijse come.

Als wy nu aen het lant quamen, liepen sy alle ghelijck tsamen wt haer hutten (die welke hutten alle ghelijck tsamen by malcanderen op eenen berch ligghen) ionck ende oudt om my te besien, ende die mans gingen met haren boghen ende pijlen na hare hutten, ende beuolen my haren vrouwen datse my bewaren souden, ende die vrouwen namen my doen tusschen haer, ende daer ginghender sommige

voor my, ende sommighe achter my henen,
sy dansten ende songhen een ghesanck ghelijc
sy den eyghenen lieden pleghen te singhen als
sy die eten woudē. Als sy my nv voor die hut-
ten Ywara, dat is voor haer vasticheyt brachtē,
die welcke sy rondt om lanx hare hutten ma-
ken, dwelck gemaeft is vā grooten staken ghe-
lijck als eenen thuyn om eenen hof, ende dat
maken sy also om haerder vyāden wil. Als ick
nv daer in quam, liep dat vrouwen volck tot
my, ende sloeghen my met vuyften, ende troc-
ken my metten baert, ende spraken in hare spra-
ke aldus: *Sche innamme pepike a e.* dat is te seg-
ghen, Dien slach gheue ick v van mijns vrients
weghen tot sijnder wraken, dien sy lieden ghe-
doot hebben daer ghy ghewest hebt. Daer na
voerden sy my in die hutten, en daer moest ick
in eenē luni ligghen, daer quamen de vrouwē
voorende na, sloeghen ende crabden my, ende
dreychden my hoe dat se my eten wouden. So
was dat mans volck by malcanderen, en drōc-
ken den dranck den welcken sy Kawī noemē,
ende hadden hare goden Tamerkā genaempt
by haer, ende songhen henlieden ter eeren dat
sy haer ghepropheteert ende voorseyt hadden
dat sy my vanghen souden. Alfulck ghesanghe
moest ick hooren, ende daer en quam in een
half vre gheen mans volck by my, dan vrou-
wen ende kinderen.

Hoe beyde mijn Heeren tot my quamen, en seyden my hoe datse my aen een van haren vrienden geschoncken hadden, die soude my verwarē en doot slaē als men my eten woude.

Dat XXII. Capittel.

ICken wist hare manieren so wel niet ghe-
lijck ickse daer na versocht en leerde, dachte
daerom aldus : Nu maken sy ghereetschap
om my te dooden . Ouer een cleyn wijle tijts
quamen die twee die my gheuanghen haddē,
met namen Ieppio VVasu, ende sijn broeder
Alkindar Miri, ende seyden dat sy my haren
vaders broeder Ipperu VVasu wt vrientschap
gheschoncken hadden, die selue soude my ver-
waren, ende my oock doot slaen als men my
eten woude, ende hem also met my eenen na-
me maken, want die selue Ipperu wasu hadde
ouer een iaer oock een slaue gheuanghen, ende
haddē den Alkindar Miri wt vrientschap ghe-
schoncken, die den seluen dootghellaghen en
eenen naem daer af ghewonnen hadde : also
dat daerom die Alkindar Miri diē Ipperu wa-
su beloest hadde, dat hy den eerste die hy van-
ghen soude hem weder schencken soude, die
welcke ick was. Voorts seyden die voorghe-



ghenoemde twee ghebroeders die my geuan-
gen hadden, Nv sullen de vrouwen v wt voe-
ren *a prasse*, dat woort en verstōde ick doen niet,
euen wel heetet dansen. Aldus toghen sy my
wter hutten op die plaetse: daer quamen alle
die vrouwen die in seuen hutten waren, ende
grepen my aen, ende het mans volck ginck van
daer. Doen leyden my die wijs sommighe by
den armen, sommighe metten coorden die ick
om den hals hadde so hardt dat ick nauwelijc
mijnen adem cost verhalen, also togen sy met
my henen, ende ick en wist niet wat sy inden
sin hadden met my te doen. Doen werde ick
denckende op dat lijden ons Heeren ende ver-
lossers Iesu Christi, hoe dat hy vanden snoode
Ioden ontschuldich lede: daer door trooste
ick

ick my seluen en was des te verduldiger: doen
brochten sy my voor des conincx hutten, die
Vratinge wasu hier, dat is op Duytsch gheseyt
die groote witte voghel. Voor des seluen hut-
ten lach een hoopken versche eerde, daer voer-
den sy my by, ende setten my daer op, en som-
mighe hielden my: daer en meynde ick niet an-
ders sy en souden my daer ter stont doot slaen,
ende sach om na de Iwera Pemme daer mede
sy die lieden doot slaen, ende doen vraechde ic
oft sy my so corts dooden wouden: doen sey-
den sy noch niet. Daer quam een vrouwe wt
den hoop by my, en die hadde een schijue stuc
van een cristal tusschen een dinck ghelijck een
gheboghen rijfken, ende scheerde my metten
seluen cristal die wijnbrauwen van mijn oogen
af, en woude my den baert vanden mont ooc
afsnijden, maer ick en woude alsulcx niet lij-
den, ende seyde tot haer lieden dat sy my met-
ten baert dooden soudē. Doen antwoorden
sy my ende seyden dat sy my noch niet doo-
den en wouden, ende aldus lieten sy my den
baert noch een wijl tijts behouden. Maer niet
te min na sommighe dagen sneden sy my den
baert noch af met eender scheeren, die welcke
die Françoysen haer gheuen met meer ander
comenschap, voor die ware ende comenschap
van haren lande.

¶ Hoe sy met my dansten voor die hut-
ten daer sy die afgoden Tammerka in
hadden. ... Dat XXIII. Capittel.



DAer na voerden sy my van daer daer sy
my die wijnbrawen afgeschoren had-
de voor de hutten daer die Tammerka
haer afgoden in waren, en maecten eenen ron-
den rinck om my henen, daer stont ick int mid-
den in, ende twee vrouwen by my, en bonden
my met een snoer sommige dinghen aen mijn
een been die ratelden, ende bonden my oock
achter op den hals een schijue van voghelsteer-
ten gemaect, ende was viercant, datse my ouer
thooft ginck, ende dat heet op haer sprake Ara
soya. Daer na begoft dat vrouwen volck al tsa
men

men te singhen, ende also haren thoon luyde,
so moest ick metten beene daer sy my die rate-
len aenghebonden hadden neder treden, op
dat het ratelende met haren sanck accorderen
soude. Ende dat been daer ick in ghewōt was
dede my so wēe dat ick naw ghestaen en coste,
want ick en was noch niet verbonden.

*Hoe sy my nae den danse den Ipperu
Wafu thuys brochten.*

Dat XXIIII. Capittel.

ALs in den dans een eynde hadde, wert
ick den Ipperuwafu ouer geleuert. Daer
hielen sy my in vaste bewaringe. Doen
seyde hy my, ick hadde noch wat tijts te leuen.
Doen brochten sy alle haer afgoden die inder
hutten waren ende setten se ront om my, ende
seyden, die haddent te voren gheseyt datmen
eenen Portugaloiser vanghen loude. Doen sey-
de ick: Dese dinghen en hebben gheen macht,
ende en connen oock niet spreken, en lieghen
dat ick een Portugaloiser ben, maer ick ben der
Françoysen vriende een, ende dat lant daer ick
thuys ben heet Alemanien. Daer op seyden sy
dat ick moeste lieghen, want waert dat ick der
Françoysen vrient een ware, wat ick dā onder
den Portugaloisers dede: sy wisten oock wel
dat de Françoysen also wel der Portugaloisers
vyan-

vyanden waren, als sy, wāt die Françoysen co-
men alle iaer metten schepen, en brachten haer
messen, bijlen, spiegelen, cammen ende scherē,
en sy gauen haer daer voor ander ware, als bra-
filie hout, catoen, vederen ende peper, daerom
waren sy haer goede vriendē, dwelck die Por-
tugaloisers also niet ghedaen en hadden, maer
sy waren in voorleden iaren daer int lant ghe-
comen, ende hadden daer aldaer sy noch woo-
nen, onder hare vyanden vrientschap gemaect,
ende daer na waren sy oock tot haer gecomē,
ende begheerden met haer te handelen, en also
waren sy wt goeder meyninge aen haer schepē
ghecomen en daer in gheclommen ghelijck als
sy noch daghelicx inden Françoysen schepen
deden, en seydē: als die Portugaloisers haerder
genoech int schip haddē hebbē sijse gegrepen,
en gebōden tot haren vyanden geuoert, en die
hebben se gedoot en geten, en haerder som mi-
ge hebben se met harē geschut doot geschoten,
en veel spijs meer dat haer die Portugaloisers
gedaen haddē. Ooc waren se dicwils met harē
vyāden ten crijch gecomen om haer te vāgen.

*¶ Hoe sy die my genangē haddē claech-
den dat de Portugaloisers haren vader
doorscotē haddē, en dat sijt aen my wre-
ken wouden.*

Dat XXV. Cap.

Ende

ENde voort seyden sy dat die Portugalo
fers den vader vanden twee gebroeders
die mygeuangen hadden eenen arm af
gheschoten hadden, so dat hy gestoruen was,
welcken doot haers vaders sy aen my wreken
wouden. Daer op seyde ick, wat sy dat aen my
wreken wouden, ick en was doch geen Portu
galoiser, maer ick was corts mettē Castilianers
daer comen en hadde schipbrekinge geleden,
en was daerom by haer ghebleuen. Daer was
een ionck gheselle vā haren geslachte, die welc
ke eertijts der Portugaloisers slaue geweest had
de: En die wilde die onder den Portugaloisers
woonen waren selue inder Tuppin Inba lant
ter oorlogen geuaren, en haddē een heel dorp
ingenomē en de outste opgegeten, en wat ioc
was hadden sy den Portugaloisers voor ware
vermāgelt, also dat dese ioge mā den Portuga
loisers ooc verbuet was, en was oock indē te
gēspoet vā Brikioka by sijne heere, die welcke
Antonio Agudin hier, wt Galissien. Die selue
slaue hadden sy gheuāgen ontrent drye maent
eer sy my vingē, en om dat hy vā haren geslach
te was, so en hadden sy hem niet ghedoot, die
selue slaue kende my wel, en dien vraechden sy
wat ic voor een mā was: Hy seyde dattet waer
was datter een schip aent lant verloren was, en
die liedē dier af comē warē haddē si Castilianē
geheeten, en warē der Portugaloisers vriendē,
metten

metten seluen was ick gheweest; voordr en
wist hy van my niet. Als ick nu hoorde ende
oock te voren verstaen hadde datter Françoys-
sen onder haer waren, ende oock met schepen
daer plegen aen te comen, bleef ick vast op een
propooft, en seyde: Ick waer der Françoysen
goede vriët, en dat sy my ongedoot late souden
to langhe tot datter Françoysen quamen om
my te kennen. Aldus hieldē sy my in seer vaste
bewinghe. Nu waren daer sommighe Fran-
çoysen onder haer, die tot den schepen ghela-
ten waren om peper te vergaderen.

*¶ Hoe een Françoys die de schepē onder
de wilde gelaten hadde daer quam om
my te besien, ende haer beual dat se my
eten souden, ick was een Portugalaiser.*

Dat XXVI. Capittel.

DAer was een Françoys vier mijlen van
der hutten daer ick in was, ende als hy
nu die tijdinge hoorde, quam hy der-
waerts, ende ginck in een ander hutte teghen
die hutte ouer daer ick in was. Doen quamen
die wilde tot my ghelopen ende seyden: hier
is nu een Françoys comen, nu willen wy sien
oft ghy oock een Françoys sijt oft niet. Daer af
verblijde ick my, ende dacht hy is een Christē,
hy

hy sal wel ten besten spreken. Doen leyden sy
my by hem, ende hy was een ionck gheselle.
Die wilde hieten hem Karwatuware, ende hy
sprack my François toe, maer ick en cost hem
niet wel verstaen, ende die wilde stonden ront
om ons ende hoordē toe. Als ick hem nv niet
antwoordē en cost, seyde hy totten wilden op
hare sprake, doodt den boofwicht en eet hem,
het is een rechter Portugaloiser, v vyant ende
mijn vyant, ende dit verstōt ick wel, badt hem
daerom om Gods wille dat hy haer doch seg-
ghen woude dat sy my niet eten en souden.
Doen seyde hy, sy willen v eten. Doen dachte
ick op dat woort Ieremie dat daer ghescreuen
staet in sijn xvij. capittel daer hy aldus seyt: Ver-
maledijt is die mensche die op menschen be-
trout. Ende metten seluen ginck ick weder vā
haer met grooten hertsweer, en ick hadde op
die schouderen een stuck lijnen doecx ghebon-
den dwelck sy my gauen (God geue waer dat
sijt ghecreghen hadden) dat schoorde ick af, en
worp dat den François voor sijn voeten. Die
sonne hadde my seer verbrant, ende ick seyde
tot my seluen, soude ick dā oock steruen, waer
om soude ick langer mijn vlees voor haer be-
waren ende hegenen. Doen leyden sy my we-
derom inde hutte daer sy my bewaerdē. Daer
ginck ick in mijn net liggen, God weet die el-
ende die ick hadde, ende begoft te screyen en

te singhen , Nu bidden wy den heyligen geest,
om den rechten ghelooue alder meest , dat hy
ons behoede in onsen eynde als wy hen va-
ren wt deser allende, Kyrieleys. Doen seyden
sy: Het is een rechte Portugaloiser, nu crijt hy,
hem grouwelt voor den doot. Die voorghe-
noemde François bleef daer twee daghen by
haer inder hutten, maer des derden daechs reyf
de hy voort aen, ende sy besloten dat sy soudē
ghereetschap maken , ende des eersten daechs
my dooden, also corts als sy alle dinghen ghe-
reet hadden, ende sy bewaerden my seer neer-
stelijck, ende deden my veel spots aen so wel
ionck als oudt.

¶ Hoe ick so grooten tantfweer hadde.

Dat XXVII. Capittel.

HEt ghebeurde doen ick in dese groote
ellende was, so ist ghelijcmen seyt, dat
een ongheluck niet alleen en coempt,
dat my eenen tant seer dede, so dat ick heel ver-
uiel door die groote pijn: doen vraechde my
mijn heere hoe dat quam dat ick so luttel adr,
Ick seyde my dede eenen tāt wee. Doen quam
hy mer een dinck van hout ghemaeft, en wou-
den my daer mede wt trecken. Maer ick wey-
gherde my so seere, dat hy af liet. Doen meyn-
de hy, waert dat ick niet en ate ende weder toe
name, sy soudē my doodē eer den rechtē tijt
quame,

quatie, God weet hoe menich maelick so her-
telijcken begheerde dat ick mocht alstijnen
Godlijcken wille waer steruen, eer dat de wil-
de daer acht op hadden, dat sy haren wille aen
my niet volbrenghe en mochten.

*Hoe sy my tot haren ouersten coninc
Konian Bebe ghenamt voerden, ende
hoe sy daer met my om ginghen.*


Dat XXVIII Capittel.

NAe sommighe dāghen voerden sy my
in een ander dorp, her welck sy Arirap
heeten, tot eenen coninc die Konyan
Bebe ghenampt was, ende dat was die ver-
naemste coninck onder haer allen, by den sel-
uen hadden haer noch sommighe andere by
hem vergadert ende versamelt, en een groote
blijfschap ghemaect op haer maniere, ende die
wouden my oock sien: want die coninck Ko-
nyan Bebe dat also bestelt hadde, dat men my
dien dach daer brengen soude. Als ick nu vast
by der hutten quam, soe hoorde ick een groot
gheroep vā singhen, en basuynen blasen. Ende
voor de hutte stōt een hooft oft xv. op staken,
vanden liedē die sy geten haddē dat oock hare
vyanden sijn, geheeten Markayas. En als sy my
daer voorby leyden, seyde sy dat dat hoofden
waren vā haren vyanden geheeten Markayas.

Doen wert my banghe, Ick dachte so sullen sy
oock met my om gaen. Als wy nv ter huttē in
ginghen, so ginck een vā dien die my bewaer-
den voor henen, ende sprack met harde woor-
den dat alle die andere hoorden: Hier brenge
ick die slaue dē Portugaloiser, en meynde het
waer een sijn dingē om aen te sien, als yemant
sijnen vyant in sijn ghewelt hadde, en hy sprac
noch van anderen dinghen meer, also haer ma-
niere is, ende leyden my voor den coninc daer
hy sadt en drāck metten anderen, ende hadden
malcanderen droncken ghemaect inden drāck
die sy maken Kawawy ghenaemt, ende sagen
my suerlijck aen ende seyden: Sijt ghy comen
onse vyant! Ick seyde, Ick ben comen, maer ick
en ben v vyāt niet. Doen gauen sy my oock te
drincken. So hadde ick nv veel vanden coninc
Konyan Bebe ghenaempt gehoort, dat hy een
groot man soude sijn, ende oock een groot ty-
ran om menschē vleesch te eten, also was daer
een onder haer, die welcke my docht dat hijt
was, en ick ginck by hem ende sprack met hem
gelijck als die woorden op haer sprake vallen,
ende seyde: Sijt ghy die Konyā Bebe, leeft ghy
noch? Ia seyde hy, ick leue noch. VVelaē seyde
ick, ick heb veel van v gehoort, hoe ghy een so
weydelijcken man sijt. Doen stont hy op ende
ghinck voor my henen spaceren van grooter
hoochmoet, en hy hadde eenen grooten ron-
den

den gruenen steen door die lippen des monts
steken (also haer maniere is) Oock soe maeften
sy witte Paternosters van eenderhande zeekey
kens, dwelck haer cieraet is, Vanden seluen had
de dese coninck oock wel ses vadenmen lanck
om den hals hanghen. By desen cieraet mercte
ick oock wel dat hy een van den vernaemsten
sijn moest. Daer nae ginck hy wederom sitten,
ende begoft my te vraghen wat sijne vyanden
die Tuppin Ikins ende die Portugaloisers aen
floeghen, en seyde voort waerom dat ick haer
hadde willen schieten inder teghenheyt van
Brikioka, wát hy vernomē hadde dat ick daer
busschierter was gheweest teghen haer. Doen
seyde ick, die Portugaloisers hadden my daer
in gestelt, ende hadde dat moeten doen. Doen
seyde hy, Ick was doch een Portugaloiser, ende
hier den Françoys die my gesien hadde sijnen
sone, die seyde doch dat ick met hem niet spre
ken en cost, ende dat ick doch een rechte Por
tugaloiser was. Doen seyde ick, het is wel waer
dat ick niet wel spreken en can, maer ick ben
langhe wten lande gheweest, ende hebbe die
sprake vergheten. Doen meynde hy, hy hadde
noch vijf Portugaloisers helpen vangen ende
helpen eten, die oock al gheseyt hadden sy wa
ren Françoysen, ende hadden doch ghelogen.
So veel seyde hy dat ick my des leuens getroo
ste, ende my inden wille Gods beual, wát ick

van haer allen niet anders en vernam dan dat ick steruen soude. Doen begoft hy wederom te vraghen wat die Portugaloisers van hē seyden, sy moesten haer vrijlijcken seer voor hem vreesen. Doen seyde ick: Ia, sy weten veel van v te segghen hoe grooten crijch ghy pleecht te maken, maer nu hebben sy Brikioka vast ghemaeft. Ia seyde hy, so woude hijse so vanghen ghelijck sy my gheuanghen hadden inder wildernissen, herwaerts ende derwaerts. Voorts seyde ick tot hem: Ia v rechte vyāden die Tupin Ikins die rusten xxv. naeckers toe, ende sul len ter stont comen ende in v lant vallen, also dat oock gheschiede. Ter wijlen hy so vraechde, stōden die andere ende hoorden toe. Summa, hy vraechde my veel, ende seyde my veel, ende beroemde hem mijnder, hoe menighen Portugaloiser hy alreede doot gheslaghen hadde ende geten, ende meer ander wilde lieden dat sijne vyanden gheweest waren. Als hy also met my inder reden was, middeler tijt werden drāck inder hutten wt ghedrōcken. Doen ginghen sy weder in een ander hutte om daer in oock te drincken, dat hy also vāden spraken afliet. Daer na inder ander hutten begoften sy haren spot met my te houden, ende des seluen conincx sone bandt my die beenen drye mael bouen malcanderen, daer na moeste ick effens voets door die hutten henen huppelen, daer mede



mede loeghen sy, ende seyde: daer coempt on-
 sen eten cost aen huppelende. Doen seyde ick
 tot mijnen heere die my daer ghebrocht had-
 de, oft sy my daer ghebracht hadden om te
 dooden: doen seyde hy neen, maer het was
 toch so de maniere datmen also meten vreem-
 den slauen omme ginck, ende sy bonden my
 die stricken oft coorden van den beenen we-
 der af, daer na quamen sy rondtom my heenen
 gaen, ende grepen my aen mijn vlees, die een
 seyde die huylt vāden hoofde quame hem toe,
 die ander seyde dat dicke vāden beenen quam
 hem toe, daer nae moeste ick haerlieden sin-
 ghen, ende op dat ick haerlieder wille voldoē
 ende volbrengghen soude met singhen alsoe sy
 begeerden, so lange ick gheestelijcke liedekens.

Doen soude ick haer wt legghen op hare sprake. Doen seyde ick, ick heb van mijnen God gesonghen. Sy seyden mijn God was een onuerlaet, dat is op haersprake Teuire gheseyt. Die woorden deden my wee ende dachte: O ghy goedertieren God wat cōdt ghy al lijden eenē tijt lanck. Als my nu die vanden dorp ghesien hadden, en alle hoomoet aengedaen hadden, so seyde die coninck Konyan Bebe des anderē daechs totten genen die my bewaerdē, dat sy goede achtinge op my hebben soudē. Daer na als sy my wter hutten leyden, en my wouden tot Vwattibi brengē daer sy my dooden wouden, riepen sy my spottelijcken nae, sy soudenterstont in mijns heeren hutte comen en mijn doot bedrincken, en my eten, maer mijn heere trooste my altijt, ende seyde icken soude noch so corts niet ghedoot worden.

Hoe die xxv. naeckers vanden Tuppen Ikins aen quamen daer ick den coninck af gheseyt hadde, ende woude die butten aen vallen daer ick in was.

Dat XXIX. Capittel.

IN middelen tijde ghebuerdet dat die xxv. naeckers van den wilden die de Portugalosers te vrien de hebben, aen quamen. Oock so



so ick te voren gheseyt hadde, dat eer ick geuan
 gen wert de selue inden wil hadden derwaerts
 ten crijch te varen, so gebuerdet op eenen mor
 genstont dat sy dat dorp aen vielen. Als n v die
 Tuppin Ikens dese hutte wouden aen vallen,
 ende begosten te hoop te schieten, so was dat
 desen die inde hutten waren leet, wát die vrou
 wen woudé haer ter vlucht geuê. Doen seyde
 ick haer: Ghy hout my voor een Portugaloiser
 uwen vyant, Gheeft my n veenen boghe met
 pijlen, ende laet my los gaen, so wil ick v helpē
 die hutten verdedighen. Sy deden my eenen
 boghe met pijlen, Ick riepe ende schoot, ende
 maeftet op haer wijze so ick best cost, en sprack
 haer toe dat sy wel gemoeyt soudé wesen, ten
 hadde gheen noot, ende mijn meyninge was

dat ick woude doort staectet comen , dwelck
rondtom die hutten ginck, ende totten ande-
ren loopen, want sy kenden my wel, en wisten
oock wel dat ick in dat dorp was , maer sy be-
waerden my al te wel . Als die Tuppin Ikens
sagen dat sy niet bedrijuen en costē , gingen sy
weder in hare naeckers, en voerē voorts. Als sy
nv wech waren, bewaerdē sy my als te voren.

*Hoe die hooplieden ende ouerste des
auonts inder maenschijn vergaderden.*

Dat XXX. Capittel.

DEs auōts als des daechs die andere we-
derom wech ghetoghen waren, doen
vergaderden sy inden maneschijn tuss-
schen de hutten op de plaetse, ende beraeyden
haer onder malcanderen, ende besloten wan-
neer sy my dooden wouden, ende leyden my
oock tusschen haer ende bespotten my , ende
dreychden my. Ick was truerich, ende sach die
mane aen , ende dacht in my seluen : O mijn
heere ende mijn God , helpt my van deser el-
lende tot eenen salighen eynde. Doen vraech-
den sy my waerom dat ick de mane so dicwils
aensach. Doen seyde ick haer : Ick sie haer aen,
want sy is toornich . VVant die figuere die in-
de mane is, dochte my so scrickelijck sijn (God
vergheuet my) dat ick selue dachte God ende
alle



alle creatueren moesten toornich op my sijn.
 Doen vraechde hy die my woude laten doo-
 den Ieppio VVasu ghenaeamt, een vanden co-
 ninghen inder hutten, op wien is die mane
 toornich. Doen seyde ick: Hy siet na uwe hut-
 te, om des woorts wille begoft hy gramme-
 lijcken met my te spreken, ende om dat woort
 om te keeren, seyde ick doē, ten sal v hutte niet
 sijn, sy is toornich op den slauen Carios (het
 welck oock een aert wilden is die also heeten)
 Ia seyde hy, ouer die come alle ongheluck. Het
 bleef daer by, en icken dachter niet meer om.

*¶ Hoe de Tuppin Ikins een ander dorp
 Mābukabe genaemt verbrāt haddē.*

Dat XXXI. Capittel.

Des



DEs anderen daechs daer nae quam die
 tijdinghe vā eenen dorpe Mambukabe
 genaempt, dat die Tuppin Ikens doen
 sy van daer gheuaren waren daer ick gheuan-
 ghen lach, dat dorp Mambukabe aengeualllen
 hadden, ende de inwoonders waren alle ont-
 loopen op eenen cleynen ionghen na, en dien
 hadden sy gheuanghen, ende hadden haer die
 hutten verbrāt. Doen tooch Ippio wasu der-
 waerts, want sy waren van sijnen vrienden en
 maechschap, ende woude haer die hutten we-
 derom helpen op maken. Aldus nam hy ghe-
 meynlijck alle vrienden vā sijnder hutten met
 hem. Dese Ieppio VVasu was doen ende laten
 ouer my, ende dede my veel leytslaen, en was
 vander meyningen om van daer leem oft cley

te brengen, ende oock wortelen meel om de
feelte reede te maké om my te eten: ende als hy
wt tooch beual hy den genen dien hy my ghe
schenct hadde Ipperuwafu ghenaeamt, dat hy
my wel bewaren soude tot dat hy weder qua
me. Aldus waren sy langher dan veerthien da
ghen wt ende maeften daer ghereetschap.

*Hoe een schip van Sancte Vincente
quam. ende vraechde na my, ende hoe
sy haer een cort berecht gauen.*

Dat XXXII. Capittel.

Middelen tijt quam een schip met Por
tugaloifers van Brikioka, en ankerdē
niet verre van daer daer ick geuangen
lach, ende schoten een stuck geschuts af, op dat
die wilde hooren soudē, ende sprake met haer
comen houden souden. Als sy nv des gewaer
werden, seyden sy tot my daer sijn v vrienden
die Portugaloifers en willen moghelijck hoo
ren oft ghy oock noch leeft, en willen v coo
pen. Doen seyde ick, Het sal mijn broeder sijn,
wāt ick vermoeyde dat de Portugaloifers sche
pen die dien hoeck lants ouer varen na my vra
ghen mochten, en op dat die wilde niet mey
nen en souden dat ick een Portugaloiser waer,
so seyde ick dat ick noch een broeder hadde,
dat welck oock een Françoys was, onder den
Portu-

Portugaloifers. Als nu dat schip aen quā, seyde ick, het sal mijn broeder sijn, sy en woude niet anders gheloouen, dan ick was een Portugaloifer, en voeren so na by dat schip dat sy sprake met haer costen houden. Doen hebben die Portugaloifers geuraecht hoe dat met my ware, doen hadden sy gheantwoort dat sy na my niet meer en vraechden: ende dat schip voer wederom henen, meynende mogheliick ick was doot: als ick dat schip sach wech varē, wat ick dachte weet God wel. Sy seyden onder malcanderen, wy hebbē den rechten man, Sy seynden alreede schepen na hem.

Hoe des conincx Ieppio wasu broeder vā Mambukabe quam, ende my claechede hoe sijn moeder, sijn broeder met allen anderen cranck waren worden, en begeerden van my dat ick met mijnen God soude maken dat sy mochten ghesont worden.

Dat XXXIII. Capittel.

ENde ick was alle daghe in sorgē dat die andere die buyten waren (als voor ghemelt is) ende op my bereydden. Daer na op eenen dach hoorde ick in des conincx hut

ten een ghescrey dwelck van buyten was. My
wert banghe, ick meynde sy waren weder co-
men, want dat is der wilden gewoōte, als een
niet meer dan vier daghen wt en is, als hy dan
weder coempt, so bescreyen hem sijne vriendē
van vruechden. Niet lange na dat screyen quā-
een tot my, en seyde: Vwe medeheeren broe-
der is comen, en seyt dat die andere seer cranck
sijn worden. Doen verblijde ick my, en dachte
hier sal God wat wtrecten willen. Daer nae
ouer eenen cleynen tijt quam mijns medehee-
ren broeder inder hutten daer ick in was, ende
sette hem by my, en begoft te screyen oft wee-
nen, ende seyde, sijn broeder, sijn moeder ende
sijns broeders kinderen warē alle met malcan-
deren cranck ende sieck gheworden: ende sijn
broeder hadde hem tot my gheschickt, en dat
hy my segghen soude, Ick soude met mijnen
God maken dat sy mochten wederom gesont
worden, en seyde, mijn broeder laet hem dunc-
ken dat uwen God moet gram sijn. Ick seyde
hem: Ia mijn God is toornich dat ghy my wilt
eten, ende te Mambukabe getrocken was om
die feestē toe te rusten, ende seyde hē: Ghy segt
dat ick een Portugaloiser ben, ende en bens
niet, niet te min: Gaet henen tot uwen broe-
der ende segt hem dat hy wederom come in
sijn hutte, so wil ick dan met mijnen God spre-
ken, ende hy sal wederom ghesont worden.

Doen

Doen seyde hy my, hy waer te cranck, ende en
cost niet ghecomen. Hy wist wel ende hadde
ghemerct als ick maer en woude, dat hy daer
oock wel ghesont worden soude. En ick seyde
hem, hy soude wel so sterck wordē dat hy sou
de thuys comen in sijn hutte, en dan soude hy
recht ghesont werden, ende hy ghinck met die
antwoort wederom henē na Manbukabe, het
welck is vier mijlen vā Vwattibi daer ick was.

*¶ Hoe die crancke coninck Ipperuwasu
wederom thuys quam.*

Dat XXXIIII. Capittel.

ENde nae sommighe daghen quamen sy
alle met malcanderen cranck wederom
thuys, ende doen liet hy my in sijne hut
te leyden, ende seyde my hoe datse alle gader
sieck waren worden, ende ick haddet wel ghe
weten, want hy gedacht noch wel dat ick ghe
seyt hadde dat die mane gram was ouer sijn
hutte. Als ick die reden vā hem hoorde, dacht
ick by my seluen dat dat wt de voorsienicheyt
Gods moeste gheschiet sijn, dat ick des auonts
(als voor verhaelt is) vander mane ghesproken
hadde. Het was my een groote vruecht, en ick
dachte, heden is God met my. Doen seyde ick
hem voort, het was waer, om dat hy my eten
woude, ende ick en was sijn vyāt niet, daerom

quam

doodē, noch raet daer toe en gaue. Doen seyde
hy neen. Ter wijlen die my gheuangen hadde
my niet en dooden, so en woude hy my oock
niet scadelijc sijn, ende al dooden sy my, so en
woude hy van my niet eten. Desgelijcx die an-
der coninc Kenrimakui hadde ooc eenē droō
van my gedroomt, dat hē oock seer verscriēte,
die selue riep my ooc in sijn hutte, ende gaf my
terē, daer na claechde hijt my, en seyde: hy was
eens ten crijch geweest, en hadde eenen Portu-
galoiser geuangen, en met sijnen handen doot
gheslagen, en daer af so veel geten dat hem die
borst daer noch gebreckelijck af was, en hy en
woude van geenē meer eten: so was hem nv
eenen scrickelijcken droom van my gedroomt
da hy oock meynde hy soude steruē. Ick seyde
hem oock ten soude gheen noot sijn, maer dat
hy geen menschen vlees meer en ate. Oock die
oude wijs inder hutten herwaerts ende der-
waerts die my oock veel leets ghedaen hadde
met grijpen en slaen, en dreygē te eten, die hie-
ten my daer na Scheraeire, dat is mijn sone, en
laet my toch niet steruen, dat wy so met v om-
ginghen, wy meynde dat ghy een Portugalois-
er waert, en dien sijn wy seer grā: oock hebbē
wy wel sommige Portugaloisers gehadt ende
geten, maer haren God en wert soe toornich
niet als uwen God, daer door sien wy nv wel
dat ghy gheen Poortugaloiser en moecht sijn.

So lieten sy my daer een tijt lanck gaen, sy c
wisten niet wel hoe sijt met my hadden, o
ickeen Portugaloiser oft een Françoys war
Sy hadden oock wel Portugaloisers ghesien
maer die hadden al ghemeynlijck swerte baer
den. Ende na dien verscricken als die een mij
heer op quam, en seyden sy my van gheene
eten meer, maer sy verwaerdé my al euen wel
ende en wouden my niet alleen laten gaen.

*¶ Hoe dat die Françoys die den wilden
beuolen hadde datse my eten soude, we
der quam, ende ick hem badt dat hy my
mede name, maer mijn heeren en wou
den my niet verlaten.*

Dat XXXV. Capittel.

SO was nv die Françoys Karwattuware,
van dien ick voorgeseyt hebbe, doen hy
van my tooch metten wilden lieden, die
hem gheleyden, en der Franchoyfen vrienden
waren, die goeden die de wilde hebben, als pe
per, ende een soerte van pluymé die welcke sy
oock hebben, te vergaderen. Als hy nv we
derom nae den oeuereysde daer die schepen
aen comen, ghenaeemt Munguwappe ende
Iterroéne, moeste hy daer door reysen daer ick
was. Te voren als hy vā daer tooch, en merste
hy

hy niet anders, dan sy wouden my eten, ende
haddet haer oock beuolē: aldus was hy een tijt
lanck wt, ende hy en hadde niet anders ghe-
meynt dan ick was doot. Als hy nv inder hut-
ten wederom by my quam, sprack hy met my
op der wilden sprake, ende ick ginck die maels
los. Doen vraechde hy my oft ick noch leefde:
doen seyde ick, Ick dācke God dē heere, dat hy
my so lange behoedet heeft, so mocht hy van
den wilden moghelijk oock gehoort hebbē
hoer toeghegaen hadde, ende ick riep hem al-
leen op een sijde, op dat die wilde niet hooren
en souden wat ick seyde, ende seyde tot hem,
hy sach wel dat my God noch gespaert hadde
dat leuen, Oock en was ick gheen Portugaloi-
ser, maer ick was een Duytsche, ende metten
paengiaerden om schipbruecx wil onder die
Portugaloisers comen, dat hy den wilden nv
oock woude segghen so ick hem geseyt hadde
hoe dat ick vanijnen maechschap waer, dat
my my mede nemen woude daer die schepen
en quamen, want ick forchde waert dat hy
dat niet en dede, sy souden dencken het waren
oghenen, ende eens op een reyse my dooden
als sy gram waren, ende dede hem een verma-
inghe in der wilden sprake, en seyde hem oft
y oock en Christen hert int lijf ghehadt had-
e, oft ghedacht hadde dat na desen leuen een
nder comen soude, dat hy daer toe so hadde

gheraden datmen my doodē soude. Doen begostet hem te berouwen, en seyde hyen hadde niet anders ghemeynt dan ick was een Portugaloiser, die welcke so arghen booswichters sijn, als sy yemanden krijghen costē inder Provincien van Brasilien, die willen sy dā ter stont hanghen, het welck oock waer is. Oock seyde hy, sy moesten oock duycken onder haerliedē, en hoe dat die wilde met haren vyāden maecten, so moesten sy te vreden sijn, want sy waren der Portugaloisers erfvyanden. So ick hem gebeden hadde seyde hy dē wilden, hy en hadde my deerste reyse niet ghekent, maer ick was wt Allemanien, ende was van haren vrienden en woude my derwaerts nemen daer die schepen plegen aen te comen. Doen seyden mijne heeren, neen, sy en wouden my niemant laten, mijn eyghen vader ende broeder quamē daer, ende brochten een schip vol goets, namelijk, bijlen, aecxen, spiegelen, messen, cammen ende scheren, ende gaue haer dat, wāt sy hadden my in der vyanden lant gheuanghen, ende ick was haer eygen. Als die François sulcx hoorde, seyde hy my, ick hoorde wel datse my niet verlatē en woudē. Doen badt ick hem om Gods wil dat hy my dan halen liet, ende mede in Vrancrijck nemen metten eersten schepe dat comen soude. Dat gheloofde hy my, ende seyde den wilden dat sy my wel bewaerden en niet en dooden,

dooden, mijn vrienden souden terstōt om my
comen, daer mede trock hy voort aen. Als hy
nv wech ghetrocken was, doen vraechde my
een van mijn heeren Alkindar miri genaempt,
(niet die sieck geweest hadde) wat die Karwat
tūwara (soe des Franchoyfen naem was op ter
wilden sprake) my ghegeuen hadde, en oft hy
van mijn lantslieden gheweest ware, ende wat
hy seyde, Ia meynde hy, waerom en heeft hy v
niet een mes ghegeuen dat ghy my ghegeuen
hadt, en wert toornich. Daer na als sy alle we-
derom ghesont waren, begosten sy wederom
ouer my te murmureren, ende seyden: die Fran-
choysen dochten also luttel als de Portugaloi-
ers, also dat my wederom begoft te grouwelē
ende te vreesen.

*Hoe sy eenē geuāgenē atē, en my mede
daer by voerdē. Dat XXXVI. Cap.*

VOorts na sommige daghen dat sy im-
mers eenē gheuangenē eten wouden
in een dorp Tickquarippe ghenaeamt
ontrent ses mijlen van daer ick gheuāgen lach,
so trocken daer oock sommige wter hutten
daer ick in was, die voerden my mede, ende de
laue die sy eten wouden, was vā eender nātie
die Markaya heet, ende voerē met eenen naec-
ter derwaerts. Als nv dē tijt quā dat sy hem be-
drinckē woudē, dedē sy na haer gebruyck, wāt

als sy eenē eten willen, so maken sy eenen drāc
van wortelen die heeten sy Kawi : als die ghe-
droncken is, daer na dooden sy hē. Des auōts
so sy des anderen daechs sijnen doot bedrinc-
ken wouden, ginck ick by hem, ende seyde tot
hē: Ia ghy sijt al geruft totten doot. Daer loech
hy, en seyde: Ia, So heeten nu die snoeren daer
sy die gheuanghen in binden Mussuraua, ende
is van catoen ghemaect, ende is dicker dan een
vingher, soe was hy wel geruft met alle dingen
dan alleen die Mussuraua en was noch niet lāc
ghenoech (daer gebraken noch ontrent ses va-
demen daer aen) Ia seyde hy, by haer hadden se
betere, en maecte als sulcke maniere als oft hy ter
kermessen soude gaen. So hadde ick nu een
boeck by my in Portugaloiser sprake, het welc
die wilden in een schip genomen hadden dat
sy door hulpe vanden Françoysen gewonnen
ende my ghegheuen hadden. Ende ick ginck
vanden gheuanghenen, ende las in dat boeck,
ende my iammerde sijnder. Daer na ginck ick
weder tot hem, ende sprack met hem (wāt die
Portugaloisers hebbē die selue Markaya oock
te vrienden) ende seyde hem: Ick ben oock een
gheuanghen so wel als ghy, ende en ben niet
hier comen om dat ick van v eten soude, maer
mijn heeren haddē my mede gebrocht. Doen
seyde hy: hy wist wel dat wy lieden geen men-
schen vleesch en etē. Voorts seyde ick hem, hy
soude

soude ghetrootst sijn, want sy souden hem dat vlees alleen eten, maer sijnen gheest soude op een ander plaetse varē, daer onse geesten oock henē varē, daer is veel vruechdē. Doē meynde hy, oft dat ooc waer was. Doen seyde ick Ia. Ia seyde hy, hy en hadde God noyt ghesien. Ick seyde hem, hy soude hem int ander leuen sien. Als ick nv mijn reden met hem gheeyndt hadde, ginck ick vā hem. Dien seluen nacht als ick des daechs met hem ghesproken hadde, quam eenen grooten wint, en waeyde so vreesflijcken dat hy stucken vanden daecke vāder hutten waeydde. Daer begosten die wilde op my gram te worden, ende seyden in haer sprake: *Apo Meiren geuppavvy vvittu vvasu Immon.* dat is aldus gheseyt. Der boose mensch die heylighe, maeft dat die wint nv coempt, want hy sach des daechs inde donnerheude, ende meynden dat boec dat ick hadde, ende ick dedet daerom dat die slaue mijn en der Portugaloisers vrient was, ende ick meynde ter auontueren die feest te beletten metten quaden wedere. Ick badt God den heere, ende seyde: heere ghy hebt my tot hier toe beschermt, behoet my voort aen, want sy murmureerden seer op my. Als nv dē dach aen quam so werdet schoon weder, ende sy droncken ende waren wel te vreden. Doen ginck ick by den slaue, en seyde hem, Den grooten wint was God gheweest, ende hadde hem

willen hebben. Daer nae des anderen daechs
wert hy geten, hoe dat dat toe gaet, sult ghy in
die leste Capittelen vinden.

*¶ Vatter ghebuerde als wy wederom
thuys voeren, als sy hem geten hadden.*

Dat XXXVII. Capittel.

ALs die feeste nu ghehouden was, voerē
wy weder na onse wooninge, en mijne
heeren voerden wat ghebraden vleesch
met haer, ende wy waren dry daghē op de rey
se, dwelck men anders wel op eenen dach va
ren soude, maer het waeyde en reghende seere.
So seyden sy my des eersten daechs, als wy des
auonts hutten maecten int bosch, om ons te le
gheren, ick soude maken dattet niet en regēde,
so wasser een knecht met ons die hadde noch
een beenknokel vander slauen daer noch vlees
aen was, ende dat adt hy. Ick seyde den iongen
hy soude dat been wech worpen. Doen wer
de hy ende die andere gram, en seyden, dat was
haer rechte spijsē. Daer by liet ickt bliuē. VV
waren dry daghen onder weghen. Als wy nu
een vierendeel vander mijlen weechs na by de
wooninge quamen, en costen wy niet voor
der comen, want die baren werden groot, wy
toghē die naeckers opt lant, ende meynde het
soude des ander daechs goet weder worden
sijn,

sijn, so soudē wy die naeckers thuys gebrocht
hebbē, maer het was al euen geduerich quaet.
Doen wert haer meyninghe ouer lant te gaen,
en daer nae alst goet weder ware, die naeckers
te halen. Als wy nu gaen woudē, so aten sy, en
die ionge knaechde dat been voort af, daer nae
werp hijt voort wech, ende wy ginghen ouer
lant, en terstōt werdet oock goet weder. VVel
aen seyde ick, ghy en wout my niet gheloouen
als ick v seyde dat mijn God toornich was om
dies wil dat die ionghe dat vleesch so vanden
beene adt, Ia meyndē die andere, hadde hijt ge
ten dat ghjs niet ghesien en hadt, so soudt wel
goet gebleuen hebben. Daer by bleeft. Als ick
daer wederom inder huttē quam, so vraechde
my die eene die oock deel aen my hadde Alkin
dar ghenaeamt, oft ick nu ghesien hadde hoe sy
met haren vyanden om gingen: doen seyde ick
Ia, dat ghjse eet, dat dunct my scrickelijc sijn. Ia
seyde hy, dat is ons maniere, soe doen wy den
Portugaloiserē oock. Die selue Alkindar haette
my seere, en hadde geerne gehadt dat die selue
my doot geslagen hadde, dien hy my gēgeuen
hadde: want ghelijck ghy voor verstaen hebt,
so hadde hem die Ipperuwafu een slaue ghe
schonckē om doot te slaen, op dat hy hē eenen
naem meer gewinnen soude, dies hadde hem
Alkindar weder geloeft, dat hy dē eerste vyant
die hy vinck hem wederom schencken soude.

Als

Als hem nu dat niet gebueren en mochte met my, hadde hijt al euen wel gheerne ghedaen, maer doch belette hem dat sijn broeder in alle manieren, wát hy vreesde voor meerdet plage die hem ghebueren mochte. So hadde nv dese Alkindar te voren eer my die ander derwaerts voerdé daer sy dien aten, my op een nieuw ghe dreycht te dooden. Als ick nv weder quá, hadde hy binnen middelen tijt pijn inder ooghen ghecreghen, ende moest stille ligghen, ende en cost niet sien eenen tijt lanck, seyde doen dicwils, Ick soude met mijnen God spreken dat hem die oogen wederom goet werden. Doen seyde ick Ia, dat hy voort aen niet quaets ouer my en gedachte: doen seyde hy neen. Na sommighe dagē creech hy sijn gesontheyt weder.

Hoe datter weder een schip na my gesonden wert vanden Portugaloisers.

Dat XXXVIII. Capittel.

ALs ick nv inde vijffte maët by haer gheweest was, so quam wedereen schip vā dat eylant Sancte Vincente daer by, so hebben die Portugaloisers dat voor een maniere, dat sy al euen wel in haerder vyanden lant varen, maer wel gherust, en comenschappen met haer, geuen haer houweelen, haecken ende bijlen, messen ende ander dinghen voor

Man-



Mandiokē meel, dwelck die selue wilde lieden
op sommighe plaetsen seer veel hebben, ende
die Portugaloisers die veel flauen hebben tot-
ten suycker gewas, die behoeuē dat meel om
die selue daer mede te spijsen. Ende als die sche-
pen comenschappē metten wilden, so coemp-
ter van dese wilden een oft twee in eenen naec-
ker, ende reycken haer die ware opt fordelijcx-
ste dat sy cōnen, daer na eyschen sy wat sy daer
voor hebben willen, dat gheuen haer dan die
Portugaloisers. Maer ter wijlē die twee by dat
schip sijn, houden haer sommige tnaeckers vol
wilden lieden vā verre, ende sien toe. Ende als
den coop ghehouden is, so beginnen die wil-
de dickwils mettē Portugaloisers te schermut-
selen, ende schieten pijlen nae haer, ende varen

we-

wederom wech. Dat voorghenoemde schip-
volck schoot een stuck gheschuts af, daer mede
die wilde hoorden dat een schip daer was, en
sy voeren derwaerts: doen haddē sy na my ghe-
uraecht oft ick noch leefde, sy antwoorden Ia.
Doen hadden die Portugaloisers begheert dat
sy my mochten sien, want sy hadden een kiste
vol goets, die mijn broeder ooc een François
voor my brachte, die oock int schip was. So
wasser nveen Frācoys int schip metten Portu-
galoisers Claudio Micando ghenaeamt, die
welcke voormaels mijn gheselle geweest was,
den seluen noemde ick mijn broeder, ende die
(seyde ick) sal mogelijck int schip sijn, ende na
my vraghen, wāt hy daer alreede een mael ghe-
weest hadde: ende sy quamen wederom van-
den schepe aent lant, en seyden my, mijn broe-
der was noch eens comen, ende bracht my een
kiste vol goets, ende soude my gaerne sien.
Doen seyde ick, voert my van verre daer by, ick
wil met mijn broeder spreken, die Portugalois-
ers en verstaen ons niet, ende ick wil hem seg-
ghen dat hy onsen vadere segghe als hy thuy-
s coēpt, dat hy met eenen schepe come, en bren-
ghe veel dinghen mede, en my hale. Sy meyn-
den het waer goet also, maer sy sorchden dat
ons die Portugaloisers verstōden, want sy had-
den eenen groten crijch op hāden, dien wou-
den sy teghen die oogstmaent volbrenghen
teghen

de mijnen broeder beuolen dat hy soude sien
dat hy den Portugaloisers ontquame, en trock
in ons vaderlant, ende brachten een schip met
veel goets, ende haelde my, want ghy lieden
waert vroem, ende ghy hielt my wel, dat wou
de ick dan loonen alst schip coempt, en moest
also alijt het beste voorwenden, ende gheuēl
haer wel. Daer nae seyden sy tot malcanderen:
hy moet sekerlijck een Franchois zijn, laet ons
hem voort aen beter houden. Alsoe ginckick
daer eenen tijt lanck onder haer, en seyde: daer
tal volcken een schip na my comē, dat sy slechs
my wel tracteerden. Daer na voerdē sy my int
wout herwaerts en derwaerts, en waer sy wat
te doen hadden, daer moest ick haer helpen.

*Hoe sy een slaue onder haer hadden
die my dicwils belooch, en hadde gaer-
ne ghesien dat sy my corts ghedoot had-
den, maer die selue wert gedoot ende ge-
ten in mijn teghenwoordicheyt.*

Dat XXXIX. Capittel.

SO wasser nu eē slaue onder haer die was
van eender natien gheheeten Carios, en
sijn oock den wildē vyant, ende der Por-
tugaloisers vrienden, die selue was den Portu-
galoisers eyghen gheweest, ende was haer daer

na ontloopen, Sulcke en dooden sy niet die so
tot haer loopen, ten sy dat sy wat sonderlinck
misbruycken, maer houdente voor haer eygen
en moeten dienen: die selue Carios was drye
iaer onder dese Tuppin Imba gheweest, ende
seyde, hy hadde my onder die Portugaloisers
gesien, ende ick hadde dicwils onder die Tup-
pin Imba geschoten als sy derwaerts ten crijch
waren comen. So hadden nu die Portugaloi-
sers voor sommige iaren van haren coninghen
een gheschoten, welcken coninck die Carios
seyde dat ick gheschoten hadde, ende riet om-
mers daer toe men soude my dooden, wát ick
was die rechte vyant, hy hadt gesien, en loecht
al metten anderen, wát hy was drye iaer onder
haer gheweest, ende het was eerst een iaer ghe-
leden dat ick tot S. Vincente comen was, daer
hy ontloopen was. En ick badt God dickwils
dat hy my vóór die logene behoeden woude.
So gebuerdet ontrent den iare 1554. inde seste
maent dat ick ghenanghen was, so wert die
Carios sieck, en sijn heere badt my ick soude
hem helpen op dat hy weder ghesont werde
ende wilt vinck dat wy te eten cregghen, want
ick wist wel als hy hem yet brocht, daer gaf hy
my oock af, maer waert dat my dochte dat hy
niet weder gesont worden en soude, so soude
hijen eenen goeden vrient schencken die hem
doot sloech en eenen naem aen hem wonne,
so

so was hy alreede ontrent neghen oft thien da-
ghen sieck gheweest, nv hebben sy tanden die
sijn van een dier dwelc sy Backe heeten, die sel-
ue tanden wetten sy scherp, als haer dat bloet
hindert, so snijden sy met die tanden ouer die
huyt henen, daer loopt dan dat bloet wt, dat
is so veel als wanneer men hier eenen coppen
set. Vanden seluen tanden ná ick een, meynen-
de hem daer mede die mediaen te slaen, maer
ick en costte daer mede niet door ghesteken,
want den tant was te bot, ende sy stōden om
my. Als ick nv weder van hem ginck, sach ick
dat geen profijt en was: doen vraechden sy my
oft hy weder ghesont soude worden. Ick seyde
haer, icken hadde niet wt gerecht, daer en was
gheen bloet wt ghelopen, dat hadden sy wel
gesien. Ia meyndden sy hy wil steruen, wy wil-
len hem eer hy sterft doot slaen. Ick seyde neen
en doet dat niet, hy sal moghelijk wederom
ghesont worden, maer ten halp niet, sy toghen
hē voor des conincx Vratinge hutten, en haer-
der twee hielden hē, en hy was so crāck dat hy
niet en wist wat sy met hē doē woudē, so quā
die diē hy gegeuē was doot te slaen, en floech
hē opt hooft dat die herffenē wt sprōgen, daer
lieten si hē liggen voor die hutte, en woudē hē
eten. Ick seyde dat sijt niet en dedē, het was een
cranck mensche geweest, sy mochtē oock sieck
wordē, also en wistē sy niet wat sy doē soudē,



doch quam daer een wter hutten daer ick in
 was, enderiep die wijs dat sy een vier by den
 dooden maectē, ende hy sneet hem dat hooft
 af, want hy en hadde maer een ooge, en schein
 leelijck vāder sieften die hy gehadt hadde, also
 dat hy dat hooft daerom wech werp, ende het
 lichaem sengde hy die huylt af ouer t vier. Daer
 na sneet hy hem, ende deylde den anderē oock
 ghelijck so haer gewoonte is, en aten hē op tor
 aen den cop en op die dermen na, daer wisten
 sy gebreck aen om dat hy cranck geweest had-
 de. Daer ginck ick ouer en weer door die hut-
 ten, inde eene braeyden sy de voeten, inde an-
 dere die handen, inde derde die stucken vande
 lijue. Doen seyde ick henlieden hoe dat die Ca-
 rios dien sy daer brieden en eten wouden, had
 de

de my alijt beloghen, en seyde ick hadde som
mige vā uwen vrienden (ter wijlen dat ick by
den Portugaloisers was geweest) gheschoten,
ende het was ghelogen, want hy en hadde my
noyt ghesien, nu weet ghy wel dat hy sommi-
ghe iaren onder v gheweest is, ende noyt cranc
gheworden, nu euen wel om der logenen wil
die hy op my gheloghen heeft, is mijn God
toornich geworden en heeft hē sieck gemaect,
en v den sin gegeuen dat ghy hē gedoot hebt,
ende oock etē sult, also sal mijn God alle scalc-
ken doen die my leet gedaen hebben en noch
doen willen. Voor sulcke woorden verscrietē
haerder veel, des dancke ick den almachtighen
God dat hy in allen dinghen so geweldich en
ghenadich tot my waerts hem verthoonde.

*Bidde daerom den Leser dat hy vvel achtin-
ghe hebbe op mijn scrijue, vāt ick en doe dese
moeyte niet in sulcker vvijsē als oft ick lust had-
de vvat nievs te scrijuen, maer alleen om dat
ick die oprechte vvaerheyt ende die vveldaet
Gods aen den dach brenghen soude.*

So naeste nu den tijt dat sy woude ten crijch
trecken, daer sy drye maenden op toegherust
hadden om dien te voeren, so hoepte ick alijt
als sy wt trocken, sy souden my by den vrou-
wen thuys laten, en so woude ick ter wijlen sy
wt waren ontloopen sijn.

*¶ Hoe een Françoys schip aen quam en
metten wilden handelde van catoen en
Brasiliehout, tot welck schip ick geerne
gheweest hadde, maer het en was van
God niet versien. Dat XL. Cap.*

ON trent acht dagen te vorē als sy wou-
den ten crijch wt varen, soe wasser een
Françoys schip acht mijlen van daer
aen comen, in een hauene die welcke die Por-
tugaloisers Rio de Ienero noemden, en op der
wilden sprake Iteronne, daer pleghen die Fran-
choysen Brasilie hout te ladē: so quamen sy nu
by dat dorp oock aen daer ick in was met hare
boote, ende buerten den wilden peper, meer-
cattē ende papegaeyen af, ende daer quam een
wtē boot aent lant die der wildē sprake cost,
en hier Iacop, die selue hādelde met haer, dien
badt ick dat hy my mede te schepe name, maer
mijn heeren seyden neen, sy en wouden my so
niet wech schicken, maer wouden veel waren
voor my hebbē. Doen seyde ick haer dat sy my
selue by dat schip brochten, mijn vrienden sou-
den haer waren genoeg geuen. Sy meynden
neen, dat en sijn v rechte vriendē niet, wāt die
hier metten boot sijn hadden v ten minstē een-
hēbde gegeuen, midts dat ghy naest gaet, maer
sy



sy en achten niet op v (alfoot oock waer was)
 maer ick seyde, sy fullé my int groot schip cle-
 den als ick daer quame. Sy seyden, dat schip en
 soude so corts niet wech varen, sy moesten ten
 crijch, maer als sy weder quamen, wouden sy
 my daer by voeré. So woude nv den boot we-
 derom wech varen, wát het hadde eené nacht
 by dat dorp gheanckert. Als ick nu sach dat sy
 metté boot weder wech wouden varé, dacht
 ick: O ghy genadige God, als dat schip nv ooc
 wech vaert en my niet mede en neemt, sal ick
 toch noch onder haer om dé hals comen, wát
 het is een volck daer geen betrouwen in en is.
 Met dien ghedacht ginck ick ter hutten wt nae
 dat water toe, ende sy werdent ghewaer, ende
 liepen my na, Ick liep voor haer henen, ende sy
 I 4 woude

wouden my grijpen, maer den eersten die my
aen quam sloech ick vā my, ende daer was dat
heel dorp achter my, doch ontquā ick haer, en
swam by den boot. Als ick n vindē boot clim
men-woude, stieten my die Frācoysen weder-
om wech, en meynden, waert dat sy my tegen
der wilden dāc wech namen, mochten sy ooc
teghen haer opstaen, ende oock haer vyanden
wordē. Daer swam ick bedroeft wederom na
den lande toe, en dachte, nv sie ick wel dattet
Gods wille is dat ick langher inder ellenden
blijue: ende waert dat ick dat ontloopen niet
versocht en hadde, so soude ick achter nae ghe
meynt hebben het waer mijn schult geweest.
Als ick nv wederom by haer aent lant quam,
waren sy vrolijck, ende seyde, neen, hy coempt
weder. Doen was ick gram ende seyde, meynt
ghy dat ick v so ontloopen woude, Ick hebbe
daer inden boot gheweest ende mijnen lants-
lieden gheseyt dat sy haer op schicken soudē
tegen dat ghylieden wt den crijch quaemt en
my derwaerts brenget, dat sy dan veel waeren
by malcanderen hadden, ende v gauen; allulcx
behaechde haer wel, ende waren wel te vrede.

*¶ Hoe dat die wilde inden crijch trockē
ende my mede namen, en hoe dat op den
tocht verginck.* *Dat XLI. Cap.*

Daer

DAerna in vier daghen verfaemden haer
sommighe naeckers die totten crijch
wouden treckē in dat dorp daer ick in
was, daer quam die ouerste Konyá Bebe met-
ten sijnen oock daer by. Doen seyde mijn hee-
re, hy woude my mede nemē. Ick seyde dat hy
my thuys liet, en hadt oock wel ghedaen, maer
doen seyde die Konyan Bebe hy soude my
mede nemen. Ick en geliet my niet anders dan
dat ick noode met trocke, op dat sy als ick ghe
willich mede ghetrocken hadde, niet gedacht
en hadden dat ick haer ontloopen soude als sy
by haerder vyanden lant quamen, ende des te
min acht op my hadden. Oock was mijn mey-
ninghe als sy my hadden thuys ghelaten, ick
woude na dat Françoys schip ghelooopen sijn,
maer sy namen my mede, ende warē xxxviij.
naeckers sterck, ende elcken naecker beset met
xviij. mans, meer oft min, en haerder sommi-
ghe hadden ghepropheteert met haren afgodē
vanden krijch met droomen ende ander geck-
spel meer, dwelc sy ghebruyckē, also dat sy wel
ghemoet waren totter sake. En haer meynin-
ghe was in die teghenheyt Brikioka te varen
daer sy my vinghen, en haer daer ront om op
lant verstrecken, ende die ghene die haer in dier
maten inde handen vielen, om die met te ne-
men. Ende als wy den wttocht des crijchs be-
gosten, was int iaer M. CCCCC. ontrent den

xiiij. Augusti. So loopen nu in dese maent (so
voorgheleyt is) een gheslecht van visschen (die
inde Portugaloisers sprake Doyngo heetē, op
Spaensch Lieffes, en inder wildē sprake Bratti)
wter zee inde soete wateren om daer in te lig-
ghen, ende die wilde heeten den tijt Pirakaen,
als dan trecken sy vā beyde sijden gemeynlijck
ten crijch waert, haer vyāden so wel als sy, om
die visschen op de reyse te vanghen en te eten.
Als sy daer henen varen, varen sy saechte, ende
als sy wederō varen, varen sy opt geringste dat
sy connen. So hoepte ick nu alijdt dat die oock
souden opte reyse sijn die welcke der Portu-
galoisers vrienden sijn, want die selue waren
oock inden wil desen int lāt te vallen, also my
die Portugaloisers te voren int schip gheseyt
hadden. Sy vraechden my doorgaens opte rey-
se wat my dochte, oft sy oock yemant vangen
soudē, en op dat icxse niet grā en maecte, seyde
ick Ia, Ooc seyde ick haer, die vyāden sullē ons
vertegenen, soe laghē wy eenen nacht in eenen
hoeck lants die Vwattibi heet, daer vingen wy
veel vā dien visschē Bratti, die welcke so groot
sijn als eenē goedē snoeck, en het waeyde dien
nacht seer, so geften sy met my ende wouden
veel vrāghen. Soe seyde ick, desen wint waeyt
ouer veel dooden lieden, Nu wasser eenen an-
deren hoop van desen oock te water aen een
riuierē tusschen dat lāt henen geuaren, genaēpt
die

die Paraibe, Ia meynden sy hoe na hebben die
der vyanden lāt alreede aengeuallen, dat haer-
lieder sommighe sijn doot bleuen. Als wy nv
een dachreyse vā daer waren daer si haren aen-
slach volbrengchen wouden, legherden sy haer
int bosch by een eylāt welck sancte Sebastiaen
vanden Portugaloisers ghenaeamt wort, maer
die wilde heetent Meyenbipe. Als den auont
aen quam ginck die ouerste Konyan Bebe ghe-
naēpt door den leger henen int wout preken-
de ende seyde, sy waren nv nae by der vyanden
lant comē, dat een yeghelijck sijnen droō ont-
hiele die hem dien nacht droomē soude, ende
dat sy toe saghen dat haer wat ghelucx droom-
de. Als die reden wt was dansten sy tot inden
nacht met haren afgoden, daer na sliepen sy: en
als mijn heere hē neder leyde, seyde hy, Ick sou-
de my oock wat goets droomen latē. Ick seyde
ick en achte op gheen droomen, sy sijn valsche,
so maeft met uwen God euē wel dat wy van
den vyanden vanghen moghen. Als den dach
nv opbrack, versaeden haer die ouerste om een
becken vol gesodens visch, den welcken sy atē,
ende vertelden die droomen sō veel datse haer
wel gheuielē, sommighe die dansten met ha-
ren afgoden, ende sy hadden voorghenomen
ende waren vanden wille om op dien seluen
dach na by haerder vyāden lant te varē, by een
plaetse Boywassukanghe genaempt, ende daer
wou-

wouden sy beyden tot dat den auont quam.
Als wy wt voeren vā die plaetse daer wy dien
nacht ghelegen hadden Meyenbipeghenaēpt,
vraechden sy my noch eens wat my dochte.
Doen seyde ick, ter auontueren by Boywassu-
kanghe sullen ons die vyanden verteghenen,
sijt maer wel ghemoet, ende by dat selue Boy-
wassukange was mijn meyninghe woude ick
haer ontloopen sijn waert dat wy daer waren
comen, want daer sy my gheuangen hadden,
en was maer ses mijlen weechs vanden seluen
hoeck. Als wy nv so voort lancx dat lant henē
voeren, saghen wy oock naeckers die quamen
ons regen achter een eylant henen, doen riepē
sy, daer comen onse vyandē die Tuppin Ikins
oock aen, doch wouden sy haer verberghen
achter eenen steen metten naeckers, op dat sy
onuerfiens by haer comē souden: euen wel so
werden sy onser gewaer, en gauen haer weder
ter vlucht na haren thuys, ende wy roeydē opt
haestichste na wel vier ganssche vrē lanck, daer
na quamen wy aen haer, ende haerder waren
vijf naeckers vol, ende waren al van Brikioka.
Ick kendese al tsamen wel, ende daer waren ses
Mammelucken in een van die vijf naeckers, en
die selue waren ghedoopt, onder haer waren
twee ghebroeders, die een ghenaeamt Diego
de Praga, die ander Domingo de Praga, die sel-
ue twee deden groote weyre, die een met eenē
roere



roere, die ander met eenē flits booge: die twee
 hielden op in haren naecker twee heel vren te-
 ghen meer dan dertich vandē onsen naeckers.
 Als sy nv hare pijlen verschoten hadden, vie-
 len die Tuppin Imba haer aen, ende namen se
 gheuangen, ende sommige werden ter stōt
 doot gheslaghen ende geschoten, ende beyde
 die broeders en werden niet ghewont: maer
 twee vanden ses Mammelucken werden seer
 heerliken gewōt, en vandē Tuppin Ikins ooc
 sommige, onder die welcke een vrouwe was.

¶ Hoe sy metten gheuangen en om gin-
 ghen als sy wederom thuys trocken.

Dat XLII. Capittel.

Het



H Et was twee groote mijlé weechs van
den lande inder zee daer sy geuanghen
werden, si haesten haer opt haestichste
dat sy costé weder na dat lant, om haer weder
te legheren daer wy dien nacht te voren lagē.
Als wy nu by dat lant te Meyenbipe quamen
waft auont dat die sonne onder gaen woude:
daer leyden sy die geuangenē een yegelijck in
sijn hutte, maer die seer ghewont waren, troc-
ken sy aent lant, ende sloegen se voort doot, en
smeden se op haer maniere in stuckē, ende brie-
den dat vleesch. Onder die, die dien nacht ge-
braden werden, waren twee Mámelucken die
welcke Christenē warē, die eene was een Por-
tugaloiser Georgio Ferrero genaēpt een hooft
maus sone, den welckē hy gecregen hadde van
eender wilder vrouwen. Die ander hiet Iero-
nymus

nymus, den seluen hadde een wilde geuangen
die wt onser hutten was daer ick in was, en sij
nen naem was Parwa, die selue briet den Iero-
nymum ontrent een scherde weechs van daer
ick lach: die selue Ieronymus (God heb sijn sie-
le) was Diego de Praga maechschap. Den seluē
auont als sy haer gelegert hadden, ginck in die
hutten daer sy beyde die broeders in hadden
met haer te spreken, wāt het warē mijn goede
vrienden te Brikioka daer ick geuangen wert,
doen vraechden sy my oft sy oock geten soude
worden. Ick seyde haer, dat sy dat moesten stel-
len inden wille des hemelschē vaders, ende sijn-
nen lieuen sone Iesu Christi des ghecruyften
voor onse sondē, in wiens name wy gedoopt
sijn met hē inden doot, den seluen gelooue ick
oock dat hy my so langhe behoet heeft onder
haer, en wat die almachtige God met ons aen-
slaet, daer met moeten wy te vrede sijn. Voort
vraechdē my beyde de gebroeders hoe dat met
haren neue Ieronymum was, ick seyde haer, hy
lach by dē viere en briet, en daer was alreede eē
stuck vā des Ferrero soō getē dat hijt gesiē had-
de: doen weendē sy: ick troostese weder en sey-
de haer, sy wistē wel dat ick acht maēt oft daer
ontrent onder haer gheweest was, en dat God
my bewaert hadde, dat sal hy met v ooc doen,
betrouwt hē. Voort seyde ick, het soude my met
recht meer ter herten gaen dā v, wāt ick ben wt
vreem-

vreemde landen , ende den scrickelijcken hādē
van dien lieden niet ghewoon, ghy sijt hier op
ghetoghen ende gheboren. Ia meynden sy, ick
was so inder ellenden verhardt, ick en achtens
niet meer. Als ick nu inde rede met haer was,
hieten my die wilde vā haer gaen in mijn hut-
te, en seyden wat ick so langhe reden met haer
hadde, ende het deyrde my dat ick moeste van
haer gaen, ende seyde haer dat sy haer ganf-
lijcken inden wille des heeren geuen moesten,
sy saghen wel wat wy al allenden ende armoe-
den in dit iamerdal haddē. Sy seyde sy en had-
dens noyt so wel verfocht als nu, en meynden
sy waren God docheenen doot schuldich, sy
wouden oock des te vrolijcker steruē, ter wij-
len ick oock by haer was: daer mede ginck ick
wt haerder hutten, ende ginck door den ganf-
schen leger, ende besach die gheuangenē. Ick
ginck so alleen, ende niemant en achte op my,
ende hadde die reyse wel connen ontloopen,
want ick was by een eylant Meyenbipe ghe-
naempt, dwelck ontrent thien mijlen weechs
van Brikioka is, maer ick liet om dē gheuange-
nen Christenen wille, vanden welcken noch
vier leuendich waren, wāt ick dacht, ontloope
ick haer, so worden sy toornich, ende slaen die
selue dan ter stōt doot, ende in middelen tijde
mach ons God al te samen met malcāderen be-
waren, ende dacht also by haer te blijuen ende
haer

haer te troosten, alsoe ick oock dede. Ende die wilde waren my seer gunstich, om dat ick haer te voren gheseyt hadde op auentuere, die vyan den sullen ons teghen comen, alsoot nu oock gheuiel, en sy seyden, Ick waer beter Propheet dan hare Markaya.

Hoe sy met haren vyaden dāsten daer wy des anderen daechs ons legherden.

Dat XLIII. Capittel.

DEs anderen daechs quamen wy niet verre van haer lantschap by een groot gheberchte Occarasu gheuaempt, ende daer legherden sy haer om dien nacht daer te bliuen. Doen ginck ick in des ouerstē conincx hutten Konyan Bebe gheuaempt, en vraechde hem wat hy metten Mammelucken inden sin hadde. Hy seyde, sy souden geten worden, en verboot my ick en soude niet met haer spreken, want hy was seer gram op haer, sy souden thuys gebleuen sijn, ende niet met sijnen vyan den gesaen oft ghetrocken hebben teghen hē. Ick seyde hem, hy soudese leuen latē, ende hare vrienden wederō vercoopen. Hy seyde sy souden geten wordē. Ende die selue Konyan Bebe hadde eenen grooten corf vol menschen vleesch voor hem, en adt van eenen beene, en hieldet my voor den mont, ende vraechde oft

K ick



ick ook eten woude, ende ick seyde: een onuer
 nuftich dier en eet vanden anderen niet, sou-
 de dan die een mensche vanden anderen eten?
 hy beet in dat been, ende seyde *Ia varesche*,
 Ick bē een Tyger dier, het smaect my wel, daer
 mede ginckick van hem. Den seluen auōt ghe-
 boot hy, een yghelijck soude sijnen gheuan-
 genen voordat wout brengen by dat water op
 een plaetse, en dat ghebuerde also. Daer verga-
 derden sy haer, en maecten eenen grootē dans
 al rontom, daer stonden die gheuangenen in,
 daer moesten die gheuanghenen alle ghelijck
 singhen ende ratelen metten afgodē Tamma-
 raka. Als syn v ghesonghen hadden, begosten
 sy te spreken die een nae den anderen so vry-
 moedich, ende seyden: Iae wy trocken wt als
 cloecke

vloecke lieden plegen om onse vyanden te van-
ghen ende teten, nu hebt ghy die ouerhant
gecreghen ende hebt ons gheuange, maer wy
en vraghen niet daer na, die weyrachtige ster-
cke lieden steruen in haerder vyanden lant. Soe
is nu ons lant groot, die onse sullen haer aen v
wel wreken. Ia seyde die ander; Ghy hebt van-
den onsen veel verdaen, dat willen wy aen v
wreken. Als die reden wt was, voerde een ye-
ghelijck die sijne wederom in sijn logement.
Daer na ten derden daghe quamen wy weder
in haer lantschap, ende een yeghelijck voerde
sijn gheuanghenen daer hy thuys was. Die in-
den dorpe Vwattibi woonden daer ick in was
hadden acht wilde leuendich gheuanghen, en
drye Mamelucken dat welcke Christenen wa-
ren, namelijk Diego de Praga ende sijn broe-
der Domingos de Praga, ende daer toe oock
noch een Christen die Antonio hiet, den sel-
uen Antonio hadde mijns heeren sone ge-
uanghen met noch twee ander Mammeluc-
ken, die welcke oock Christenen waren, ende
die voerden sy ghebraden thuys om die daer
te eten. Ende het was den elfsten dach doen sy
wederom thuys quamen van dien dach aen te
rekenen dat sy van huys voeren, binnen wel-
ken tijt sy dese victorie teghen haer vyanden
ghecreghen hadden, daer sy so wreedelijck en
onmenschelijck mede omginghen.

*Hoe dat Franchoy's schip noch daer
was daer sy my brenghen wouden alsoe
sy geloeft hadden als sy wederom wt dē
crijch quamen, &c. als voorghemelt is.*

Dat XLIII. Capittel.

ALs wy nv weder vāden crijch thuys co-
men waren, begheerde ick van haer dat
sy my wouden na dat Frāçoy'sche schip
voeren, want ick was met haer ten crijch ghe-
weest, en hadde hare vyanden helpen vangen,
vanden welcken sy nv wel ghehoort hadden
dat ick gheen Portugaloiser en was. Sy seyden
Ia, sy woude my daer by voeren, maer sy wou-
den eersten rusten, ende eten den Mokaen, dat
is, dat ghebraden vleesch van beyde den Chri-
stenen.

*Hoe sy nv den eersten vanden twee
Christenen atē, namelijk Georgio Fer-
rero des Portugaloisers hooftmās sone.*

Dat XLV. Capittel.

SO wasser nv een coninck ouer een hutte
recht teghen mijn der hutten ouer, die sel-
ue was ghenaeemt Taramiri, die hadde
eenen ghebraden, ende liet dranck maken nae
haer

haer ghewoonte, en haerder veel versamelden
haer daer, dröcken, songen, en maecten groote
vruecht. Des anderen daechs na dat drincken,
soden sy dat ghebraden vleesch wederom op,
en atent. Maer des anderen Ieronymi vleesch,
hinck inder hutten daer ick in was in eenen
corf ouer dat vier inden roock wel dry weken
lanck, dattet also drooghe was als een hout, en
dattet so lange ongegeten hinck ouer dat vier
was dese oorſake: Die wilde diet hadde was
genaëpt Parwa, en die was op een ander plaet
ſe ghetrocken wortelen te halen om den drack
te maken om des Ieronymi vleesch daer mede
te bedrincken, dat den tijt also verliep: en sy en
wouden my niet eer na dat ſchip voeren, sy en
hadden dan eerſt die feeſte met Ieronymū ghe
houden en dat vleesch geten. Binnē deſen mid
delen tijde was dat Frāchoys ſchip wederom
wech gheuaren, want het mocht ontrent acht
mijlen weechs van daer ſijn daer ick was. Als
ick die tijdinge hoorde, was ick ſeer bedroeft:
maer die wilde ſeyden, ſy pleghen ghemeyn
lijck alle iaer daer henen te comen, ende also
moefte ick te vreden ſijn.

*Hoe dat die almachtighe God een tee
ken dede.*

Dat XLVI. Capittel.

K 3

Ick

Ick hadde een cruys gemaect van staken, by dat welcke ick dicwils mijn geber dede tot ten heere, ende ick hadde den wilden beuolen sy en soudent niet wt trecken, haer mocht ongeluck daer af comē, maer sy verachtē mijn woordē. Op een tijt was ick met haer opte vischeryen, en daer en tusschē hadde een vrouwe dat cruys wt getrocken, ende hadt haren man ghegeuen om dat ront was, die soude haer een soerte van Pater nosters op wrijuen, die welcke sy van zeeslecken huyskens maken, dwelck my nu seer verdroot. Corts daer nae begofstet seer te reghenen, ende duerde sommighe dagē. Sy quamen in mijn hutte, begherende ick soude met mijnē God maken dat den regē mocht ophouden, want waert dat niet op en hiel, het



sonde

soude haer plantinge verachten, wāt haren
plāt tijt was daer. Ick seyde het was haer schult
want sy hadden mijnen God vertoornt dat sy
dat hout hadden wt ghetrocken, want by dat
hout plach ick met mijnen God sprake te hou
den. Als sy nv meynde dat dat de oorsaec was
des reghēs, so hielp my mijns heeren sone we
der een ander cruys oprechtē, en het was doen
ontrent een vre na middach nae der sonnen te
rekenen. Alst opgherecht was, werdet terstont
schoon weder, ende het was voor middaghe
seer onghestadich. Sy verwonderden haer alle,
en meynde mijn God dede al wat ick woude.

*Hoe ick op eenen auont met twee wil
de op die visscherye was, ende God een
wonder by my vertboonde door eenen
groeten reghen ende onweder.*

Dat XLVII. Capittel.

I Ck stont ende vischte met noch twee van
henlieden, waer af die eene oock een vāden
vernaemsten was onder den wilden, ende
was Parwa ghenaeamt, die Ieronymū ghebra
den hadde. En als wy metten anderen stōden
ende vischten, soe verhief hem eenen grooten
wint en reghen met eenen donder int affchey

den vanden daghe, en reghende niet verre van ons, so dat den wint den regen heel na by ons dreef. Doen baden my beyde die wilde dat ick met mijn God spreke woude, dat ons den reghen niet en mocht hinderen, moghelijck sulen wy noch meer visschen vanghen, want ick sach wel wy en hadden inder hutten niet te eten. Die woorden beweechden my, ende ick badt den heere wt gront mijns herten dat hy sijn macht by my woude bewijfen ter wijlen die wilde dat van my begeerden, op dat sy nv sien soudē dat ghy mijn God alijt by my sijt. Als ick dat ghebet voleyndt hadde, so coempt die wint metten reghen aen pruyfen, ende het reghende ontrent ses screden van ons, ende op die plaetse daer wy waren en vernamen wy niet, so dat die wilde Parwa seyde: Nv sie ick wel dat ghy met uwen God gesproken hebt, en wy vinghen sommige visschen. Als wy nv inder hutten waren, seyde alle beyde dese wilde den anderen wilden dat ick met mijn God ghesproken hadde, ende sulcke dinghen ghebuert waren, daer af verwonderden haer alle die andere.

Hoe sy den anderen vanden twee gebraden Christenen aten, Ieronymus ghe-naempt. Dat XLVIII. Capittel.

Als

ALs nu die wilde Parwa alle gereetschap by malcanderen hadde, als geseyt is, liet hy dranck maken om des Ieronymi vleesch te bedrincken. Als sijt bedroncken hadden, brochten sy die twee ghebroeders by my en noch eene, Antonius genaempt, den welken mijns heeren soongheuanghen hadde, so dat onser vier Christenen by den anderen waren, ende moesten met haer drincken, maer eer wy drincken wouden, deden wy ons ghebet tot God dat hy der sielen ghenadich woude sijn, ende ons ooc als onse vre quame, ende de wilde alden met ons, en waren vrolijck, maer wy saghen groot ellende. Des anderen daechs des morghens vroeck soden sy dat vleesch weder op, ende atent, ende haddent op een corte tijt vernielt. Den seluen dach voerden sy my te verschencken. Als ick nu van beyde die ghebroeders schiet, badē sy my dat ick God voor haer bidden soude, ende ick gaf haer raet waert dat sy ontloopen costen, waer dat sijt henen nemē souden int gheberchte, op dat sijse niet en costen nae gheuolghen, want ick des gheberchs kenschap hadde, dwelck sy oock gedaen hadden, waren so los worden en ontloopen, also als ick naemaels vernam: oft sy weder gheuanghen werden, en weet ick noch niet.

¶ Hoe sy my voerde om te verschenckē.

Dat XLIX. Capittel.

SY voeren met my daer henen daer sy my verschencken wouden Tackwara sutibi genaempt, ende als wy een stuck weechs vanden lande waren, sach ick om na die hutte daer ick wt voer, en daer was een swerte wolcke ouer die hutten. Ick wees haer dat en seyde, mijn God was toornich ouer dat dorp dat sy dat Christen vleesch geten hadden, &c. Ende als sy my daer brachten, leuerden sy my inden handen van eenen coninck Abbati Boffange genaempt, den seluē seyden sy dat hy my geenen ouerlast doen oft latē doen en soude, wāt mijn God was vreesselijcken ouer die my leet deden, want dat hadden sy ghesien doen ick noch by haer lieden was: en ick dede hem seluen oock een vermaninghe ende seyde, mijn broeder ende mijn vrienden soudē corts comen met een schip vol waren, dat sy my slechts wel bewaerden ick woode haer dan veel waren geuen, wāt ick voorwaer wiste mijn God soude mijns broeders schip corts aen brengē. Dat behaechde haer wel, ende de coninck hiet my sone, ende ick ginck oock met sijnen sonen op het weydewerck.

*¶ Hoe dat my de wilde van dien dorpe
vertelden, hoe dat dat voorghemelde
schip*

Schip wt Franckrijck weder wech gheseylt was. Dat L. Capittel.

Die wilde van dien dorpe seyde my, hoe dat dat voorghenoomde schip Maria Bellette genaempt van Diepen daer ick geerne in gheweest hadde, aldaer volle ladinge ghecreghen hadde, namelijk Brasiliehout, peper, cattoen, vederwerck, meercatté, papegaeyē ende dierghelijcke ware als daer valt, ende sy hadden daer inder hauen en Rio de Ienero een Portugaloisers schip ghenomen, ende hadden een vanden Portugaloisers eenen wilden coninck Itawu ghe-naempt ghegeuen, en die had de hem geten. Oock was die Françoys in dat schip die den wilden beuolen hadde doen ick gheuanghen wert dat sy my eten souden, ende die woude wederom na huys varen, ende dat was dat schip (als voor verhaelt is) als ick den wilden ontliep, ende by haren boot swom, en sy my niet in nemen en wouden. En dat selue was om comē oft bleuē opte wederom reyse, want niemant vernomen hadde waer dat bleue doen ick metten anderen schepe in Francrijck quam, also namaels verhaelt wort.

Hoe dat corts na dat ick verschoncken was een ander schip wt Francrijck qua die my cochten, &c. Dat L I. Cap.

Ick

Ick was ontrent xiiij. dagē int dorp Tarc-
warasutibi, by den coninc Abbati Boffan-
ge, so ghebuerdet op eenen dach dat som-
mige wilde by my quamen, en seyden sy hoor-
den schietē, dat moeste in Iteroenne sijn, wel-
ke hauene oock geheeten wort Rio di Ienero,
als ick nu sekerlijck wiste datter een schip was,
seyde ick haer dat sy my daer brochten, want
het moghen mijn broeders sijn, sy seyden Iae,
maer hielden my noch op sommighe daghen.
In middelen tijde so ghebuerde dat die Fran-
choysen die daer in comē waren hoorden dat
ick daer onder die wilde was, doen schiēte die
Capiteyn twee ghesellen vanden schepe (met
sommighe wilde coninghen, die welcke sy te
vriende haddē) inden vleckē daer ick in was,
en quamē in een hutte waer af die coninc So-
warasu hiet, vast byder hutten daer ick in was,
my wert die tijdinghe bracht vanden wilden
dat daer twee vāden schepe comen waren, ick
wert blijde ende ginck tot haer, en hietse wil-
lecome inder wildē sprake. Als sy my nu so el-
lendich sagen gaen, hadden sy medelijden met
my, ende deylden my vā haer cleederen mede.
Ick vraechde haer waerom sy comē waren, Sy
seyden om mijnent wille, haer was beuolen
dat sy my te schepe brachtē. Doen verblijde ick
my vā herten ouer die bermherticheyt Gods,
en ick seyde tot een vanden tweē Perot ghe-
naempt;

naempt, die welcke der wildē sprake coste, hy
soude te verstaen gheuen dat hy mijn broeder
ware, ende hadde my sommighe kisten vol co
menschap gebracht, dat sy my met haer te sche
pe brachten, ende die kisten haelden, ende dat
hy te verstaen geuen soude dat ick onder haer
blijuen soude om peper ende meer ander wa
re te vergaderen tot dat die schepē weder qua
men op dat ander iaer. Na dien woordē brach
ten sy my met haer te schepe, ende mijn heere
tooch seluer mede. Sy haddē int schip alle me
delijden met my, en deden my veel goets. Als
wy daer ontrent eenen dach oft vijue geweest
hadden int schip, vraechde my der wilden co
ninck Abbati Boffanghe, den welcken ick ghe
schenct was, waer die kisten waren, dat ickse my
liet geuen, op dat wy weder in tijts thuys co
men mochten. Die selue meyninghe seyde ick
den ouersten des schips, ende die beual my ick
soudese op houdē tot dattet schip sijne vollen
last hadde, op dat sy haer niet gram en maecken
oft ongemack onderstonden aen te nemen, en
eenighe verraderye aen rechten mochten, als
sy saghen dat sy my int schip behouden wou
den, om dat een volck is daer geen betrouwen
op en is, maer mijn heer die coninck meynde
gansselijcken hy woude my mede thuyswaert
hebben, maer ick hielt hem so langhe op met
woorden, en seyde hem dat hy niet so seer en
haeste,

haefte, want hy wist wel als goede vrienden te
samen comen, en costen so cortz niet gheschey
den, maer als sy metten schepe wech wouden,
dan souden wy oock wederom na sijnder hut
ten varen, ende hielt hem also op. Ten leste als
dat schip toegherust was, versaemden die Fran
coyen alle by malcanderen, ende ick stont by
haer, ende mijn heer die coninc met die hy by
hem hadde stoden oock daer. Ende die hooft
man des schips liet den wilden segghen met
sijnen taelspreker, dat hem wel behaechde dat
sy my niet ghedoodt en hadden, na dien sy my
onder haren vyanden gheuonden hadden, liet
hem voort segghen (om my met betere ghe
uoelicheyt van haer te brenghen) dat hy haer
wat gheuen woude om dat sy my so wel be
waert hadden, daerom hadde hy my met hem
int schip begheert, om dat hy my sommighe
ware doen soude, ende dat ick onder haer blij
uen soude ter wijlen ick by haer bekent was,
om peperende ander goet te vergaderen dat
hē dienende was tot dat hy weder quame. So
hadden wijt nu so ghesloten, dat een oft thien
vanden schiplieden versaemde, die welcke my
in eeniger maniere ghelijcken gonstich waren,
die selue gauen wt dat sy mijn broeders ware
ende wouden my mede thuys hebben. Dese
meyninge wert den wilden voorghehouden,
dat mijn broeders in geēder manieren en wou
den

den hebben dat ick weder aent lant soude
gaen, maer ick moeste thuys trecken, want ons
vader begheerde my noch eens te sien eer hy
storue. Doen liet hem die Capiteyn oock we-
der segghen, hy was die ouerste int schip, ende
hadde geerne dat ick wederom aen lant ginck,
maer hy en was maer een mensche, ende mijne
broeder waren veel, en en cost niet tegen haer
gedoen. Dat wtgheuen gebuerde also, om dat
sy met properheyt vaden wilden geraken sou-
den: ende ick seyde oock tot mijn heer die co-
ninck, Ick woude geerne weder met hē thuys
trecken, maer hy sach wel mijn broeders die en
woudens niet toe latē. Doen begoft hy te wee-
nen int schip, en seyde, als sy my wouden me-
de nemen, dat ick dá metten eersten schepe we-
der quame, want hy hadde my voor sijnen so-
ne ghehouden, ende was seer toornich op die
van Vwattibi dat sy my hadden willen eten.
En eene van sijnen vrouwen die welcke oock
mede int schip was, moeste my beschreyen na
haer ghewoonte, ende creet oock op haer ma-
niere. Daer na gaf haer de hooftman sommige
ware, weert sijnde ontrent vijf ducatē, in mes-
sen, aecxen, spieghelen en cammen. Daer mede
togen sy weder aent lant na haer wooninghe.
Also halp my die almogēde God wt der ty-
rannen gewelt: hē sy prijs en eere, door Iesum
Christū sijnen sone onsen salichmaker. Amen.

*¶ Hoe de ouerste des schips ghenaeemt
waren, ende vā waer dat het schip was,
en watter noch gheschiede eer wy wter
hauen en voeren, ende hoe lange dat wy
opter reysen na Vrancrijck waren.*

Dat LII. Capittel.

Die hooptman des schips was ghenaept
VVilhelm de Moner, ende die stiermā
Franchoyls de Schantz, dat schip was
genaemt Catharine van VVattuilla, &c. Sy
rusten dat schip toe om weder na Vrancrijck te
zeylen, so ghebuerdet op eenen morgen doen
wy noch inde hauenē Rio de Ienero ghenaept
laghen, dat een Portugaloisers schipken quam
en woude wter hauen en varen, en hadde ghe-
comenschap met een gheslacht wilden die
welcke sy te vriende hebben, ende heeten los
Markayos, diens lantschap stoot aen die Tup
pin Imba, welcke die Franchoyls te vriende
hebben, die beyde nationes sijn vyanden met
malcāderen, en het was dat schipken (so voor
verhaelt is) dat na my comen was om my van
den wildē af te coopē, en hoorde een Façtoor
toe Peeter Rosel ghenaept. Die Franchoyls
stakē haren boot wt wel versien met geschut,
voeren teghen haer in, ende meynden te ne-
men,



men, en namen my mede om dat ick met haer
 spreken soude dat se haer opgeue souden, maer
 als wy dat schip aenvielen, sloegen sy ons we-
 derom af, en also werden sommige Franchoy-
 sen gheschoten, ende sommighe ghewont, Ick
 wert oock totter doot toeghewont met eenē
 schoot veel meer dan yemant vanden ghenen
 die daer leuendich bleue waren, ende ick riep
 in desen ancx totten Heere, want icken voel-
 de anders niet dan des doots noot, ende badt
 onsen goedertieren God en vader dat hy my
 toch noch behoude woude, op dat ick in der
 Christen lantschap wederom comen mochte,
 en dat ick daer sijne aen my verthoonde wel-
 daet, anderen lieden oock vertellen mochte, ter
 wijlen hy my toch wt der tyrannen ghewelt
 L verlost



verloft hadde, ende ick bequā noch wederom
in volcomen ghesontheyt, gheloest sy der goe-
dertieren God van eewicheyt tot eewicheyt.

Anno M. CCCCC. ende Liiij. den lesten
Oftob. gingen wy inde hauene vā Rio de Ie-
nero tseyle, ende voeren weder na Vrancrijck.
VVy hadden ouer zee so goedē wint, dat haer
die schiplieden verwonderden, ende meyndē
dat een alsulcken weder een sonderlinge gaue
van God moest sijn, ghelijc oock wel te ghe-
loouen is. Oock dede die Heere een merckelijc
wonder teeken by ons op der zee: VVant op
den seluen dach voor den Kersdach quamen
veel visschen ront om dat schip, die welcke mē
zeeverckenē heet, en dier vinghen wy soe veel
dat wijer sommighe dagen ghenoech haddē.

Des

Des seluen ghelijcken oock op den heylighen
drye Coningē auont beschieſte ons God oock
viſſchen genoegh, wāt wy anders op die reyse
niet veel teten en hadden dan wat ons God
wter zee gaf. Daer na op dē xx. dach Februarij
oft daer ontrent, quamen wy int conincrijck
van Vracrijckinden Iare M.CCCCC. en Lv.
by een ſtedeken Honſlor genaempt, ende leyt
in Normandien. VVy en ſaghen op die ganſ-
ſche reyse int wederom comen gheen lant by
cans in vier maenden. Als wy nu te lande co-
men waren, ende ſy dat ſchip ontladen wou-
den, doen halp ick haer liedē oock. Als dat nu
oock ghedaen was, doen danſte ick haer liedē
van haer weldaet die ſy my bewezen hadden.
Daer na begheerde ick een paſpoorte vanden
hoofman, maer hy hadde lieuer gheſien dat
ick noch een reyse met hem aenghenomen oft
ghedaen hadde. Maer euen wel, doen hy ſach
dat ick gheenen luſt te bliuen en hadde oft
mede reysen en woude, ſo beſtelde hy my een
paſpoorte van Moenſoral Mirant, een ouerſte
in Normandien. Die ſelue oock, als hy van my
ghehoort hadde, dede hy my voor hem comē
en gaf my ſelue die paſpoorte, en mijn hoof-
man gaf my teyrgelt om ouer wech te comen.
Alſo nam ick doen oorlof, ende vertrock van
Henſloerna Habelnuef, ende van Habelnuef
track ick na Diepen.

*¶ Hoe ick te Diepen in des hooptmans
huys des schips Bellette genoert werde
daer hy de huysweert ende ouerste was,
die welcke voor ons wt Brasilië gereyft
was, ende noch niet comen.*

Dat LIII. Capittel.

DAt voorseyde schip Maria Bellete ghe-
naempt was vā Diepen, en daer in was
die taelspreker ooc, die dē wildē beual
datse my eten souden, ende die ghene die my
niet mede in haren boot nemen en woudē als
ick den wildē ontliiep, en haer hooftman was
die selue die den wilden eenen Portugaloiser
gegeuē hadde om te etē na dat hy hē sijn schip
ghenomen hadde: dese al tflamen waren voor
ons op de reyse om wederom in Vrancrijck te
varen, ende en waren met haren schepe Bellete
ghenaempt noch niet te lande comen als ick
daer quam, hoe wel sy nae die rekenschap van
dat schip VVattuilla (dwelck my vāden wil-
den cocht) drye maenden voor ons souden co-
men sijn. Deser seluer lieden wijs en vrienden
quamen by my, ende vraechden my oft icxse
niet vernomen en hadde. Ick seyde, Seer wel
heb icxse vernomen, daer sijn een deel godde-
loose lieden int schip, sy sijn waer sy willen, en

ver-

vertelde haer hoe datter een vā haer lieden onder die wilden geweest was die oock int schip was, die den seluen wildē beuolen hadde datse my eten souden, maer nochtās heeft my die almoghende God behoedet, ende seyde haer voort, hoe dat sy met haren boot by de hutten geuaren waren daer ick in was, en hadden den wilden peperende mercatten af ghemangelt, ende hoe dat ick den wilden ontloopen was, ende tot haer by den boot gheswommē was, maer dat sy my niet en haddē willen in nemē, en hebbe daerom wederom moeten aent lant swemmen onder den wilden, het welcke my doen oock eenen grooten hertsweer was, ende dat sy den wilden eenen Portugaloiser ghegeuen hadden om te eten, het welcke die wilde oock deden, ende hoe dat sy my geen sijn geen ghenade en haddē willen doen oft bewijfen: daer door sie ick nu oock wel dat het die lieue God soegoet met my ghemeynt heeft, dat ick (God sy lof) voor haer hier ben om v lieden die nieuwe tijdinghe te brenghen. Sy mogen oock comen als sy kunnen, maer ick wil v een Propheet sijn, dat sulcke ongenadicheyt ende tyrannie die sy daer int lant aen my ghedaen hebben (dwelck haer God vergheuen wil) en sal ongestraft niet bliuen, het sy int cort oft int langhe, want het was blijckelijck ende goet te sien dat my selue die heere God inden hemel

ontfermherticheyt ghetooont heeft. Noch seyde ick voort, hoe wel dat dien op de reyse ghegaen was die my vanden wilden gecocht hadden, also dat oock die waerheyt is, want God gaf ons goeden wint, oock goeden visch wter diepte vander zee. Sy hielden haer qualijcken, en meynden wat my dochte, oft sy oock noch voor handen oft leuende waren. Ende om dat ick haer niet heel quadē troost gheuen en soude, so seyde ick: Sy souden noch moghelijck comen moghen, hoe wel dat den meesten hoop ende ick anders niet rekenen en costen dan dat sy metten schepe verdroncken ende bleuen waren. Na alle dese woorden so schiet ick van haer, ende seyde, sy souden dē anderen weten laten oft sy quamen, God hadde my gheholpen, ende dat ick daer gheweest hadde. Van Diepen voer ick met een schip nae Londen in Enghelant, ende daer was ick sommighe dagen. Daer na voer ick van Londē in Zeelant, en van daer voer ick na Antwerpen. Also heeft my die almogēde God, (wien oock alle dinck mogelijck is) wederom in mijn vaderlant gheholpen. Hem sy eewelijck lof prijs ende danckbaerheyt van eewicheyt tot eewicheyt.

Amen.

*¶ Mijn ghebet tot God den Heere ter
wijlen dat ick inder wilden lieden ghe-
welt was om my te eten, &c.*

¶ Ghebet.

O Ghy almachticheyt, ghy die daer den
hemel ende aerde ghefundeert hebt,
Ghy God onser voorvaders Abrahā,
Isaac ende Iacob, Ghy die dat volck van Israel
so gheweldichlijcken wt haren vyanden han-
den gheuoert hebt door die roode zee. Ghy
die Danielē onder den leeuwē bewaert hebt,
vbidde ick ghy ewighe God gewelt-hebber
dat ghy my wilt verlossen wt der hāt van de-
sen Tyrannen die v niet en kennen, Om Iesus
Christus dijs lieuen soons wille, die welcke
die gheuanghenen verlost wter ewigher ghe-
uanghenisse, niet te min Heere ist uwen wille
dat ick sulcken Tyrannischen doot lijden sal,
van desen volck die v niet en kennen, ende seg-
ghen als ick haer van v segghe, Ghyen hebt
gheen macht my wt haren handē te nemen, so
sterct my inder lester vren als sy haren wil aen
my willen volbrenghe, dat ick dan niet en
twijffele aen uwe barmherticheyt. Ende moet
ick dan so veel lijden in deser ellende, so gheeft
my toch hier namaels ruste, ende behoet my

voor een toecomendé ellende daer voor alle
onſe voorvaders gheureeft hebben, euen wel
Heere ghy condt my wel wt haer ghewelt hel
pen, Helpt my, Ick weet Ghy condt my wel
helpen, Ende als ghy my geholpen hebt ſo en
wil ick dat den ghelucke niet toeſcrijuen, maer
alleen uwe gheweldige hant, ende dat die my
wt haerlieder ghewelt gheholpen heeft, ende
uwe weldaet wil ick prijſen ende int licht
brenghen onder alle menſchen
waer ick comen mach.

A M E N.

EYNDE DES EER-
ſten boecx.

EEN VVARACH-
TICH CORT BERICHT
VANDEN HANDEL ENDE ZE-
den der Tuppin Imbas, diens gheuangen ick
gheweest ben, woonende onder haer in dat
lantschap America, dwelck leyt inden xxiiij.
graet op der Zuydtsijden der linien equi-
noctiael, ende stoot aen een riuiere
Rio di Ienero ghenaeimpt.



*Gheprint Thant Verpen inden gulden Eenhoren,
by Christoffel Plantijn.*

I 5 5 8.

¶ Hoe die ſchipvaert beghint wt Portugal nae Rio de Ienero, ghelegghen in America, ontrēt indē xxiiij. graet Tropici Capricorni. Dat I. Capittel.



Isbona is een ſtadt in Portugal ghelegghen, inden 39. graet op de noord ſijde der linien equinoctiael, alſmen van Liſſebona wil af varen op die prouincie van Rio de Ienero, ghelegen int lantſchap van Braſilien datmen oock America noempt, ſoe vaertmen eerſtmaels op eylanden die heeten Cannarie, en behooren den coninc van Spaengien toe, en het ſijn die ſeſſe die hier genaempt worden. Deerſte Gran canaria. Het tweede Lanſerutta. Het derde Forte Ventura. Het vierde Il Ferro. Het vijfde La Palma. Het ſeſte Tineriſſe. Van daer vaertmen na eylandē die heeten Las Inſulas de cape virde, dat is ſoe veel geſeyt als Die eylanden des groenē hoots, welck groen hoot int ſwert mooren lant leyt, dwelck oock wel Gene ghenaept wort. Die voorgemelde eylanden liggen onder den Tropico Cancri, ende behooren den coninck van Portugal toe. Van dien eylandē ſeyltmen ſuyd weſt na dat lantſchap van Braſilien toe, ende is een groote wijde zee: men ſeylt drye maenden oft langher eer datmen in dat lantſchap coēpt.

Eerſt

Eerst seyltmen optē Tropicum Cancrī dat hy
achter blijft. Daer nae door die linien equino-
ctiael als men die noordtwaerts achter seylt, so
en sietmen die noordtsterre niet meer, welcke
mē oock noempt Polum articū. Daer na coept
men inder hoochde des Tropicī Capricorni,
ende men vaert onder die Sonne henen, ende
als men ouer die hoochde des Tropicī Capri-
corni is na die middaechs sijde, so vaertmē vā-
der sonnen af na den noorden toe. Daer is al-
toos groote hitte tusschen beyde die Tropicī,
ende dat voorghenoemde lant Brasiliē leyt
eensdeels inden Tropicis.

*¶ Hoe dat lant America oft Brasiliē
ghelegē is, so ick eensdeels gesien hebbe.*

Dat II. Capittel.

America is een groot lant, ende heeft veel
gesslachtē vā wildelieden, die selue heb-
ben veel veranderingen van spraken, en
daer sijn veel seltsame dieren. Het is lustich om
aen te sien, Die boomen sijn altijt groen, maer
het en heeft geen bosch oft hout dat den boo-
men, bossche oft houte vā desen lāde gelijk is.
Die liedē gaen naect, want het en is in dat deel
des lāts dat tusschē die Tropicis leyt in geenē
tijt des iaers so coudt als hier ontrēt Michaëlis
oft bamis. Maer dat deel des lants dat hē Suyd
waerts

waerts vanden Tropicus Capricorni ſtreĸt, is
wat couder, ende daer wonen een natie van
wilden die Carios heeten, die ſelue ghebruyc-
kē huyden vā wilde dieren, die welcke ſy eerſt
ſijn bereyden, ende haer daer mede bedecken.
Der ſeluer wilden wijs maken dinghen van
cattoen oft boomwollen garen ghelijck eenen
ſack, onder eñ bouen open, dat trecken ſy aen,
eñ heetēt op haer ſprake Typpoy. Daer ſijn int
lant ſommighe vruchten der aerden ende boo-
men daer haer die menſchē ende dieren mede
gheneren. Die lieden van dien lande ſijn root
ende bruyn van verwen, om der ſonnen wil
diele alſo ſeer verbrant, een geraſch volck ende
wel ghemaect van leden, liſtich tot alle boof-
heyt, ſeer gheneycht om haer vyanden te ver-
uolgen ende te eten, &c. Haer lantſchap Ame-
rica heeft ſommighe hondert mijlen noorden
ende ſuyden inde lengde, van welcken ick wel
vijfhondert mijlen lanx dat lantſchap henen
ghezeylt hebbe, ende een deel in veel plaetſen
des lants gheweest ben.

*¶ Van een gheberchte dwelck daer int
lant leyt.* *Dat III. Capittel.*

HEt heeft een gheberchte dwelck reyct
op drye mijlen na by der zee, maer op
ſommighe plaetſen voorder, ende op
ſommighe plaetſen naerder, ende beghint on-
trent

trent inder hoochden Boiga de todos los san-
ros, een plaetse also gheheeten daer die Portu-
galoisers gebout hebben, ende woonen. Ende
dat selue gheberchte streckt hem inder lengde
aen de zee 204. mijlen, en inde hoochde xxix.
gradus op der Suydtsijden der linien equino-
ctiael, Defen berch eyndet hem op plaetsen, en
is acht mijlen breedt, Achter den berch ist plat
lant, en daer comen veel schoone riuieren tus-
schen die bergen wt, ende heeft veel wilts. En
inde berghen onthouden haer een gheslacht
wilder lieden die VVayganna heeten, die selue
en hebben gheen vaste wooninghen ghelijck
die andere die voor ende achter die berghen
woonen. Die selue VVayganna hebben oor-
loghe teghen alle die andere natien, en waer sy
die krijghen, die eten sy, desghelicx also doen
die andere haerlieden oock. Sy treckē het wilt
na int gheberchte, ende sijn cloeck om wilt te
schieten metten hantboge, ende ghebruycken
veel behendicheden met andeten dinghen, als
sleypnetten ende vallen daer sy dat wilt mede
vangen. Daer is oock veel wilden honichs int
gheberchte, den welcken sy eten. Sy connen
oock ghemeynlijck ghelijck het gedierte blee-
ten, ende ghelijck die voghelen singhen op dat
sijse te beter verschalcken en schieten kunnen.
Sy ontfeken haer vier van twee houmerkens,
ghelijck die ander wilden oock doen, ende dat
vleesch

vleesch dat sy ghemeynlijck eten, braden sy. Sy
vertrecken met wijf ende kinderen, als sy haer
erghens achter legeren. Seer na by haren vyan
den lant vlichten sy thuynen vast om haer hut
ten henē, op datmen se niet haestelijckē en sou
de connen ouerloopen, en om der Tyger die
ren wil, steken oock scherpe doornen rontom
die hutten Maraba eibe Iu genaempt, ghelijck
soomen hier minckijfers leyt, ende dat doen se
wt yreesen vā haren vyandē, den heelen nacht
hebben se vier by haer, ende als den dach aen
coempt so doen sijt wt, op datmen den roock
niet en wort siende, ende haer na spuere. Sy la
ten lanck hayr opt hooft, ende langhe naghe
len aen die vingheren wassen. Sy hebben oock
ratelen Maraka gheenaempt ghelijck die ander
wilde, die welcke sy voor God houdē, hebbē
oock haren drackē en dansen: Oock wilde die
ren tanden daer sy mede snijden, ende steenen
beytels daer sy mede houwē, gelijk die ander
natieen oock gehad hebben eer sy metten sche
pen ghecomenschap hebbē. Sy trecken oock
dicwils wt na haren vyanden. Als sy die vangē
willen, legghen sy haer achter dorre houteren
die by haerder vyanden hutten staen, en doen
dat daerom, oft daer eenighe wt quamen van
haren vyanden om hout te halen, dat sijse dan
vanghen soudē. Sy gaen oock veel tyranne
lijcker met haren vyanden om, dan haer vyan
den

den met haer doen, want sy snijden haer di-
wils armen ende beenen al leuendich af van
groote nijt, maer die andere slaen haer vyandē
eerst doot eer sijse snijden om te eten.

*Hoe die wilde Tuppin Imba diens ge-
uangen ick was haer wooninge hebbē.*


Dat IIII. Capittel.

SY hebben haer wooninge voor dē voor-
ghenoemden grootē geberchte vast aen-
der zee, oock achter dat gheberchte streck
haerlieder wooninghe wel lx. mijlen, en daer
coempt een vlietende water wten bergen in-
der zee vlieten, dat selue bewoonen sy op een
sijde, en heet die Paraeibe, lancx dē zeestroom
henen, hebben sy outrent xxviii. mijlen lants
dat sy bewoonen. Sy sijn alomme met vyand-
den bedronghen, Op de Noordsijde palen sy
haer met een gheslacht wilden die VVeittaka
heeten, ende sijn haer vyanden, Op die Zuyd-
sijde sijn haer vyandē die de Tuppin Ikins ghe-
naempt worden, Te lande waerts in, sijn haer
vyanden Karaya ghenaept, Maer die VVay-
ganga die int geberchte vast by haer sijn, ende
noch een ander gheslacht die Markaya heeten,
en tusschen haer woonen, van dese hebben sy
seer groot veruolch. Die voorgenoemde ghe-
slachtē hebbē crijch door malcanderē henen,
ende

ende als deen den anderen vāgt, die eten sy. Sy
setten haer wooninghe gaerne daer sy dwater
ende hout oft bosch niet verre en hebben, om
wilt ende viſſchen te krijghen, ende als sijt op
een plaetſe verwoont hebben veranderen sy
haer wooninghe op een ander plaetſe. Ende
als sy dan willen haer huttē maken, verſaempt
een ouerſte onder haer een partye oft xl. mans
ende vrouwen, alle die hy ghecrijghen kan, en
dat ſijn ghemeynlijck vrienden ende maghen
onder malcanderen. Die ſelue rechtē met mal-
canderen een hutte op, die welcke is ontrent
xiiij. voet breed, ende wel xv. voet lanck, daer
na dat haerder veel ſijn, ende ſijn ontrent twee
vademen hooghe, bouen ront ghelijcke een kel-
der gewelfſel, dat ſelue decken sy dick met pal-
men rieten datter niet in en reghene, die hutte
is binnen al open, daer en heeft niemant geen
ghemack op ſijn ſeluen toeghemaeft, een ye-
ghelijcke partye wiſf en man heeft ſijn ruymte
inder hutten op een ſijde van xij. voeten, op
die ander ſijde deſgelijcx een ander partye, alſo
ſijn hare hutten vol, ende een yeghelijcke par-
tye heeft ſijn eyghen vier: Die ouerſte heeft ſijn
logement inder middelt vander hutten, ende
sy hebben oock alle ghemeynlijck drye poort-
kens oft doren, te weten, op elck eynde een, en
int midden eene, sy ſijn oock ſo leeghe dat sy
lieden moeten bucken als sy wt ende in gaen,
haer

haer dorpen hebben luttel ouer de seuen hut-
ten, endelaten een plaetse tusschen die hutten
daer sy haer gheuanghenen doot slaen. Oock
sijn sy geneycht tot sterften rontom haer hut-
ten te maken, die welcke ghemaect worden in
sulcker manieren ghelijck hier na volcht.

*Hoe dat sy haer hutten en stocketten
maken.* *Dat V. Capittel.*



SY maken een staecketsel om die hutten
henen van palmen hout oft van boo-
men, die cleuen sy van een. Dat staecket
is wel anderhalf vademmen hooghe, ende maec
kent so dicht dat geenen pijl daer tusschē door
comen en can. Sy hebben cleyne schietgaetkēs
daer in sy door wt schieten. Ende om dat staec
M kettsel

ketfel henēn maken si noch een ander staket vā grooten staken, maer sy en setten die stakē niet vast by malcāderen, maer wel also, datter geen mensche en can door ghecruypē, ende hebben sommighe die maniere dat sy die hoofdē van den ghenen die sy geten hebbē op de staecterfels steken voor aen den ingāck vander huttē.

¶ *Hoe sy vier maken. Dat VI. Cap.*

SY hebben een soerte van houte dat heeten sy Vrakueiba, ende dat drooghen sy, ende nemen dan twee stocxkens eenen vingher dick, ende wrijuen den eenen opten anderen, ende dan gheeft dat stof ende roock van hem, ende die hitte vanden wrijuen steect den stof aen, ende daer mede makē sy vier, also sy willen.

¶ *Vaer in dat se slapen. Dat VII. Cap.*

SY slapen in dinghen die sy heetē Iuni op haer sprake, en sijn van catoen garen ghemaect, ende die bindē sy aen twee palen bouen der eerden, ende hebben des nachts al tijt vier by haer. Sy en gaē des nachts niet geerne wt haer hutten haer geuoech doen sonder vier, so seer vreesen sy voor den duyuel, den welcken sy Ingange noemen, ende sien hem oock dicwils.

¶ *Hoe*

¶ Hoe gheschiedt dat sy lieden sijn om
wilde dieren en vissche te schieten met
pijlen. Dat VIII. Capittel.



Als sy int bosch gaen oft by den watere
so hebben sy altoos haren boghe ende
haer pijlen by haer. En also sy int bosch
gaen, hebben sy altijd haer ghesicht om hooge
na die boomen in, achter ende voor. Ende als
sy wat vernemen van groote vogelen, mercar-
ten oft andersins eenighe dieren die haer op
die boomen houden, gaen toe, en legghen toe
om te schieten, volghende haer so langhe nae
tot dat sy wat vanghen. Selden ghebueret als
een wt gaet na dat weydewerck, dat hy ledich
thuys coempt. Desghelijcx volghen sy die vis-

ſchen na vaſt by den oeuer vander zee, ſy hebben oock een ſcherp gheſicht, want als hem erghens eenen viſch verheft, daer ſchieten ſy na, luttel ſchueten ſaelgeren ſy, en als ſy eenen ghe treft hebben, ſpringhen ſy int water en ſwemmen hem na. Sommige groote viſſchen als ſy den pijl gheuoelen, geuen haer ſeluen te gronde, en die ſelue duyckelen ſy na wel tot les vademmen diep, ende brengen dien mede. Sy hebben hengelen ende nette, ende dat garen daer ſy die af maken oft aen een vlechten, trecken ſy van langhe ſcherpe bladeren, welcke ſy Tockaun heeten, ende als ſy metten garen oft netten viſſchen vangē willen, ſo vergaderen haerder ſommighe by malcanderen, een yeghelijck heeft ſijn beteeckēde plaetſen en eenē hoec waters daert niet diep en is. Dan gaen ſommighe en ſlaen int water cruyſwijs door een, dan ſo loopt die viſch na de diepte, en coēpt haer alſo in haer garen, die dan het meeſte vāgt, die deylt den anderen mede. Daer comen oock dicwils toe die verre vander zee wonen, en vanghen veel viſſchen tſamen, bradenſe heel dorre, ſtootenſe ende maken meel daer af, dwelck ſy wel drooghen en malen, alſo dat langhen tijt dueren kan, en dat voeren ſy mede thuys, en eten wortelen meel daer toe: maer ſoudē ſy die viſſchen ghebraden mede thuys voeren, ſy en ſouden niet langhe dueren, want liſe niet en ſouden.

ten. Oock pastmē dat meel beter by een, ende
gaets meer op een hoop dan vanden ghebra-
den visschen.

*¶ Wat fatsoen oft gestaltenisse die lie-
den hebben. Dat IX. Capittel.*



H Et is een sijn wel ghefaersoneert volck
beyde man en wijf, gelijk als die liedē
hier te lande sijn, alleenlijck dan datse
bruyt sijn vander sonnē, maer sy gaen al naect
ionckende oudt, ende en hebbē oock niet met
allen voor die schamelheyt. Sy verstellen haer
seluen met schilderen ende verwen, sy en heb-
ben gheenen baert, want sy plucken dien wt
metter wortelen also dicwils als hy waft, ma-
ken oock gaten inden mont en in haer ooren,

daer hangen sy steenen in, ende dat is haer cie-
raet, ende behanghen haer met pluymagien.

*¶ Vaer mede sy houwē oft snijden, en
sonderlinge op die eyndē, daer die Chri-
stenen haer noch gheen ware en bren-
gen, als bijlē, messen, scherē en aecxen.*

Dat X. Capittel.

SY hebben voormaels eer schepē int lant
quamen, ende noch op veel plaetsen des
lants daer gheen schepen en comen, na-
melijck eenderhande swerte steenen blawach-
rich, ende makent ghelijck eenen beytel, ende
op die breedste sijde wetten sijt rondt, ende
makent scherp, is wel een spanne lanck, twee
vingheren dick, een hāt breedt, sommige groo-
ter, sommige cleynder, dan nemen sy een dun
stocxken ende buygen dat daer bouē om den
beytel, ende bindent met basten te samen. Die
felue figure hebben nu oock die yfere beytels
die haer die Christenen gheuen op sommighe
plaetsen, maer sy maken die stelen op een an-
der maniere, want sy steken daer een gat dore,
daer steken sy den beytel dore, ende dat is haer
bijlē daer sy mede houwen.

Sy nemen wilde verckens tanden ende wet-
tense int middele datse scharp wordē, en bin-
dense

denſe dā tuffchen twee houterkens , daer mede ſchauen ſy dan haer pijlen en boghē datſe ſo ront worden oftſe ghedraeyt werden, ghebruycken oockeenen tant van een dier Pacca genoempt, en dien wetten ſy voorſcherp , en als ſy ghebreken aent lijf hebben van bloets wegghen, ſo ſcrabben ſy op de ſtede daert haer ſeer doet, dat bloedet dan, en dat is met haer ſo veel als buffen laten.

¶ Vvat haer broot is, hoe ſy haer vruchten beeten , ende hoe die ſy die planten ende maken datmenſe ghenieten kan.

Dat XI. Capittel.

Die plaetſen daer ſy planten willen, houwen ſy die boomen af op die planten, ende latenſe een maent oft dry drooge worden, daer na ſteken ſy dat vier daer in ende verbrādenſe, dan plāten ſy hare wortelen tuffchen die ſtockē oft ſtroncken , van welcken ſy haer behulp hebben, en heeten Mandioka, het is een boomken eenen vadem hooghe, en geeft drye wortelen vā hē, en als ſy die wortelen ghenieten willen, trecken ſy dat boōken wt en breken die wortelen af, en breken die tackē vanden boomen , en ſtellenſe weder in de aerde, dat crijcht dā wortelen, en in ſes maenden wordet ſo groot datmen ſijnder ghenieten can,



sy nuttē dese wortelen op dryderley maniere.
 Ten eerstē wrijuen sy die op eenen steen heel
 in cleyne morseelen, dan perffen sy daer sap wt
 met een sifte, ende backen dan vanden meele
 dunne koecken. Dat dinck daer sy haer meel
 in drooghen ende backen is van leem oft cley
 ghebacken, ende veel makent op een maniere
 van een groote schotel. Oock nemē sy die wor-
 telen versich, ende legghen se int wader, laten se
 daerin verrotten, nemen se dan weder en leg-
 gen se onder den viere inden roock, en laten se
 drooghen. die drooge wortelen heeten sy dan
 Keincima, ende dueren langhe. Ende als sij se
 dan nutten oft besigen willen, stooten sij se in
 eenen mortier van hout ghemaect, so wordet
 so wit als wit meel, daer maken sy koecken af
 die

die sy heeten Byyw . Oock nemen sy wel ver-
rotten Mandioka eer sy hem drooghen , ende
menghelen die met drooghen ende met groe-
nen . Daer droogē sy dat meel wt, en dat duert
weleen iaer , ende blijft euen goet om te eten,
ende sy noemen dat *V, y than* . Oock maken sy
van visch en vleesch meel , en doen dat vleesch
oft visch braden ouer tvierinden roock , ende
latent heel dorre worden , treckent van een, en
drooghent noch eens in schotelen oft vatē die
sy daer toe metten viere ghebrant en gemaect
hebben, ende heeten *yuepaun* . Daer na slooten
sijt cleyn in eenen houtē mortier, siftent door
een seue, ende makē meel daer af, en dat duert
langē tijt, want sy en hebben gheen gewoon-
te visch en vleesch te souten, sulcken meel eten
sy dan totten wortel meel, ende het smaect ta-
meliicken wel.

Hoe dat sy haer spijs gereet maken.

Dat XII Capittel.

DAer sijn veel gheslachten des volcx die
gheen sout en eten . Die ghene daer ick
onder gheuanghen was, sommige van
dien eten sout, dwelck sy vāden Franchoyzen
ghesien hebben die met haer hādelen . Maer sy
berechten my hoe datter een natie van volck
daer aent lant liggen die Karaya heeten, te lant
waerts in vāder zee af, die daer sout maken vā

palmen boomen, en dat sy dat eten, maer dies
veel ghebruycken teten en leefden niet langhe,
ende sy makent op die maniere, want ick sacht
ende halp daer toe: Sy houwen eenen dicken
palmboom af, ende cleuē hem in cleyne splin
teren, maken daer nae een ghestelte van droo
ghen hout, leggen die splinteren daer op, ende
verbranden se metten drooghen houte tot af
schen, ende vanden asschen maken sy looghe,
ende die sieden sy, dat sçheynt hem dan ghelijck
sout. Ick meynde het waer salpeeter gheweest,
ende proefde dat daerom int vier, maer het en
was gheen, het smaect oock ghelijck sout, ende
is grau van verwen: maer het meeste deel van
dat volck en eet gheen sout. Als sy yet sieden
het si visch oft vleesch, so doen sy gemeynlick
groenen peper daer in, ende alst dan redelijck
ghenoech ghesoden is, so nemen sijt wten so
pe, ende makē daer eenen dunnen bry af, dien
heeten sy Mingau, ende drincken dien wt cou
worden, de welcke sy voor vaten hebbē: oock
als sy eenderley spijsē makē willē het sy vleesch
oft visch dat eenen tijt lanck duere, dat leggen
sy vier spannen hooghe ouer tvier op cleyne
housterkens, ende maken dan een redelijck vier
daer onder, latent so braden ende beroocken
tot dat heel drooge wort. Ende als sijt daer na
eten willen, so sieden sijt weder op ende etent,
ende sulcken vleesch heeten sy *Mochaen*.

¶ Wat regiment en ordinantie sy hebben metter ouerheyt ende rechten.

Dat XIII. Capittel.

SY en hebben sonderlinghen gheen regiment oft recht, elck hutte heeft eenē ouersten die is haer Coninck, want alle haer ouerste sijn van eenen geslachte, een gebieden en regiment, men mach daer af makē datmen wil, het mach hem die een wat meer gebruyct hebbē in oorloge oft crijchs handel, dat hy in dier wijse meer ghebots heeft dan een ander, als sy ten crijch trecken, ghelijck als die gemelde *Konian Bebe*, anders en heb ick geen sonderlijck recht onder haer vernomen, dan dat die ioncxste de oudtste ghehoersaem sijn te doen dat hare seden mede brengt. Als yemant den anderen verslaet oft schiet, sijn sijne vrienden bereyt dien wederom te dooden, hoe wel dat selden gebuert. Oock sijn sy den ouerste haerder hutten gehoorlaē, wat die yemāden heet, dat doet hy sonder eenich bedwanc oft vreesse, dan alleen wt goeden wille.

¶ Hoe sy die potten ende het eerdeverck backen die sy ghebruyken.

Dat XIII. Capittel.

Die

Die wijsf maken die vaten die sy besigen
also: Sy nemē cley, aerde, oft leem, ende
maken die gelijk deech, daer af maken
sy vaten, potten, schotelen pannen, oft dat sy
willen, ende latent eenen tijt lanck drooghen,
ende wetent sijn te schilderen, ende als sijn dan
backen willen, so stelpen sijn op steenen, setten
dan daer veel boomschellen rondtomme die
drooghe sijn, ende steken het vier daer in, ende
daer mede worden sy ghebackē datter gloeyet
ghelijck een heet yser.

*¶ Hoe sy baren dranck maken daer sy
haer droncken in drincken, ende hoe sy
haer houden metten drincken.*

Dat XV. Capittel.

Dat vrouwen volck maeft den dranck.
Sy nemen die wortel Mandioka ende
sieden groote potten vol. Alst gesoden
is, nemen sijn wten pot, ende gietent in eenen
anderen pot oft teyle, latent een luttel coudt
worden, ende dan setten haer die ionge maech
den daer by ende knauwent metten mōde, en
dat geknawde doen sy in eenē besonderē pot
oft teyle. Als die gesoden wortelen al geknawt
sijn, so doen si dat geknawde wederom inden
pot doen, ende gieren dien dan wederom vol
waters, menghelende dat metten geknawden

WOR-



wortelen, ende dan laten sijt wederom werm
worden. Dan hebben sy sonderlinghe vaten
de welcke sy half in der eerden begrauen, ende
gebruycken se daer toegelijcmen hier die vatē
tot wijn oft bier gebruyct, daer gieten sijt dan
in, ende makent wel toe, dat gert oft dijdē dan
in hem seluen ende wort sterck, latēt also twee
daghen staen, ende daer na drincken sijt, ende
worden daer droncken af: het is dick, en voedt
soock seer wel. Elcke hutte maeft sijnen dranck
bysonder. Ende als hem een dorp wil vrolijck
maken (dwelck ghemeynlijck alle maent eens
ghebuert) so gaen sy eerst alle met malcanderē
in een hutte, en drincken daer eerst wt. dat gaet
also op de rijē om tot dat sy den drack in allen
huten wt gedroncken hebben. Sy setten haer

ront

rondtom die vaten henen. Sommighe op de branden, sommighe op der aerden. Die wijs reycken haer den dranck veruolghende, sommighe staen singen ende dansen om die vaten henen, ende opter plaetsen daer sy drinckē, maken sy oock haer water. Dat drincken duert den heelen nacht, dansen oock wel tusschen die branden henen, roepen en blasen met basuynen, maken een vreesfelijk gherucht als sy droncken worden. Oock sietmen luttel oft selden dat sy twistich worden. Sy sijn oock malcanderen seer gonstich, ende wat die een meer heeft van eten spijsse dan die andere, dat deylt hy hem mede.

¶ Wat des mans cieraet is, ende hoe sy haer schilderen, ende wat haerlieder namen sijn.

Dat XVI. Capittel.

SY maken een cruyne op haer hooft, ende laten daer rontom een cransken wassen vā hayr ghelijck eenen moninck. Ick heb haer dicwils gheuraecht van waer dat sy dat monster vanden hayre hadden. So seyden sy, haer voorvaders haddent aen eenen man ghesien die hadde Meirs Humane geheeten, ende hadde vele wonderlijcke dinghen onder haer ghedaen, ende men wil segghen dat een Pro-
pheet

pheet oft apostel gheweest is. Voort so vraech
de ick haer waer mede sy die hayren af hadden
connen snijden eer haer die schepen scheren
ghebracht hadden. Sy seyden, sy haddē eenen
steen beytel genomen, ende hadden een an-
der dinck daer onder ghehouden, ende daer
op die hayren af gheslaghen, maer die middel-
ste cruyne hadden sy met een schelfer van eenē
harden steen ghemaect, dwelck sy dicwils ghe-
bruycken ende besigen inde stede van eender
scheren. Voort hebben sy een dinck van roo-
den vederen ghemaect, en dat heet *Kannitare*,
dat binden sy om dat hooft. Sy hebben oock
inden ondersten lippen des monts een groot
gat, dat maken sy van ioncx af als sy noch iock
sijn, sy steken metten scherpē punct van eenen
hertshorē daer door, daer in steken sy dan een
steenken oft houtken, en smerent dan met ha-
ren saluen. Dat gaetken blijft dan open. Als sy
nu so groot worden dat sy weyrachtich sijn,
so maken sijt dan haerliedergrooter, ende dan
steect hy daer eenen grooten groenen steen in,
die is aldus gemaeft: het smal eynde bouē, dat
coempt binnen inden lippen te hangen, ende
dat dicke hangt buyten wte: en die lippen des
monts hangt haer alijt om leege vanden ghe-
wichte des steens. Oock hebbē sy op beyde sij-
den des mōts inde caken noch eenen cleynen
steen. Sommige hebbender van cristal steenē,
die



die sijn smal ende lanck. Ende noch hebben sy
 een cieraet dat sy wt groote zeeslacken huysen
 maken , ende die heeten sy *Matte tue*, ende dat
 is ghemaect als een half mane , dat hanghen sy
 aenden hals, het is sneeuw wit, en wort Bogessy
 ghenaempt . Oock maken sy witte cordellen
 van witte zeeslecken , ende is eenen goeden
 halm dick, ende het cost veel arbeyts te maken:
 dat hanghen sy aen den hals . Oock binden sy
 pluymbosschen aen die armen , schilderē haer
 swert , oock met rooden ende witten vederen
 so bont door malcanderen , ende die vederen
 placken sy opt lijf met materie die wt den boo
 men coempt , en dat strijckē sy op die plaetsen
 daer sy pluymen hebben willen, ende daer op
 legghen sy dan die pluymen , en dat blijft dan
 daer

daer aen cleuen, ende sy scilderen hē oock den
een arm swert den anderen roet, dien beenen
ende dat lijf des ghelijcks. Sy hebben oock ee-
nen zieraet vā struyfvederē gemaect, dat is een
groot ront dinck van vederē, dat bindē sy opt
gat als sy inden crijch varen tegē haer vianden
oft sy sus eenige feest houdē, dat heet Enduap
hare namen noemen sy nae die wilde dieren
ende sy gheuen haer seluen veel namen, maer
altijt metten onderscheyt, als sy eerst geboren
worden so wort haer eenē naem gegeuē, dien
behouden sy niet langher dan tot sy weerach-
rich worden, ende vianden doot slaen, so veel
als hyer dan ghedoot heeft, so menighen na-
men heeft hy.

*¶ Wat des wijs of vrouwen zieraeth
is. Dat XVII. Capittel.*

DIe wijs scilderen haer int aensicht ende
ouer dat ganse lijf, oock opte voerghe-
seyden maniere also haer die mans scil-
deren, maer sy laten dat hayr lanck wassen, also
oock ander wijs, sy en hebben sonderlick gee-
nen zieraet, dan inden oren hebben sy gaten
daer hanghen sy dinghen in sijn ontrent een
span lanck, ront ontrent eenen duym dick, hee-
ten op haer spraeck nambibeya, makent vā zee
sleckē, Matte pue genaemt, haer namē sijn nae
N voghe-

voghelen, visschen, vruchten der boomen ghe-
heren, en hebben vanden ionckheyt op maer
eenen naem, maer so menigen slaen die mās
doot slaen, so menigen naeme geuen haer die
wijfs oock. Als die een den anderen luyft die
luyfen eten sy, ick hebse dicwils ghevraecht
waerom dat sijt doen, so seyden se het waren
hare vianden, eten se vanden hoofde ende wil-
len hen aen haer wreken, daer en sijn geen be-
sondere vroegvrouwen, als een wijf in barens
noot is, loopt daer toe wie datter naest by is,
beyde man ende wijf. Ick hebse sien gaen on-
trent den vierden dach nae dat se baert hadden
Sy droeghen haer kinderen optē rug in keuien
van catoen garen ghemaect, doen hare arbeyt
met huy, die kinderen slapen en sijn wel te vre-
den hoe sy met haer bucken oft op rechten.

*Hoe sy den kinderen een eerste naem
geuen. Dat XVIII. Capittel.*

VAnden wilden, een die welcken niet
vangen halp sijn huysvrou hadt eenen
ionghen soon ghebaert, sommighe da-
ghen daer nae nam hy sijn naeste gebuerē van-
den hutten beveraeghende hem met haer wat
hy den kinde woude voor eenen naem geuen,
die dapperende vreeselick waer, sy hieldē hem
veel namen voor die hem niet en behaechden
hy meynde hem vandē vier voorvaders eenen
naem

naem seyde die kinderen die sodanige namen hadden dijen wel ende waren spoedich sla-
uen te vangen, hy noemde die vier voorvaders die eerste hiet Krimen, die ander Hermittā, die derde Koem, des vierden naem en heb ic niet onthouden, Ick dacht als hy van Koem seyde het most Cham sijn, maer Koem heet op haer spraeck den mergē, so seyde ic hem dat hy hem den seluen naem gaue, want die seluē most sekerlijck sijnder voorvaderen een gheweest sijn der namen een behielt dat kint, so geuē sy haer namen sonder doopsel oft besnijdinghe.

¶ Hoe veel wijfs een heeft en hoe hy hē met haer hout. Dat XIX. Capittel.

DEn meestē hoop en heeft maer eē wijf elcks, sommige oock meer, maer sommighe van haer Coningē hebben xiii. ofte xiiii wijfs. Die Coninck die ick leestmael gesconcken was, vanden welcken my die Franchoisē cochten, Abbati Bossanghe naemt die hadt veel wijfs, en eene die sijn eerste gheweest was, die was die ouerste onder hē. Elcke vrouwe hadde haer logement inden hutten, eygen vier, haereygen wortel gewas, met welke hy te doen hadde inder seluē losament was hy die gaf hem teeten, dat ginck so om, die kinderen die sy hebben trecken opt weydwerck als sy groot sijn, en wat sy brenghen geeft een

N z yeghe

yeghelijck sijnder moeder, die coeken dat ende deylen dan den anderen mede, en die wijs verdragen haer wel onder malcanderen. Sy hebbē oock die maniere dat een den anderen een wijf schenckt als hys moeyende is, oock schenckt den eenen den anderen een dochter oft suster.

¶ Hoe sy haer verlouen.

Dat XX. Capittel.

SY verlouē haer dochters als sy noch iock sijn, ende als sy groot worden dat sy tot vrouwen ghebruyck krijghen oft comen snijden sy haer dat haer vanden hoofde, scraben haer eenen besonderlijcken snede inden rugge, binden haer sommige wilden diere tanden aenden hals, daer nae alst haer weer ghewassen is, ende die sneden toe ghewassen sijn, so sietmen euen wel dat teeken vanden snede, want sy doē daer wat in daer mede dat swert blijft alst toe geheynt is, dat houdē sy voor een eer, als sulcke cerimonien gheeynt sijn, daer nae leueren syse ouer diese hebben sal, en maken gheen sonderlinhe cerimonien. Man en wijf houden haer oock gebuerlijck, makē haer dinghen heymelijck. Item ick heb oock gesien dat een ouerste van haer by tijden den merghens vroegh door alle hutten ginck ende crabde die kinderen met eenen scharpen visch tant inden beenen

beenen, om haer daer mede forchvuldich te maken en vreesende, op dat als sy krijten ende onlijdzaam waren, die onder haer daer met dreychden, daer compt een, ende niet payden dat se sweghen.

¶ Vvat haer goeden sijn.

Dat XXI. Capittel.

DAeren is gheen deylinghe oft partheringe onder haer liedē, sy en wetē oock van gheenen gelt te seggen, haer schatten sijn pluymen van voghelen, vanden welken dier veel heeft die is rijck, ende welcke sijn steen inden lippen des mont heeft, die is oock vanden rijcksten een. Een yegelijcke partie man ende wijf heeft sijn eygen wortel ghewasch daer sy af eten.

¶ Vvat haer meeste eer is.

Dat XXII. Capittel.

DAt is haer eer als een veel vianden ghevanghen en doot gheslagen heeft, wāt dat is die maniere onder haer lieden, so menigē viant hy doot slaet, so menigen naem geeft hy hem seluen, ende dat sijn die vernaemste onder haer lieden, die welcke sulcke namen veel hebben.

Vvaer aen dat sy ghelouen.

N 3

Dat

Dat XXIII. Capittel.

SY gelouen aen een dinck dat waft als een ronde couwoerde, ende is so groot als eenen pot van eenen pot nats, het is binnen hol, steken een cleyn stocxken daer door, snijden een gaetken daer in gelijk eenē mont, ende doen cleyn steenkens daer in dattet ratelt ratelen daer mede als sy singhen ende dansen, ende heetent Tammaraka, ende is geformeert oft ghemaect ghelijck hier volcht.



Die selue hebbē dat mās volck elck een eyghē sy sijn nu sommige onder haer die sy noemen Paygi, die wordē onder haer gheacht ghelijck men hier die waerseggers acht, die selue treckē des iaers eēs door dat lant, in alle hutten, ende geuen te verstaē hoe dat eenen geest by haer is geweest

geweeft, die welcke verre van daer wt vreemde
landē comen was, hadde haer die macht gege-
uē dat alle die ratelen Tammaraka, die welcke
wouden, fouden fpreken en macht crygē dat
fy om baden soude haer gheworden ende ghe-
geuen wesen, ende fo ghebueren. Een yeghe-
lijck wil dan dat in sijne ratelen die ghewelt
connen maken eenen groote feeste met drinc-
ken, finghen, ende waerfegghen, houden veel
felfame cerimonien, daer bestellen die waer-
feggers eenen dach inden hutten, die welcke
fy ledich maken, daeren moeten gheen wijs
noch kinderen in blijuen, dan ghebieden die
waerfeggers dat een yeghelijck fijn Tammar-
ka roet ververwe met pluymē ende daer in co-
me, fo wil hy haer die ghewelt ouerleueren,
dat fy fpreken fullen. Daer nae comē fy inden
hutten, fo fetten fy haer bouen aen die waer-
feggers, en hebben haren Tammaraka by haer
inder eerden fteken, daer by fteken die andere
de huere, oock een yeghelijck geeft den waer-
feggers giften oft ghelchenck, die welcke fijn
flicfpijlen vederen, dingen die fy aen die oren
hanghen, op dat een yeghelijcken fijne Tam-
maraka niet vergeten en worde, als fy dan alle
by malcanderen fijn, fo neemt hy dan een ye-
ghelijcx Tammaraka sonderlijcken, ende be-
roeckse met cruijt, twelcke fy Bittin noemen,
daer nae neemt hy die ratel vaft voordē mōt

ende ratelt mede, seyt totten ratel Nee Kora,
nu spreekte ende laet v horen sijdi daer inne,
dan spreekte hy met cleynder stemme, en rasch
een woort datment niet wel mercken en can,
oft die ratel doet oft dat hyt doet, ende dat an
der volck meynt dat die ratel doet, maer die
waersegger doetet selue, so doet hy met allen
ratelen die eenen nae den anderen, een yeghe-
lijk meynt dan dat sijn ratel groote macht by
haer heeft, dan ghebieden hen die waerseggers
dat sy ten crych trecken vianden vangen, want
die geesten die inden Tamaraka sijn hebben
lust slauen vleesch te eten, nae dien raet trecken
sy naeden crych, wanneer nu die waerseggher
Paygi wt allen ratelen goden gemaect heeft, so
neempt dan een yeghelijk sijn ratel wederom
nae hem, ende heetse lieue so o, maect hem een
eygen hutken, daert in staet, sedt hem ete voor
begeert van hem alle wat hem van noode is,
ghelijc als wy den warachtigen god doen, die
hemel ende eerde geschapen heeft, bidden dat
sijn nu hare goden. Metten warachtigen God
die hemel ende eerde geschapē heeft, en hebben
sy geen becommeringe, houden voor een out
heercomen dat hemel ende eerde geweest sijn
en weten sus niet sonderlijcx vanden beghin
der weerelt, dan sy segghen, daer is eens groot
water gheweest, dat heeft alle haer voorva-
ders versopen, ende sommighe sijn in eenen
naec-

naecker daer wt comen, sommighe op hoghe
bomen het welck ick achte, het moet die Delu
uie gheweest sijn, als ic nu die eerste reyse on
der haer quam, en sy my daer af seyden, meyn
de ick het was een duyuels voorspel, want sy
seyden my dicwils hoe dat die dinghers spree
ken, als ic nu inden huttē quam daer die waer
seggers in warē, die welcke die dingers soudē
spreekende maken, mosten sy haer alle neer set
ten, maer als ick dat bedroch sach, ginck ick ter
hutten wt ende dacht hoe armen verblinden
volck is dat.

*Hoe sy vanden wijs waerseggerssen
maken. Dat XXIIII. Capittel*

SY gaen eerstmaels in eene hutten, en alle
die wijs der hutten nemen die een voor
die ander nae, ende becoeckēse, daer moet
dat wijs cryten en springen en omlopen,
so lange dat sy moede worde, datse opter aer
den vallen gelijck al oft sy doot warē, daer nae
seyt die waersegger, siet nu is' sy doot, terstont
wil ickse wederom leuendich maken, als sy dā
wederom tot haer seluen comt, seyt hy sijt
nu spoedich roecomende dingen te segghen,
als sy dan naden crych trecken, so moeten haer
die wijs vanden crych waerseggen, mijns hee
ren vrou (dien ick ghesconckē was om te doo
den) begoft eens te waerseggē, seyde tot haren
man

man gaer was eenen geest wt vreemden landen comen, die begeerden van haer te weten, hoe corts ick soude gedoot wordē, en vraechde nae dat hout daermen my mede doot slaen soude, waer dattet waer, hy antwoerde haer, het en was niet verre, alle dinghen waren ghereet, niet dan alleen, hy liet hem duncken ick en waer gheen Portugalose, maer ick was een Franchois, als dat wijf haer waersegginge volbracht hadde vraechden ick haer, waerom sy my so nae mijn leuen stont, ter wylē ick geen viāt en was, of sy niet en vreesde dat haer mijn Godteen plage toe schicken soude, sy seyde ick en soude my dat niet aen keeren, want het waren vreemde gheesten, die wouden bescheet van my weten, sulcken ceremonien hebben sy veel.

Vvaer in dat sy opt water varen.

Dat XXV. Capittel.

DAer sijn eenderhande boomē intlant, die welcke heetē Yga ywera, dies boēscalen lossen sy gans af van bouen aen tot beneden toe, maken besondere gestel ront om den boom heenen, om die schael gans en heel af te cryghen, daer nae nemen sy die schale ende dragen se wten 'gheberechte bijden zee, heyten se met vier, luegen se achter ende voor
hoeh

hoech op, binden swerte houten in midden
daer onder ende ouer, dat sy niet wieder en
worden, maken naeckers daer af, daer in haer-
der 30 varen connen ten crych, die schale is ee-
nen duym dicke, wel vier voet in die wiede,
40 voeten lanck, sommighe langher, sommi-
ghe oock corter, die seluen roeyen sy seer ghe-
ringhe, endelichtveerdich duere, varē daer me-
de so verre als sy willen, als die zee onstelt is,
door onweer trecken sy die naeckers opt lant,
tot dat wederom goet weer wort, sy en varen
ouer twee mijlen niet inden zee, maer lanck
den lande heenen varen sy verre

*Vvaer om den een viant den anderen
eet Dat XXVI. Capittel.*

SY en doens van gheenen hongher, maer
van grooten haet endē nijt, ende als sy
inden crych teghen malcanderē scermut-
sen, roept die eenē den anderen aen wt groo-
ten haet, Dete Immeraya, Schermiuramme,
heiwoe, die come alle ongheluck aen mijn ee-
ten cost, De kange Iuea eypota kurine. Ick
wil v noch heden desen dach dat hoeft do or-
slaen, Sche Innamme pepicke Reseagu, mij-
nen vrienden doot aen v te rechten ben ick
hier, Yan de soo, schemocken Sera, Quo-
ra Ossorime Kire, & cetera. V vleesch sal
heden

heden desen dach eer die son onder gaet mijn
gebraet sijn, sulcx alle doē sy wt grooter viant
scap.

*Hoe sy haer aenslaghen maken als sy
willen in haren vianden lant ten crych
trecken. Dat XXVII. Capittel.*

ALs sy willen in haren vianden lant ter
oorlogen trecken, so vergaren hen haer
ouersten, houden raet hoe sijt maken
willen, dat ontbiedē sy dan in alle huttē door
en weer dat sy haer op rusten, ende sy noemen
eenderhande fruyt der bomē als die rijp wor
den, so willen sy wt trecken, want sy hebben
geen onderscheyt der iaren ende dagen, oock
bestellen sy eenen tijt wt te treckē alser een ge
slacht visschen wter zee inden ryuren loopen,
die welcke sy Pratti heeten op haer spraek, en
den liggenden tijt als men die visschen siet, noe
men sy Pirakaen, op sulcken tijt rusten sy haer
met naeckers ende pijlen, en hert wortel meel,
dwelck sy heeten Vythan tot victalie, daer nae
beraden sy haer metten waersleggers Pagy, oft
sy victorie sullen hebben, die seggen dan wel
ia doch beuelen sy haer dat sy achtinge op die
dromen hebben soudē die haer vanden vian
den dromeden, als den meesten deel droempt
dat se sien haerder viandē vleesch bradē, dat be
dient victorie, maer als sy siē haer eygen vleesch
braden

braden dat en bediet niet goets, so dat sy dan
thuys blyuen, als haer die dromen nu wel be-
haechden, so rusten sy haer op, maken in alle
hutten groote vrolijcheyt met droncken drinc-
ken, en dansen metten afgoden Tammaraka,
een yghelijc bidt den sijnen, dat hy hem help
eenen viant vanghen, daer nae varen sy heenen
als sy dan vast by haerder vianden lant comen
so beuelen haer ouersten den nacht te voré, als
sy des anderen daechs haerder vianden lant-
schap willen aen vallé, dat sy die dromen ont-
houden souden, die welcke haer die nacht
droempt. Ick was eenen toch met haer, als wy
nu vast by haerder vianden lant waren des
auont te voren, so haer meyninghe was den
anderen nacht haerder vianden lant aen te val-
len, ginck die ouerste door den leger heenen,
seyde haer dat sy die droemen wel behielden,
die haer dien nacht droemen souden, geboer
voert dat die iōge gesellé als dé dach op brack
wildt scieten souden ende visschen te vangen,
dat gebuerde also die ouerste liet ghereet ma-
ken, daer nae onboet hy die ander ouersten
die quamen voor sijne hutten, settem haer al-
le opter eerden in eenē rōden circkel, liet haer
reeten geuen, als sy geeten hadden vertelden
sy dromen, so veel als haer wel behaechden,
daer nae dansten sy met haren Tamaraka van
vruechden, haerder vianden hutten besaghen
sy in-

sy inder nacht, vallen aen meer mergen stont
als den dach op gaet, als sy eenen vanghen die
seer gewont is, dien doden sy ter stont en vueren
dat vleesch gebraden mede thuys, maer die
noch gesont sijn vueren sy al leuendich mede
thuys, daer nae in haren hutten dooden sijle
Sy vallen aen met eenen grooten gescrey, treden
stijf opter aerden, blasen in baluynen van
langhe couwoerden gemaect, sy hebben alle
gader snoeren om haer lijf gebonden om die
vianden daer mede te binden, schilderen ende
vermalen haer met roden vederen, op dat sy
voor die ander bekend souden wesen, schieten
seer gheringe, schieten oock vierighe pijlen op
haerder viandē hutten, om die daer mede aen
te steken, en als haerder een gewot wort, hebben
sy haereygen cruyden daer sy haer mede
heelen.

¶ Wat haren crych rustinghe is.

Dat XXVIII. Capittel.

SY hebben flitsboghē, ende die spijtsen
oft hoorenen sijn ghemaect van beenen
en herde weeren die sy scarp wetten, en
daer op binden, sy maken se oock vā visch tan
den, die welcke mē heet Tiberaun, worden
inden zee gevangen, oock nemen sy cattoē oft
boomwolle mengelen se met was, bindent
bouen aen die pijlen, steken dan dat vier daer
in

n, dat sijn haer vier pijlen, sy maken oock scilden vā boomscorssen en anderen wilden dieren snijen. Sy grauen oock scarpe doornen geijck als hier die minckijfers. Ick heb oock van haer gehoert maer niet gesien, dat, als sijt doen willen dat sy hate viāden wt die vasticheyden ende sterckten wel connen verdrijven met peper, in dier manieren die welcke daer wast. Sy wouden groote vieren maken als die wint wayde, en worpen dan vanden peper eenen hoop daer in, als den dump tot haer inde hutten sloech mosten sy haer ontswijcken, en ick geloefs wel, want ick eens metten Portugalers in een prouintie des lants Brannenbucke genaempt, als voor verhaelt is, daer bleuen wi met een schip opt droghe in een Reuier leggen, want die vloet was ons ontgaen, doen worpen sy veel droochs stroys tusschen dat schip ende den oeuver, meynden ons oock metten dump vanden peper te veriagen, maer sy en consten dat hout niet ontfeken.

Met wat ceremonien sy haer vianden dooden ende eten, waer mede sijse doot slaen, en hoe sy met haer om gaen.

Dat XXIX. Capittel.

Als sy haer vianden eerstmaels thuys brengen, so slaense die wijs en die ionghers



gers, daer nae schilderen sijse en behanghense
 met grauwen vederen, scheeren haer die wijn
 brauwen afbouen doghen, dansen om haer
 heeren, binden hem wel dat hy niet en onloo-
 pe, gheuen hem een wijf die hem bewaert, en
 oock met hem te doen heeft, ende als die kint
 draget, dat kint voeden sy op tot datter groot
 wort, daer nae alst haer inden sin compt, slaen
 sijt doot ende etent, sy geuen hem wel teeten
 hōden hem so eenen tijt lanck maken ghereet
 scap, maken wel vaten van eerden werck, daer
 sy den dranck in doen, backen sonderlinge va-
 ten daer in doen sy die reetschap, daer sy hem
 mede scilderen en palleeren, maken vederen
 boschen die sy aen dat hooft doen ende bin-
 den, daer mede sy hem doot slaen, maken een
 lange snoer Masurana genaempt, daer binden
 sy hem



sy hem in als hy steruen sal. Als sy alle gereet-
 schap by malcanderen hebben, so ordineren
 sy eenen tijt wanneer hy steruen sal, noyē die
 wilden van anderen dorpen, dat sy op die tijt
 derwaerts comen, dan maken sy alle vatē vol
 drancx, ende eenen dach oft twee te voren eer
 die wijs den dranck maken, voeren sy den ge-
 vangen eens oft twee mael op te plaetse, dan-
 sen om hem heenen. Als sy nu alle byden an-
 deren sijn, die van buyten comē, heet haer die
 ouerste vander hutten willecome. Seyt also,
 comt helpt uwen viant eren. Des daechs te
 voren eer sy beginnen te drincken, binden sy
 den geuanghen den snoer Masurana om den
 hals, dien seluen dach scilderen ende palleren
 sy dat hout Iwera Pemme genaempt, daer me
 O de

de sy hem doot slaen willen, diens ghestel-
nisse is also dese figure bewijst, is langer dan
een vayem, strycken dingen daer aen dat cleeft
dan nemen sy eyerschale die sijn graw, en sijn
van eenen vogel Mackukawa ghenaeft, die
stoten sy cleyn als stof, en dat strijcken sy dan
aent hout, dá siddt een vrouw ende wrijft inden
aendleefden eyerschale stof, die wy sie scildert
staet vol wijs, om haer die singhen. Als die
Iwera Pemme, dan is alsoet sijn soude met ha-
ren quispelen ende ander gereetschap, hangen
sy dan in een ledighe hutte bouen der eerden,
in eenen tuynstaeck, ende singhen dá daerom
alle den nacht, des ghelijcx scilderen ende ma-
len sy den geuangen sijn aensicht, oock ter wij-
len dat wijs scildert, ter wijlen singhen die an-
der. Ende als sy beginnen te drinckē, so nemen
sy den geuangen by haer, die drinckt met haer
en gecken ende aluen met hem. Als dat drinc-
ken nu een eynde heeft, des anderen daechs ru-
sten sy, maken den gheuangen een hutken op
die plaets daer hy steruen sal, daer leyt hy dien
nacht, in wel verwaert, dan des merghens een
goede wyl voordien dach gaen sy dāsen ende
singhen om dat hout, daer sy hem mede doot
slaen willen, tot dat den dach aen compt, dan
trecken sy den geuanghen wten hutken, bre-
ken dat hutken af, maken ruymte, dan binden
sy hem die mussurana vāden hals af, ende bin-
dense

denſe hem omtlijf henen, treckenſe ſo ouer
beyden ſijden ſtijf, hy ſtaet midden daer in ge
bonden, haerder veel houden dat ſnoer van
beyden ſijden, laten hem ſo eenen luttel ſtaen,
leggen cleyn ſteenkens by hem, daer hy mede
nae die wijs worpt, die om hem loopen, en-
de krijgen teetē, die ſelue ſijn daer geordineert
ende geſchildert, als hy ontween geluedē wort,
metten eerſten vier ſtucken rōt om die hutten
te loopen, daer nae hebben die andere tijt ver-
drijf. Als dat nu geſchiet is, maken ſy een vier
ontrent twee ſcreden wijt vander ſlaue, dat
vier moet hy ſien, daer naer coempt een vrou
metten hout Iwera Pemmē ghelooopen, keert
die verbuſſelen om hoge, tiert ende ghebeert
van vruechden, loopt voor den gheuanghen
ouer, op dat hijt ſien ſoude. Als dat geſchiet is,
ſo neemt een mans perſoon, dat hout gaet
daer mede voordē geuanghen ſtaen, houdt
voor hem, op dat hijt aēſiet, ter wijlen gaet die
de welcke hem doot ſlaen wil ſelue henen met
noch 14 oft 15, maken haer lijf graw met aſſen,
dā comt hy met ſijne mede geſellē opte plaet
ſe by den geuanghen, dan leuert die ander die
voor den gheuangen ſtaet dat hout ouer, ſo
comept dan die Coninck vander hutten, ende
neemt dat hout, en ſteeket den genen die den
geuanghen doot ſlaen ſaleens tuſſchen die bee-
nen door, dwelck nu een eer onder haer is, dā

neempt die wederom dat hout diē doot slaen
sal, ende seyt dan, ia hier ben ick, ick wil v doo
den, want die uwe hebben mijder vrienden
oock veel ghedoot ende geeten, dan antwoort
hy, als ick doot ben so heb ick noch veel vrien
den, die sullen my wel wreekē, daer mede slaet
hy achter opt hooft dat hem die herffenē daer
wt springhen, terstont nemen hem die wijsf,
trecken hem opt vier, scrabben hem die huyl
al af, maken hem gans wit, stoppen hem dat
achterste met een houtkē toe, op dat hem niet
en ontgae, als hem dan die huyl af geuecht is,
neempt hem een mans persoē, snijt hem die
beenen ouer die knien af, ende die armen aen
dat lijf, dan comen dier vier wijsf en nemen
die vier stucken en loopen daer mede om die
hutten heen, maken een groot gescrey oft ge
rucht van vruechden, daer nae snijden sy hem
den rugge metten achtersten vanden voordee
len af, dat selue deylen sy onder haer, maer dat
inghewant behouden die wijsf, siedent ende
int sop makē sy eenen brije, mingau genaemt
dien drincken sy ende die kinder, dat ingewāt
eten sy, eeten oock dat vleesch vanden hoofde
die herffenen binnen in dat hooft, die tonghe
ende wat sy sus daer aen ghenieten connē, dat
eten die iongers, als dat al gheschiet is, soo gaet
dan een yegelijck wederom nae huys ende ne
men haer deel met hen, die ghene die desen ge
doot



doot heeft, geeft hem seluē noch eenen naem.
 Ende die Coninck vander hutten scrabt hem
 met eenen tant van eenen wilden dier bouen
 aenden arm, alst recht gheheel is, soo siet men
 dat litteeken, dat is een eere daer voor v, dan
 moet hy den seluen dach stille liggen in eenen
 nest, doen hem een cleyn flitsboechken met
 eenen pijl, daer hy den tijt mede verdrijft, sciet
 daer mede in was, dat gesciet daerom dat hem
 den arm niet onseker oft anghewilch worden
 en soude vanden verschrieken des doot slaens.
 Dat al heb ick ghesien ende ben daer by ghe-
 weest, sy en connen niet ghiesetten gheral niet
 voerder tellen dan tot vijf toe, als sy voerder
 tellen willen, wijsen sijt byden vingeren ende
 teenen der voeten, als sy willen vā grooter ge-

tal spreken, wijsen sy op vier oft vijf personen
so veel vingeren ende teenen als die hebben.

*¶ Berecht van sommighe dieren inden
lande. Dat XXXI. Capittel.*

DAer sijn int lant Rechbocken ende gey
ten gelijk verkenen so groot, vanden
tweederley gheslacht, die een is seer by
gelijk die recalueren hier int lant, die ander
cleyn ghelijck als ionghe vercxkens, heetē Tey
gasu dattu, en sijn niet seer goet te vanghen
in die val die de wilden ghebruycken om wilt
te vanghen. Daer sijn oock dryderley meercat
ten, die een heeten Key, en sijn die hier te lan
de comen. Dan isser een sorte heeten Ackakey,
springen ghemeynlijck met groten hopen op
die boomen, maken een groot gherucht ende
geschrey int hout oft bosch. Ende daer is noch
eenderhande geslacht van meercatten, die hee
ten Pricki, die sijn roet, hebben baerdē gelijk
suygen en geyten, sy sijn so groot ghelijck een
middelbaer hont. Oock heeftmen daer eender
ley gedierte, die heeten Dattu, dat is ontrent
een span hoge, anderhalf spanne lanck, dat is
gewapent al ront om dat lijf, wtgenomē den
buyck, daer en heuet niet, die wapen is gelijk
horen, sluyt op malcanderen met vouwē ghe
lijck een harnaschs, en heeft eenen langen leer
pen mondeken, eenen langhen steert, gaet gaer
ne

ne opte steenclippē om, sijn spijsē sijn muysen
het heeft vet vleisch, ick heb dicwils daer afghe
eten.

¶ Serwoy. Dat XXXII. Capittel.

DAer is eenderhande wilt gedierte dat
heet Serwoy, dat is so groot als een cat
te, en is wat graw van hayr, en sommi-
ghe oock swert graw, heeft eenen stert gelijk
een catte, ende alst baert heeftet een ionck oft
fesse, het heeft eenen slip inden buyck, is wel
een half spannelanck, ende binnen inden slip-
pen heeftet noch een vel, want den buycken
is hem niet open, en binnen inden slip heeftet
conduyten, ende daert henen gaet daer drager
die ionghen inden slip, tusschen die twee vel-
len. Ick hebse dickwils helpen vanghen, en die
ionghen wten slip gelanckt.

Daer sijn oock een geslacht Thijger dieren
int lād, die welcke die lieden verworgen ende
eten, en groote schade doen. Daer is oock ghe-
slacht Leuwen, diemen heet Leoparden, dat
is gheseyt grauwe gespikkelde leuwen, en an-
der wonderlijcke dieren veel. & cetæ. Daer is
oock een dier genaempt Catiuare, hout hem
opt lāt ende int water, die sleym en vulicheyt
dat opte cantē vanden oevers vanden souten
wateren blijft, daer leuen sy af, ende onderhou-
den haer daer mede, en dat eten sy, als haer er-
gens voor vreesst oft dat verveert is, so vliet int

water optē gront, sy sijn grooter dan een scaep,
sy hebbē een hooft gelijkē een hase, corte ooren,
sy hebben eenē corten stert, redelijcke beenen,
loopen oock seer rasschelijcken opt lant,
vāden eenen water totten anderē, heeft swert
grauw haer, heeft drye knobbelen aen elcken
voet, smaeckt gelijk verken vleesch. Oock sijn
eenderhāde heydischen int water, oock op lāt,
die selue sijn goet om eten.

*¶ Van een sorte van wormkēs ghelijck
vloyen, welcke die wildē heetē Attum.*

Dat XXXIII. Capittel.

DAER sijn wormkēs sijn gelijk die vloyen,
euen wel cleynder, heetē Attum op
ter wilden spraeck, groyen inden hutten
vanden menschen vulicheyt, die selue cruypen
eenen in die voeten, ende het iockt eenen
maer inwendich als sy daer in cruypē, die eten
so int vleesch datmen des niet en ghevoelt oft
seer luttel gewaer wort, en datmen se niet terstont
wt en doet, maket een cloue so groot als
een arweete oft erte. Ick heb ghesien als iceerst
merten Spangaerden aent lant quam, dat sy
sommighe van onsen gesellen die voeten heel
verdoruē, om datse geē acht daer op en haddē.

*¶ Van eenderley vliermuysen des lants,
hoe sy die lieden des lants des nachts in
den*

*den slaep inden teenen vanden voeten
ende in dat voorhoofd bijten.*

Dat XXXIII. Capittel.

DAer sijn vliermuysen vaneender manieren, die grooter sijn, dan die hier in Duytsch lant sijn, die vliegē des nachts inden hutten om die nesten daer die lieden in slapen, en als sy gewaer worden dat die menschen slapen ende haer laet geworden, vliegen sy by die voeten, en bijten eenen mont vol, oft sy bijten int voorhoofd, ende vliegen dan wederom wech. Doen ick onder die wildē was, beten sy my dickwils vanden teenen der voeten, ale ick wacker wert, sach ick die teenē bloy ende, maer sy bijten die wildē gemeynliick int voorhoofd.

¶ Vanden Bien en Hummelē des lants.

Dat XXXV. Capittel.

DRyderhande gheslacht Bien siin in dat lant. Die eerste siin seer geliick die Bien int ghemeyn hier siin. Die andere sijn swert en groot, geliick als die groote vlieghen Die derde sijn cleyn als muggē, oft cleyn vliexkens, des Bien al geliick hebben haren honich in holle boomen, en ick heb dickwils metten wilden dē honich wt geheuen van alle dryen geslachten, dat wy gemeynlijck betere honich
by

by die cleynste vonden, dan by die andere, sy en steeken oock niet so seer ghelijck die Bien hier telande, want ick dickwils gesien heb, dat die wilden den honich langhen, ende dat die Bien op haer vlogen, en datie genoch af te stryken hadden vanden naecten lijue, oock heb ick selfs den honich naect gelanckt, maer ick moste dat eerstmael van grooten wedom in dat water loopen en die Bien daer in af wasschen, anders en const ick niet quijt worden vanden lijue.

Vanden vogelen des lants.

Dat XXXVI Capittel.

DAER sijn oock veel selsame vreemde vogelen daer in dat lant, een geslacht ghe-naempt Vwara Pirange, die hebben haer voyeringe bijden zee, nestelen opte clippen die welcke daer ligghen vast byden vasten landen, is by nae so groot gelijckeen hoen, het heeft eenen langen beek en beenen, by nae gelijckeenen Reygher, maer niet al wt so lanck, en heeft die natuer, die eerste vederen die den ionghen wt wassen sijn wit graw, daer nae als sy vlucht worden, sijn sy swert graw, daer mede vliegghen sy dan bycans een iaer, dan veranderen haer die selue vederen, en den gansen vogel wert so roet, als eenighe roode verwes sijn mach, so blijft hy dan, sijn vederen sijn groot gheacht by die wilden.

Berecht

¶ Berecht van sommige boomē des lāts
Dat XXXVII. Capittel.

DAER sijn boomen, die welcke die wilden Iuni pappeeywa noemen, op die selue boomen wast een vrucht, eenen appel niet seer ongelijck, die vrucht knauwen die wilden, en drucken dat sap daer wt in vaetkens, daer mede verwen en scilderen sy haer, als sijt eerst opte huylt strijcken, so ist gelijc water, daer nae ouer een wijle wort haer die huylt so swert gelijck inckt, dat duert tot indē negensten dach, dan vergaet dat weder, en niet voor die tijt, hoe veel sy haer wasschen in water.

*¶ Hoe den cattoen oft boomwolle wast
en den Brasieliaensen peper, ende oock
sommige ander wortelē meer, die welcke
die wilde planten om te eten.*

Dat XXXVIII. Capittel.


DEN Cartoen oft boomwolle wast op boomkens, ontrent eenen vadem hoghe, heeft veel scueten oft tacken, als sy bloyen so crygen sy veel knoppen, als die rijp worden so gaen se open, en die wol staet alsoo inden knoppen om ronde kerenkens, die sijn swert, dwelck dat saet is daermēse af plant oft sayet, en die tacken sijn heel vol vanden knoppen

pen. Den peper van dien lande is tweederley
faetsoen, den eenen is gheel, den anderen root,
maer wast op een maniere, als sy groen is so is
hy so groot als haechbesien, die opte doornen
wassen, het is een cleyn boomken, ontrent een
half vaden hoech, ende heeft cleyne bladerkēs,
hangt vol vanden peper, is scerp inden mont,
plucken hem af als hy getijlich is, droogende
inde sonne, en daer is noch een ander faetsoen
cleynen peper, den voorgheuoemde niet seer
pnghelijck, den welcken sy oock also als den
anderen drooghen.

Daer sijn oock wortelen die Iettiki heetē, die
sijn van goeden smaeck, als sy die planten, sijn
den sy die in cleyne stucken, steekē die stucken
inder eerdē, dat ontsonēt hem, en breydet hem
ouer die eerden gelijk hop smeten, ende wort
vol van dien wortelen.

Saluyt reden.

*¶ Den leser wenscht Hans Staden
Godts genaede ende vrede.*

 Onstighe leser, desen mijnen schip-
vaert ende reyse heb ick om oersaec
int corte nae beschreuen, allen den
aenvāck te vertellen, hoe ick inden
tyrannisschen menschen gewelt comen ben,
om daer mede te bewijfen hoe geweldelijckē
sonder cenige hoope, my die noothelper on-
se Heer

se Heeren Godt verlost heeft wt haer ghewelt
dat oock een yegelijck hoore, dat die almachtighe
Godt nu noch euen so wel sijne Cristenen
gelouigen onder den Heydensen goddelosen
volck, wonderlijcken bescuddet en geleyt, als
hy vanden begin der weerelt oyt gedaë heeft,
dat oock eë yegelijck met my Godt daer voor
danckbaer sy, en hem inden noot op hē ver-
late, want hy selue spreekt. Roept my aen in-
den tijt der noot, so wil ick v. beraden en hel-
pen, ende ghy sult my prijsen, & cet.

Nu mocht die menige seggen, ia soudick dat
al drucken latē wat ick mijn leefdage versocht
en ghesien heb, so most ick een groot boeck ma-
ken, dat is waer, dien nae te volghen, wist ick
noch wel meer te schrijuen, maer ten heeft die
reden niet noch gesteltenisse. Ick heb die mey-
ninghe, wat my daer toe beweecht heeft dit
boeck te schrijuen, genoch herwaerts en der-
waerts in veel plaetsen aen geteekent, hoe wel
wy alle gader schuldich sijn Godt te louen en
danckē, dat hy ons behoet heeft en bescermt
vander eetsler vren vā ons geboorte, tot opten
tegenwoerdighen dach ende vre ons leuens.

Voort so can ick wel bevroyen, dat het in-
hout van desen boecke, den sommighen sal
vreempt duncken, wie can daer teghen, niet te
min, so en bē ick die eerste niet, en en sal die leste
oock niet bliuen, dien sulcken schip vaerden,
lant

lant, en volcken wel bekend sijn, dien seluē en
is oock alle dingen niet met lachen sijn gewor
den, noch en sullen geworden yemāden, maer
dat dien, diemen vanden leuēde lijue ter doot
brengen wilt, soude te moede sijn als die sijn,
die daer verre af staen en het spel aen sien, oft
daer af horen seggen, dat weet een yegelijc wel
te berechtē. Als die oock altsamē souden indē
tyrānischen viāden hāden comen, die in Ame
rica varen oft zeilen, wie soude dā daer heenen
verlangen. Maer dat weet ic waerachtich, dat
menich eerlijck mā in Galliciē, Portugael, Frāc
rijk, oock sommige Tātwerpen in Brabāt, die
in America geweest sijn, my des moeten ghe
tuychnisse geuen datter so mede is, ghelijck ick
scrijue. Maer dien die sulcke dingē niet en wee
ten noch versocht en hebbē, beroep ic my op
dese getuyghen ende Godt voor al aen.

Die eerste reyse die ick dede in America, was
met eenē Portngaloeschen schip, die hoop mā
hiet Pintyado, waeren onser drye duytschen
opt schip, die eene die was van Breemen ende
hiet Heynrick Brant, die ander hiet Hans van
Bruchhausen, ende ick.

Die ander reyse dede ick vā Ciuiliē wt Spaen
gen nae Rio de Platta, eenē prouintie in Ame
rica gelegen so genaempt. Die ouerste vanden
scheepen hiet Don Diego de Senabrie, daer en
was geen duytsch op die reyse mede, maer nae
lange

lange moyte, anxt en vreesse te water en te lande, dwelck duerde ontrét twee iaer, alle inden een leste reyse als voor gemelt, ten leste ledé wi schipbruyck by een eylant genaépt S. Vincente, leet heel by den vasten lāden van Brasiliën, en die Portugalosers de bewonen dat, daer op die selue plaetse vont ick eenen lantsmā Eobani Hefsi saligen sonē een, die my daer seer wel ontfinc. Noch hadden coop heeren van Antwerpen, die welcke men Scheetz heet, eenen factoer daer die heet Peeter Roefel, die alle beyde moeten my getuychnisse geuen, hoe ic daer ben aen comen, oock hoe ick ten leste vanden Tyrannischen viandē ben gevangen worden. Voort die schippers die my vandē wilden gecocht hebben, waren wt Normādien in Francrijk, die hoofsmā vanden schepe was van wat tauilla, genaempt Vvilhē de Moner, dier stierman heet Franchoie de Schantz, ende was van Harflor, die Dolmuts was vā Harflor, genaépt Perott, die eerlicke lieden (Godt die louet haer inder eewiger salicheyt) die hebben my geholpen naest Godt, in Franckrijk, sy hebben my helpen een pasport vercrijgen, sy hebbē my gecleet, en gauen my teer gelt, die my die getuygnisse sijn, waer sy my gecreghen hebben. Daer scheeppe ick vā Diepen wr Frackrijk, en quam te Londē in Engelāt, daer vernamen die Coopgesellen vanden Nederlānsche borse oft staelfhof

665
hof vanden scipman, daer ic mede daerwaerts
comen was, hoe dat met mijn saeck ghelegghen
was, noyde my te gast vereerde my met eenen
teerpéninck, daer nae seylde ick in Duytschlât.

Tantwerpen quâ ic int huys vā Aken by ee-
nen coop heer, Iasper Schetz genaempt, dē sel-
uen gaet dien voorghenoemden factoer Peter
Rosel in S. Vincente oockaen, als voorgeseyt
is, dien brocht ic die tijdinge, hoe dat die Fran-
schoisen sijns factoers schipken in Rio de Iene-
ro hadden aengevallē, maer waren wederom
afgheflaghen, die selue Coop heer schanck my
twee Keylers ducatē, God wilt hē vergelden.
So nvergens een ionck gesel ware, die met de-
sen scrijuen en getuygen niet te ghenuegen en
ware, op dat hy niet in twijfel en leue, so neept
dan Godt te helpe, en vaet dese reyse aen,

ick heb hem hier kennissen ghenoch

gelaten, dien pat volge hy nae, die

Godt helpt en is die weerelt

niet gesloten. Den almach

tigen Godt, diert alle in


allen is, sy lose een


prijs vā eewichz

tot eewichz

Amen.


FINIS.





JSS8
S776W







Th T